

Unherera Humambo

# UNHERERA HUMAMBO

WRITTEN BY

PHIBION & JOHN  
MANDONGWE

---



**Written by**

**PHIBION MANDONGWE**

**+263714160957 / +263774512473**

**AND**

**JOHN MANDONGWE**

**+27845412105 / +263779698011**

## **CHAPTER 1**

---

Moto wepadare waiwoneka kubvira kwawo  
nechekure zvaireva kuti wainge woda  
kudzima. Ukuwo jena guru rainonoka  
kubuda, misi iyi rainge ratobudirana

nehweva mambakwedza. Izvi raireva kuti wainge woda kufa. Vaibata makurwe vaitoshandisa tsvatsva kuti varione sezvo yaiva nguva yezhizha.

Padare paiva nevarume vashanu vainge vakagara vakakomba moto uyo wainge woda kudzima. Hapana ayikwanisa kushukudzira nekuda kwenhaurwa yaidzeiwa ipapo. Pamapendekete avo vose paiva memapfumo ayinge akatesvera semunzwa weNungu, achivaima semurazvu wemoto wemhizha unopfuriswa mapadza.

***"Varume ini zvekuchaona muroi uyu mudunhu rino handichadi, baba vake Deme ndakavachengeta muno kusvika vazofa asi havana kana musu wavaka kandidzana mashoko ne mhuri yangu, asi nhasi mhodzi imwe iyoyo yaakasiya Chademana azofarisa kupinda nemwenje mudziva izvezvi mudzimai wangu wechina uya mwana wako iwe Dzitiro arikurwara handifungi kana kukayedza tiinaye".***

Vanotaura mambo Dzimbarimwe vachibva vanyarara.

***"Murikureva mukunda wangu?, Ko zvaita sei kuti vakandidzane mashoko na Chademana harisi shura iroro".***

Dzitiro anodavira chiso chake chainge chatounyana uye mananda ayinge atoti tate-tare semidzi yembambaira uku

achibaya baya pfumo rake pasi  
nekumagaro kwaro.

*"Anzi ndivazurire mutanda wekubika nhopi  
iya yawakandipa zuro saka aramba,  
mukadzi wangu mai Chengeto vati  
ndayedza kunyengerera Chademana sezvo  
panga pasina mumwe murume  
wawangatuma. Chademana azatora  
mukana uwoyo kukumbira mai Chengeto  
bonde ndipo pabva gashidzanwa  
remashoko, saka ndati handingatangi  
ndatonga imi machinda angu musati  
mainzwa nhau iyi nemi Tezvara vangu uye  
murijinda ranguwo zvekare.*

***'Tyi imhosva chaiyo uye yakatongwa  
kware Chademana ngaafe hatigari  
nemunhu akadai mudunhu tonomupisira  
kunjinga kwechikomo icho  
kwatinosipisira vamwe. Kana izvezvi  
ngaatorwe afuke rake oga kuda kurara  
nemukadzi wamambo, chiiko panyama  
yehuku".***

Rinotaura rimwe Jinda raishevedzwa  
nerokuti Muchodo.

*"Nhasi hazviite toda kumupfuudza  
mangwana rakacheka nyika ruzhinji rweze  
rwuchiona nekunzwa nhau iyi dayi  
ndakaziva ndakauraya baba vake  
pavakauya mumuzinda uno dayi zvose izvi  
pasina "*

vanotaura mambo Dzimbarimwe.

***'Zvaarimashura mbongoro kushambira munyanza handina vakwasha vaviri kumberi kwangu ndoziva imi Mambo mangwana zvachiri chisi Chademana anoenda kunyika dzimu rakachekanyika sezvo rakombewa ranzi ripere handione pachiri neimwe nyaya yekuwedzera kana kutapudza vaisanyepa pavaiti kurera imbwa nemukaka mangwana inofuma yokuruma zvakwamuri imi Mambo kufuka kana kuwarira '.***

Anotaura Dzitiro achibva agara pasi sezvo ainge akamira.

Nyaya yakazopetwa mushure mekunge hope dzobata mumaziso, ndokuchiparadzana mumwe nemumwe oyenda kunorovera matama pasi.

Mudzimba mainge monzwickwa kubvumirana kwengonono pwere dzichivhumukawo nedivi.

Varindi vemumuzinda umu vaionekwa kukwira nekudzika vakabata zvombo zviso zvavo zvainge zvakazorwa matsito zvekuti waisa ona kuti ndiyani.

Chademana nemukadzi wake vainge vakatorara varikutsi kwehope vachitorota vasina chavaiziva. Mudzimai waChademana ainge akazvitakura ainepamuviri paiva nemwedzi misere kureva kuti painge

pasara mwedzi mumwechete kuti  
achizvara.

Chadema anoti akarara anotanga kurota  
hope dzinotyisa kwazvo,ndokubva ati pepu  
ziya richiti teu teu nemuviri wese ndiye go-  
o kugara akazembera madziro ndokutura  
mafemo sembongoro iri pajoko izvo  
zvavhundutsa mukadzi wake achibva  
amukawo ainekakupatika.

***"Zvamboita sei murume wangu"***

anobvunza mukadziwake.

Chadema anotora nguva asinakudaira  
akatarisa panzvimbo imwe ndokubva ati,

***"Nditambidzewo mvura yekumwa"***

Mukadzi anobva asimuka mudaunha  
maanga ari ndokubatidza  
tsvatsva,ndokuchisimuka kwakutora  
mukombe wedeteni ndokuchera mvura  
muchirongo kwakudzoka achipa murume  
wake.Chadema anoigashira oipitipidza  
wose asina kumbozorora.

***"Mai mwana hope dzandarota  
dzinotyisa, Ndarota ndiri musango dema  
ndanga ndiri ndega kumberi kwangu  
kwabva kwaita shumba ndobva  
dzandikomba kuti nditizire divi iri***

**zvaramba kuti nditizire divi rimwe  
zvaramba panga painechimwe chimuti  
changa chakareba kwazvo  
ndabvandazvetukira mumuti muya kuti  
ndisa dyiwe neshumba idzi pandanga  
ndavapakati nepakati pachu muti  
uyuwabva warezuka pamwechete neni  
shumba dzabva dzauya pandiri  
ndokundiruma iwe ndabva ndakuona  
urinechekure uchichema wakabatà  
dumbu rako.ndabva ndaona nyanga  
yasvika ichiwira mberi kwako ndonguva  
yandazopepuka handisikuziva kuti  
zvinorevei".**

Mukadzi wake anoramba akatarisa  
pamwechete achizunguza musoro,anobva  
ati

**"kuti maiChengeto havana kuudza  
Mambo kuti maramba kuvavazurira  
hunhi nekuti imhosva kuramba kutumwa  
nemukadzi wamambo"**

"ha-a mukadzi wangu handingaone kuti  
imhosva iyoyo nekuti ini ndanga ndichito  
mhanyirawo zvangu dai ndanga ndisiri inini  
handiti dai wafa paya yairohwa nani nyoka  
iya."

**"Zvagara ngoma inoti pangu pangu  
cheregai tione kunowira tsvimbo  
nedohwe nekuti hope dzenyu  
hadzipotse,koiyo nyanga yamataura**



***inorevei"***

akadaro mukadzi wacho.

*"Mai mwana ndatozvi shaira donzvo asi  
maonero angu pachadeuka ropa nyanga  
handina kuziva kuti ndeyeyi, ha-a  
ngatisiyane nazvo inzwa jongwe retatu  
rakurira iro sezvowanga uchiti ukuda  
kufumira kuwachaka nekuti chisi"*

***"Mati ndichavata hre regai ndichito  
rongedza richingo buda ndobva  
ndatoenda, asi moyo wangu  
haunakugadzikana pfungwa yekuendako  
ndangandisisina asi chokuita hapana  
ndavekutongoenda asi ndichange  
ndakabatira hana mumaoko"***

*"Watii ndingaoneiko pamwe ihope  
dzechando"*

akadaro Chademana.

***"Mambo Dzimbarimwe ndinovazivaini,  
inyoka inoruma chaisingadye"***

Vanotaura vachitosimuka ndokutora  
mukombe vachinotsveta pamusoro  
pechirongo vanodzoka ndokugara padivi  
pemurume wavo havana kuzorara  
vanotaura kusvika kunze kwayedza.

Zuva richingoti vhu-u mukadzi  
waChademana anoisa zvaaida kuno wacha



munhava iyo yaive yakagadzirwa nedehwe  
remombe vakaitawo rombo rakanaka  
vanoona vakadzi vashanhu nemhandara  
nhatu vaive vakasengawo mitundu  
vachitoendawo kunowacha mumawoko  
vainge vakabata zvirongo, ndokubva  
vatobatana vakananga kurwizi urwo  
rwainzi mungezi

Toro jinda guru ramambo Dzimbarimwe  
akafumiro bata jongwe muromo akananga  
padare.Ndokuwana mutevedzeri wake  
Dzitiro atovepo moto wakange watove  
mavivi nechekare paive nemamwe  
machinda matatu ndiwo aikwichidzira  
moto. Ndokubva vamutsana hapana  
kutorawo nguva Mambo Dzimbarimwe  
vanobva vasvika vakapfeka nhembe  
dzakasiyana nedzavaisi pfeka mamwe  
mazuva izvi zvairatidza kuti  
panechariuraya zizi harife rega. Dzitiro aive  
atoziva nyaya haana kuda kupedza nguva  
kuteya nzou neriva.

***"Mamuka seyi madyira panze "***

akadaro Toro jinda guru ramambo.

*"Ndamuka zvangu wamukaseiwo iwe,  
neweDzitiro vatezvara vangu".*

Dzitiro anobva adavira achibaya baya moto  
nepfumo rake ndokunyarara. Mamwe

machinda ose akazouya kusara kwevarindi  
avo vaionekwa kutenderera muchivanze  
vakarembedza zvombo  
mumaoko,nevamwe vainge  
vakachengetedza kusiwo guru vamwe  
ndovaive kusiwo diki.

***"Toro nguva ndoyatisina ridza tsuri  
vanhu vese vaungane nguva hatina  
nyaya unoiziva iwe"***

vanotaura mambo Dzimbarimwe chipfuva  
chavo chichitamba tamba.

Toro anosimuka ndokutora hwamanda iyo  
yainge yakaiswa pahunde yemuti  
wemukamba waiva padare apa ndokuiridza  
katatu. Vanhu vanobva vauya padare  
vachimanyirana.

Zuva rainge rati kwirei mushana ndipo  
wavainge wonakidza vakadzi vanemimba  
dzine mwedzi mitatu.

Chadema ayinge ari musasa make  
achitodzeya hope dzaakarota kuti  
dzinorevei, akangosimuka ndokunanga  
kudare kwainge kwarira hwamanda  
anosviko gara kumashure chaiko.

***"Nyararai uko munotaurei padare  
muchadumbirwa zvenyu itai manyemwe  
seemhuru iwawo"***

anotaura Toro achitenderera padare.

Vanhu vanobva vati kwaka.

Mambo Dzimbarimwe vanobva vati  
nyamwi kusimuka pachigaro chavo  
vakabata pfumo raivaima semurarabungu.

***'Nhasi munoziva kuti chisi izuva  
rekutonga mhosva uye kupa vakaita  
mhosva murango wavo, ndisati ndataura  
nhau yangu Chademana sumuka uwuye  
pakati apa umire ipapa "***

vanobva vanyarara.

Chademana anotora nguva asati asimuka  
izvo zvakatsamwisa Dzitiro.

***'Hausi kuzvinzwa here iwe uri kuzvidza  
mambo unozviona saniko mudunhu muno  
sumuka nekuchimbida "***

anotaura achiita kakusimukira.

Chademana hana yake inotanga kukindidza  
sengoma yepandari achidedera serutsanga  
rwuri mumvura meso ake ayinge  
atonjenga musodzi. Anosimuka ndokumira  
mberi kwechita chevanhu.

***'Twe ndiwe unokumbira bonde kuda  
kurara nemukadzi wamambo iwe ini  
kubvisa fuma mahara kuti iwe uzorara  
nemukadzi wangu nhasi uchataura  
chakatadzisa imbwa kuseka iyo  
kunyenama ichigona, ndiudze kuti uri  
chii panyama yehuku waida kuyedza kuti***

**chii".**

Vanotaura mambo Dzimbarimwe meso akatsvuka seerovambira yavhiringwa mubako.

Chademana zvinomukatya madza zvikuru anobva abata muromo wake ndokubva ati.

*"Ini kukumbira bonde mukadzi wenyu? Upi wacho ngaasimuke ataura zvizere ini zvamataura ndezvemugotsi matsuro mambo"*

anotaura Chademana.

***"Saka uri kuti ini ndinongorotomoka manje! Mai Chengeto sumuka utaure zvinogutsa vanhu"***

vanotaura mambo.

*"Twe Chademana nezuro paya wakati ndikakuvazurirai huni ndoita bonde neni waida kutondibata ndipo pandakazotiza iwe ukati ndisaudza mambo"*

Mai Chengeto vanotaura nhema dzoga misodzi iri pamatamba ndokubva vagara pasi Chademana chainge angoita kuramba kutsemura huni izvo zvainge zvava manyepo.

Mai Chengeto vachipedza kutaura vanhu vose vanodza vati,

***"Ha-aa, ngaurawe iyo. Ngaapondwe imhandu"***

Munhu wese waitaura zvaanoda vachibva vanyararidzwa.

*"Musungei mbira dzakondo handina akawanda naye uyu".*

Vanotaura mambo shungu dzakavazadza, Chandemana ndokubva asungwa mbira dzakondo.

***"Ndokumbirawo kuonekana nemukadzi wangu mambo wangu ndine mashoko andinoda kumuraira"***

anotaura Chadenama misodzi yekutambudzika ichiita kuchururuka.

*"Hapana kuonekana asi muchainda mese handisari nerudzi rwako mumuzinda wangu".*

Vanotaura mambo vanobva vabaya maziso aChademana ose ndokuputika, Anoikwetsura mhere yakavharisa dare rose achiita kuumburuka.

***"Dzitiro pedzisa munhu uyu"***

vanotaura mambo ndokubva vagara pachituro chavo. Dzitiro anotora pfumo rake ndokufamba achiinda painge pakavata

Chadema ndokufukura nhembe yake  
kwakupfekera pfumo rake nekumashure  
kwa Chadema anoripinza achirinzwa  
kudambura ura rakandomirira rava  
pakurokuro ndokurisiya riimo.  
Chadema haana kufurukuta kana kudii  
akangonyarara akadero. Dzitiro  
anosumuka ndokupfira Chadema  
kumeso kwakukanda nhanho akananga  
kuna mambo ndokuvazevezera  
zvaisanzwikwa neruzhinji, Mambo  
vanoonekwa kugutsirira musoro Dzitiro  
achibva agara pasi ivo ndokusimuka.

***"Kwasara mukadzi wake aripi  
anofanirwa kufawo pamwe chete  
nemurume wake, ngaasumuke awuye  
kuno tione".***

Vanhu vanotarisa mukadzi waChadema  
asi havana kumuona.

*"Ndinomuda pano muteverei mumba make,  
kutosara hake hachidya munya, handijaidze  
makudo neanokamhina "*

vanotaura mambo vakafinyama kumeso.





## CHAPTER 2

---

Mukadzi waChadema zvaakasangana nevakadzi vashanu vayiendawo kunowacha apo paiva nemhandara nhatu vakatanga kufamba vose kwakunobuda nekusiwo guru uye ndiye ayiva kumashure kwevese. Pakaita imwe mhandara yainzi Sarudzai yakati iri mukufamba kudero yakabva yagumbunywa chingunwe chepakati petsoka izvo zvakaita atsauke munzira ndokuisa nhava yake pasi iyo yaiva mumusoro kwakutonona ndeye meso tsve-e patsoka yake apo paakaona pava kubuda uye nzara yanga yatobva zvino akadambura chimwe chipfeko chake pane zvaayida kunowacha ndokubva asunga chingunwe chake kwakuzosenga nhava ndiye munzira kutevera vamwe avo vaininge vasina kure kwavanga vainda.

Ari mukutevera kudero akaona mukadzi waChadema uyo waayiwirirana naye avapowo pachikwata chavayiinda nacho sezvo paasvika pavaiva haana kunge

amuona nekuda kwekuti iye ayiva mberi  
zvino akamuona akasenga zinhava zinguru  
akabata zvakare zvirongo zviviri chimwe  
kurudyi chimwe kuruboshwe ndokubva  
afambisa kuti anomuyamura sezvo  
akamurwadziwirwa nekuda kwezidumbu  
raayiva naro.

Akafambisa uku gumbo rake rairwadza  
zvaro asi akashingirira dzamara avabata,

***"amai ndipei nhava yenyu ndikusengerei  
imi musenge yangu "***

akadero Sarudzai mushure mekunge asvika  
izvo zvakaita kuti Mukadzi waChadema  
acheuke,

*"ko ndiwe Sarudzai, pandakuona watsauka  
munzira handina kuziva kuti ndiwe ini, rega  
ndikupei shuwa ndanga ndaremerwa  
ndaitozokanganisa mwana mudumbu "*

vakadero vachitura nhava iyo yavakabva  
vaisa mumusoro make.

***"Kamutauriro kenyu aka kamunoita  
muromo wenyu kanondifungidzisa mai  
vangu vakabaiwa nebvumo naDzitiro  
kumuzinda kwedu meso angu achiona "***

akadero Sarudzai sezvo ayisava  
wemumuzinda umu ayinge akapambwa  
kumuzinda kwavo makore mashoma  
ayinge adarika uko kwakasiwa muzinda  
wavadongo saka kuti adzokereko akaona  
zvisingachashandi uye ayiva achiri mudiki

pamwe ayizofunga hake zvokuzotiza kana akura.

***"Chirega kufunga zvakawanda Sarudzai ini pano ndiri amai vako uye ndinoda kuzokupa mwanawangu kana ndikabatsirwa mukomana handiti wakati unoda kuita muroora wangu ?"***

vakadero apo vainge vava kufamba,

***"ndagara ndatova muroora wenyu ndozviziva kuti munobatsirwa mwana mukomana"***

akadero Sarudzai vakazosvika kurwizi ndokubva Mai Chademana naSarudzai vainda paguvi ravo vari vaviri vamwe vose vaiva umwe neumwe paguvi ravo asi vainge vasina kunyanya kuparadzana.

Sarudzai akati achitanga kuti awache ndokuona haana kuuya neruredzo rwekuwachisa,

***"ndakanganwa ruredzo mauyawo nerwakawanda here amai mundipewo"***

akadero Sarudzai,

***"ndinarwo rwakawanda mwanangu tora munhava umo"***

vakadero ndokubva Sarudzai asimuka paayiva kwakutarira munhava yairehwa asi akaona rwushoma shoma rwaisakwana zvinhu zvavo zvose.

***"Rwaita rwushoma urwu regai ndimanye  
ndinotora rwumwe rwuriyo kumba "***

akataura achitosimuka ndokutopira gotsi  
mukadzi waChademana haana  
kuzokwanisa kumumisa zvino Sarudzai  
akamanya kudzokera kumuzinda uko  
kwaakasvikoshamisika nezvaayiona.  
Akaona varwi iri mheswana mumuzinda  
vamwe vakapakatira zvombo zvino  
akatanga anotora ruredzo kunhanga yake  
ndokuti achibva ikoko akabva asangana  
neumwe musikana uyo wavakabva naye  
kumuzinda kwavo musu wavapambwa.

***"Maita muvengi kani muno mumuzinda  
nhai iwe "***

akadero Sarudzai achivhunza,

*"asi uri kutomuka izvozvi kani Sarudzai inga  
wasarira taona zvinokatyamadza muzinda  
uno wakatakura kurema "*

akadero musikana uya,

***"kwete ndiri kutobva kurwizi ndanga  
ndauya kutora ruredzo rwandanga  
ndakanganwa, chiyi chaitika "***

akadero zvakare.

*"Murume wevaya vaunongoti mai mai  
zvisina basa aurawa takatarisa needu  
maziso izvozvi machinda ose awuri kuona*

*arikuzeya nemuzinda arikutotsvaka mukadzi wacho anoda kuurawawo "*

akadero musikana uya achibva atanga kufamba kuinda kunhanga kwake asi Sarudzai akabva amubata ruoko.

***'Tti hakusi kurevesa pane zvauri kutaura "***

akadero Sarudzai,

*"kana uchiti ndinonyepa tsvaka umwe wekubvunza kana kuinda kunoona kudare uko ndiko kuchiri naiye Chademana wacho "*

akadero musikana uya achibva apesanisa makumbo akananga kunhanga kwake.

Sarudzai achinzwa izvi akatanga kufamba achiinda nekudivi redare uko kwaakanoona zvakarovesa hana yake zveshuwa, Chademana akamuona akarara pasi pakazara ropa zvino akangoitawo semunhu anekwaarikuinda ndokuti verere kudzokera kurwizi zvisina akamuona uko kwaakati achangobuda mumuzinda ndokutanga kumanya zviya zveshikunwe chainge chabva nzara akabva azvikanganwa, vakamuona achisvika kurwizi vakangoti zvimwe kumanyira kuuya kuwacha izvo bodo.

***"Amayi muri kudiwa kumuzinda***

***nemurume wenyu "***

akadero Sarudzai sezvo akaona kuti  
akavaudzira apa zvaanga afunga  
zvaisazobuda,

*"kwaiteizve chawanga  
uchambodzokererawo ikoko "*

vakadero vachisimuka asi semukadzi  
ayiteerera murume wake haana kuda  
kuramba zvino Sarudzai akabva ati tanzi  
tiuye tose.

***"Vasikana ndiri kudzoka manje manje  
ndichambodzokera kumuzinda  
kwandadanwa "***

akadero mukadzi waChadema achiudza  
vamwe vake avo vakabva vadairawo.

*"Kana modzika muuyewozve nekacheche  
kangu muti muzukuru wenyu achirega hake  
kuuya achiinda kunotsvaka huni "*

akadero umwe mukadzi achitofarawo kuti  
awana wekutuma zvino Vaviri ava  
vakachizopinda munzira kudzokera  
kumuzinda asi vakati vachangotipote  
paisaonekwa nevaiva kurwizi ndokubva  
Sarudzai ayiva mberi amira.

***"Ndati handingakuudziriyi pakazara  
vanhu amai, kumuzinda kwaita  
manyamaamire nerongo muri  
kutsvakwa kuda kuurawa uye murume  
wenyu atourawa "***

akadero Sarudzai izvo zvakasvika  
sechibhakera kumukadzi,

*"uri kurevei Sarudzai ndatadza kunzwisisa."*

***"Chadema ariwa izvizi ndasiya imi  
muchitsvaka hanzu mose munoda  
kuriwa hameno panhu yemukadzi  
wamambo yakaitika nezuro"***

akadero Sarudzai izvo zvakaite kuti amai  
ava vaibudise misodzi pfungwa dzavo  
ndokudzokera pahope dzainge dzarotwa  
nemurume wavo zvino vakabva vasimudza  
makumbo kuti vaine kumuzinda  
vandourawawo sezvaitwa murume wavo,

*"ndava kuvofirawo pafira murume wangu"*

vakadero vachitofamba asi Sarudzai  
akabva amanya kuvabata.

***"Kwete amai sandiyo pfungwa yakanaka,  
ndinoda kuti chakatakura mudumbu  
chionewo zuva zvino kutotiza ndiko  
kwanaka pane zvamuri kutaura izvi"***

akadero,

*"Masango agara anezvikara zvinorura  
Sarudzai, ndikapinda musango  
ndichanngofiramo zvirinane ndifire pafira  
murume wangu"*

vakadero uku misodzi ichiyerera.

***"Chinonzi mira uye mukonde wesadza  
kwete rufu. Fungai kaviri amai uye  
mazano marairanwa zvisinei ngatitize"***



***tose sezvo iniwo handisi wemumuzinda  
umu uye ndainge ndisina kukuudzai kuti  
marwimwe zuro Dzitiro ayida  
kundimanikidza kuita bonde neni, paya  
pamakauya kugugudza munhanga  
yangu ayitovamo dai musiri imi angadai  
akasakura munda wangu saka zvirinane  
nditize nemi kana tichizodzika  
mumuzinda tozodzoka mushure  
mechinguva uye ini ndakurawo "***

akadero Sarudzai ava kutoyeredzawo  
misodzi izvo zvakarwadza mukadzi  
waChadema zvino vakati vachiri  
vakamira kudero ndokuona varwi  
varinechokure vachiuya kurwizi.

***"Sarudzai pedu patiperera "***

vakadero mukadzi waChadema  
akatendeka kudivi raibva varwi vamambo  
Dzimbarimwe. Sarudzai haana raakataura  
akangobata ruoko rwamai ava ndokubuda  
munzira ndiye pfo-o musango nedivi  
remavirira .....

Machinda amambo Dzimbarimwe  
zvaakanzi vatevere mukadzi waChadema  
muimba yake, Toro akasarudza machinda  
maviri Muchodo nerimwe jinda avo vaakati  
vasimuke vanange kuimba yake. Vakabva  
vasimuka zvombo zvakaremba mumaoko

zvaiwoneka kupenya kutesvero kwazvo  
ndokukanyaira vachibuda mudare.  
Muchodo akasvikorova musiwo  
nekumashure kwepfumo haana kuda  
kugugudza asi mukupinda kwavakaita  
vakawana ingori nzvimbo chete.

***"Mukati haana kunzwa nyaya iyi  
akahwanda ?, ngatimbonotarira muimba  
yokubikira "***

rinotaura rimwe jinda iro raiva  
naMuchodo mushure mekunge vatsvaka  
imba yose vakamushaiwa. Zvino  
vakananga kuneyokubikira uko  
kwavakasvika musiwo wakavhurika asi  
vakawana zvingori zvimwe chetezvo  
ndokudzokera padare paiva nechaunga.

***"Zvamunouya ari maoko chete nhai  
Muchodo madii kuuya  
makadungamidzana",***

anotaura Toro achiratidza kuti ari  
kumashure kwenguva.

***"Ingori nzvimbo chete mambo wangu  
pamwe anzwa shoko iri akafunga kutiza  
zvotoda kugarira kumasiwo uye vamwe  
votarisa dzimba dzose "***

akadero Muchodo.

***"Machinda ose torai zvombo zvenyu***

***mumutarire           vamwe           manyai  
munobvunza varindi kana mukamuona  
muuye nemusoro wake mutumbi wacho  
siyai ikoko mhuka dzesango dziwane  
mate anovavira uye machinda mashanu  
kwevai rume racho iri munoripisira  
kunjinga kwechikomo chinopisirwa  
mharapatsetsetse dzakaita seidzi,asi  
mudzoke nebvumo rangu uye vamwe  
mose mochiinda henyu "***

vakadero mambo vachinanzvira matadza  
avo achibva vagara pasi.

Vanhu vakasimuka ndokuita waziva kwake  
waziva kwake. Mumuzinda rainge  
rabesanwa machinda mashanu ayinge anzi  
andopisa Chademana vaviri vakabata  
maoko ake ndokutanga kumukweva  
dzamara vasvika muchikomo chiya  
ichochaisava kure ndokubva paveswa moto  
sezvo paigara patori nehuni  
dzaitongomirira kupisa vanhu. Pasina  
nguva painge pava nevivi ndokukandira  
Chademana imomo uyo akatanga kuputika  
putika zvino moto wayiita uchidzina  
nekuda kwemvura yaibuda pamutumbi asi  
ndiro raiva basa remachinda awo  
ayiwedzera huni dzamara Chademana  
avamadota ndokubva vabudisa bvumo riya  
rinova rakasiwa riri mudumbu  
maChademana. Vakamirira kusvika rapora

ndokuzoinda kumuzinda uko  
kwavakasvikonanga padare.

***"Basa rapera tava kutevera kwainda  
vamwe"***

akadero rimwe jinda mushure mekunge  
vapa Dzitiro bvumo rake,

*"Imi renyu basa mapedza mungachizorora  
henyu regai vainda ivavo vanouya naye"*

akadero Dzitiro ndokubva machinda aya  
abuda mudare.

Machinda ekutsvaka mukadzi  
waChademana vakatarira pose asi  
vakashaiwa zvino pakaita chimwe  
chikwata chaiva nemachinda gumi  
navasere avo vakabvunza varindi vekusiwo  
guru ndokuudzwa kuti apfuura nepano  
achiinda kurwizi nevamwe vakadzi  
vakasenga nhava pamwe vainda  
kunowacha. Naizvozvo machinda aya  
akabva atanga kumhanya akananga  
kunowachira madzimai uko kwaakasvika  
vakaona vakadzi vaiwacha asi wavaida  
mukadzi waChademana ayisavepo.

***"Mukadzi waChademana anzi arikuno  
aripapi"***

rakadero rimwe jinda kuvakadzi vaiwacha,

*"Achangobva pano manje manje achiti*

*achambodzokera kumuzinda, kwakanaka here?";*

yakadero imwe mai inova iya yainge yaraira kuigirwa mwana wayo.

***"Ayinda nenzira ipi sezvo yatabva nayo hatina kusangana naye"***

rakadero jinda riya rekumbotaura uye harina kuda kudaira zvarainge rabvunzwa.

*"Aora nzira iyoyi yamabva nayo asi anga achifambira mukanzira kadiki ako munogona kukatedza ikako pamwe ndipo pamaparadzana"*

anopindura zvakare uya mukadzi ndokubva machinda atendeuka kupinda mukanzira kaya.

***"Tamubata honai tsoka yake iyi asi vanenge vanga vari vaviri"***

rakadaidzira rimwe jinda raiva kumberi zvino vakatanga kuteedza tsoka dziya ndokuzosvika paya painge pambomira vana Sarudzai apo pakambovavhiringa.

*"Handichaoni tsoka dzavo mirai pamuri ipapo tione kuti vainda nepapi"*

akadero uya ayiva kumberi asi asati apedza kutaura pakaita umwe akadaidzira,

***"tarisa tsoka iri kurudyi kwako haisiyo here yake kana kuti ndiwe watsika ipapo";***

izvi zvakaita kuti vawane tsoka dzekubuda  
munzira kwainge kwatizwa nemukadzi  
waChadema,

*"Meso ako anenge etsuro iwe ndivo ava  
handei varume kutotiza uku kwavaita "*

rakadero jinda ndokubva vabuda munzira  
ndivo musango nedivi rekumavirira iro  
rainge rapindawo naSarudzai nemukadzi  
waChadema.....

## **KUPERA KWECHITSUKO 2**

## CHAPTER 3

---

Hapana ayitaura nemumwe panguva iyi.  
Kufemerredzeka ndiko badzi kwainzwikwa



asi ayiva mukadzi waChadema, nguva iyi ayiva kumashure.

***"Amai shingai tibude mumukamwa mamupere tozofema kamwe tava kumhiri uko "***

anotaura Sarudzai akatendeka mhiri kwezvikomo zvaiva mberi kwavo.

***"Ndaneta Sarudzai muroora wangu mabvi haachadi muviri warukutika "***

anotaura mukadzi waChadema akabata muchiuno dumbu ririmberi.

***"Svinga rinorema wava kusvika, asi pano hapaite kuti tizorare hana yangu iri kundirambira".***

***"Sarudzai ndichatyeiko kununa ini ndakapasikwa, ndakurirwa mwanangu "***

anotaura mukadzi akabata dumbu rake misodzi iri hova mumatama.

Sarudzai anodzoka kumashure ndokubata mukadzi uyu akaita kumumbundikira nechemuchiuno vanotanga kufamba nemusango dema uye maingonzwikwa shiri badzi kuti tsviri-tsviri.

***"Handichadzioni tsoka dzavo, pane arikudziona here".***

Rinonzikwa inzwi kushevedzera kumashurwe kwavo.

*"Ndaresva kunzwa here ini, ndanzwa seinzwi ra Benhure shure kwedu "*

anotaura Sarudzai.

***"Handina chandanzwa ini hadzisi nzeve dzako here "***

*"Kana handei mugutukutu umo tizvifukidze nemashisha awo rufu rwedu rwanhuhwa pano".*

Anotaura achikweva mukadzi waChadema ndokupinda munezigwenzi remuZambiringa rainge rakasvibira ndiye hwatata vose kwakuzvivhara nemashizha.

***"Kwenyai nhino nekasiyanwa, chigumwe chidiki tisaonekwa, inzwai vavakuuya nekuno avo musamboti bufu "***

Sarudzai anozevezera hana ichiita seichabva.

*"Varume mirai muone zvandinoda kuita mukadzi uyu kana ndamubata, haanga tifambise sepwere dzake kudai. Ndoda kutanga ndatomborara naye rushanu ndapedza ndopinza pfumo nekumashure kwake semaurairwe akaitwa murume wake naDzitiro ndozocheke musoro wake zvarehwa namambo tanzi tiuye nawo paya "*

Benhure anotaura ava kutosvika pamuZambiringa uya mutsindo wake wainzwika kutinhira. Anosvika pagwenzi

riya anotarisa tarisa tsoka achibva  
adzishaiwa, nguva iyoyo anonzwa kuda  
kurasa mvura anoswadera pagwedzi riya  
ndokutanga kuweta akatarisa mudenga  
achiita kugomera weti yose yakaperera  
mumusoro memukadzi  
waChademana,Benhure akaita sekuti  
ayirasa mvura iri kubva muchirongo.  
Achipedza anobva apfira chikarabwa chaiva  
mumukanwa make chichibva chawira  
padama raSarudzai.

***"Varume kwatiri kuita kutsvaka tsono  
mucheja pamwe vatodzoka kumashure  
dayi tavabata, munoti nedumbu  
remukadzi uya anosvikepi"***

anotaura Benhure achibva pagwenzi riya.

***"Taura hako pamwe tsoka dzatawona  
ndedzevavhimi"***

rinodavira rimwe Jina raiva shure  
kwevamwe.

Vari mukutaura kudero nechedivi  
rekuchamhembe kwakadziva kumuzinda  
rimwe Jinda raiva rakasviba kwazvo  
rinotendeka kudivi ikoko rakatita  
kuchwatira rimwe ziso ndokuti,

***"Varume paita nakisa murimi, iyo imhara  
kaiyo imire pajinga pegwenzi remuroro uyo"***

rinobva ranyarara vamwe ndokupotsera maziso avo ikoko zvedii vanoona iriyo. Vose vanoti hwatata ndokugwesha vachiinda ikoko asi vakaita kuparadzana, haina kufamba sezvo mhara iyi yaiva kutsi kwehope inoyerekana miseve mitatu yanyura ichibva yawira pasi.

***"Ndoda chiropa chayo chichiri kupisa, vhiyai nekuchimbidza tiwane mabatiro"***

Benhure ayiva nerudo nenyama vanovhiya ndokudzokera zvavo.

*"Tapona nepaburi retsono, vainda ngatisumudzirei rwendo rwedu amai"*

anotaura Sarudzai.

Mukadzi waChademana anotanga atura mafemo ndokubva ati.

***"Kukurukura hunge wapotwa, asi ndarwadziwa nemaaurairwe akaitwa murume wangu kupfekerwa pfumo nekumagadziko kwekuzvibatsira nako here, Benhure adero dzangu dzichinzwa"***

misodzi yaiita kuchururuka sechitubu.

*"Zvinorwadza hazvo amai zivai kuti nerimwe zuva gava richadambura musungo vadzimu vanoona, chandinoda kuraramisa mwana ari mudumbu ndinoziva kuti mukomana chete"*

vanotaura vachibuda mugwenzi.

***"Kwatova kushinga asi Dzimbarimwe andibaya panyama nhete, nhasi ndava kutetereka nesango kwandakananga chaiko handizivi, ivo mai Chengeto kuti havaroi ivava".***

Anotaura mukadzi waChadema. Sarudzai anovapukuta misodzi ndokutanga kufamba zvishoma nezvishoma vanosvika panerwumwe rwizi ndokumwa mvura rwaisava nemvura yaiyerera yakawanda yaiperera mutsoka.

Vanoyambuka ndokumboteedza rwizi iroro vari mujinga marwo vachidzika nekuzasi.

Vanoti vavakuzasi chaiko ndokuchirurama nekumavirira asi sango ravakapinda raiva nematsimba emhuka dzakasiyana siyana sevanhu vaiva parumana nzombe havana kuita basa nazvo. Zuva rakasvika pakurova nhongonya vasati vazorora parainge rorova shaya mukadzi waChadema akabva amira Sarudzai ndokuramba achifamba sezvo ndiye ayiva mberi, paakazocheuka anobva awona .....

Mambo      Dzimbarimwe      vanosumuka

pachigaro chavo icho chaiva chitema muviri wese. Vanofamba dzamara vasvika kumacheto kwechivanze vanotenderera nechivanze chavo vachitarisa mativi ose muruoko vainge vakabata pfumo vanonyemwerera vachiona varindi vavo riribesanwa, asi machinda avo avaatuma haanakuvaona, muzinda uyu waiva pakakwirira zvekuti waiona zvose, waiva wakakomberedzwa nerusvingo rwemambe ayibva munerimwe gomo raiva kumavirira rainzi Chembira. Kuzari kwarwo ndiko kwaiva nerwizi urwo rwainzi Mungezi asi rwuri kunze kwerusvingo. Muzinda uyu waiva nemasuwo maviri chete kwaigara kuine vachengeti.

Mambo vanobva vadzoka padare apo paiva naDzitiro na Toro vanobva vagara vachiita kuzviwisira pasi.

***"Temba ayindepiko nevanji wangu mushevedze andivigire tsvimbo yangu nekuchimbidza ndiyo yandinoda kurovesa dumbu remukadzi waChadema ana vauya naye arimupenyu".***

Vanotaura mambo Dzimbarimwe chiso chavo chichiratidza kuti hachina kana mufaro.

*"Abva pano iyezvi achiinda kugota kwake uko regai ndimushevedze abve awuya nayo".*

Nderimwe Jinda raiva parutivi paDzitiro rakadavira richitosimuka. Rinosviko wana Temba achipukuta ziso rembudzi raanga akaiswa mushure mokunge rake rabaiwa nemuseve nerimwe Jinda rainzi Chabhanga achirindumurwa. Chabhanga akaponawo nepaburi retsono ndokutiza haana kuzivikanwa kuti akaindepi, mhuri yake ikasara ichiurawa na mambo Dzimbarimwe. Asi Chabhanga haana kubaya Temba nemaune asi gonga uta rakadambuka hungisho paayitatamura museve uchibva wabuda wega asi waisava nesimba zvavo ndokunanga muziso maTemba,mazuva acho ayinge achiri mudiki Mambo vakaona zvakanaka kuti Temba ayiswe ziso rembudzi Ikozvino anga ava Jaya ravakuda kuroora.

***"Temba kwai namambo tora tsvimbo yangu yemusoro mukuru uwuye nayo kudare".***

Jinda riya rinotaura ndokubva ratotendeuka.

***"Zvakanaka "***

anodavira kamwe chete.

Temba anopukuta ziso rake ndokuridzoserera mugomba maro anosimuka ndokunanga muimba yamambo



ndokutora tsvimbo iya hoyo akananga kudare anosvikirana nemachinda ayinge atevera mukadzi waChadema padare.

*"Mambo wangu, tadzoka asi mukadzi wenhubu iya hatina kumuona kana tsoka zvadzo"*

anotaura Benhure akachonjomara ibvi rakatunga pasi.

***"Kumushaya! Nhai Benhure kushaiwa munhu akazvitakura mangamuri vangani?, Musandigumbura manzwaka ndomuda pano mukadzi iyeye"***

vanotaura vachitambira tsvimbo yavo.

*"Tatarisa pose Mambo wangu, asi chatawana hapana kunze kwe Mhara iyo yatavhiya kuti muwane mate matsva"*

Anotaura Benhure achiombera.

Mambo vanoisa meso avo kunyama yemhara yainge yakanuna isati yagochwa. Vanobva vamedza mate ndokuti.

***"Muchiri kuyeuka zvekare makatadza kubata Chabhanga gore riya paakatushura nevanji wangu ziso nanhasi moti moyo wangu unofara, nhasi matadza uyu zvekare. Ndakunyarai chete mumwe ndaitumbura."***

## **KUPERA KWECHITSAUKO 3**

## CHAPTER 4

---

***"Magomberwa here amai tadi kumboti  
fambei tibude musango rino tozozorora  
kamwe chete"***

anotaura Sarudzai mushure mekunge  
acheuka ndokuona mukadzi waChademana  
amira akabata mabvi-I izvo zvaitaura  
kuneta.

*"Ndaneta mwanangu uye nzara yandibaya,  
simba chairo handisisina asi kuno kwatava  
handifungi vakachasvika ngatimbozorora  
tichitsvakawo chekuisa mumukanwa".*

Vanotaura vachitogara pasi chaipo kwaku  
tambarara makumbo ndokubva maoko ese

adzamba pasi ari kumashure uku dumbu  
ndokuinda mudenga ungati rainge  
rawedzera kukura. Zvino vakatanga  
kufemereka femereka zvakaita kuti  
Sarudzai avanzwire tsitsi, anokakanda  
nhanho pfumbamwe kudzoka pavaiva  
ndokutanga kupuruzvira dumbu ravo iro  
raiva pamhene kamwana kwakunzwikwa  
kupfanhura pfanhura Sauradzai  
anonyemwerera ndokupa tsvodi dumbu  
riya.

***"Kaziva kuti mukadzi wangu andibata  
ndokubva kafara wanzwa here kumaoko  
ako kupfanhura"***

akadero mukadzi.

*"Hakangatadzi kupfanhura kana ndichinge  
ndakabata pamwe kava nenzara regai  
ndidzike pazasi apo nditarise michero  
muwane chekuisa mumukanwa ndanzwa  
muchitaura zvenzara"*

akadero Sarudzai achiri akabata dumbu  
ramai ava.

***"Rega tiinge tose meso awande tikasire  
kuwana chokudya unoti ndinga sara  
pano ndichiitei hangu"***

akadero mukadzi achizama kusimuka.

*"Kwete amai imi zororai uyewo manguri  
machukucha chukucha mwana mudumbu  
zvino avakudawo kumbozorora regai inini  
ndiinde ndinodzoka izvozvi musabva pano"*

*apa sezvo ndichangouya ndakananga  
ziMumvee iri kuitira ndisarasika "*

anotauran Sarudzai achitosimuka asi mukadzi waChademana akamboita nharo kudakuindavose asi Sarudzai akarambisisa dzamara vazomusiya achiinda ega.

Sarudzai akafamba achiinda nedivi rechamhembe iro rainge rakadzikira, akafamba achitarisa michero asi chaakawana hapana zvino akati ava kuzasi zasi ndokucheuka kutarira kwaayinge abva kuya kuMumvee waanga ambotaura ndokuona kuti kana ava kudzokera achamboukwira mukwidza sezvo panhu pacho payiita kunge pachikomo asi chaisava chikomo kwaingova kukwirira kwapo chete.

Akaramba achidzika ndokubva awona mhembwe mbiri dzaiva nechekumberi kwake asi paiva nechinhamwe, mhembwe idzi dzaiita kunge dziri kufura pasi asi zvakamunetsa kuti musango umu maisava nebundo zvino dziri kufurei. Dzaiti dzikaisa musoro pasi dzotarira mudenga kwenguvarefu dzoisa zvakare pasi dzotarira mudenga. Akabva afamba achiinda kwadzaiva uko kwaakati osvika dzikabva dzatanga kumanya kutiza iye kwakuzosvika ndokuona paine mupfura

moyo wake uchibva wanyevenuka kuti  
chikafu achiwana zvino pokuisira ndipo  
pakanetsa saka akabva atanga kudya  
kusvikira paakanzwa dumbu rake kuti rava  
nane ndokuchinonga ekundopa mukadzi  
waChademana.

Akazadza maoko ake kuita kugukuchira  
ndokuchitanga kufamba akananga  
kwaayinge abva nako akaita rombo  
rakanaka kuti ziMumvee riya ayiriona  
sezvo divi rezasi raanga ayinda naro  
kwaisava nemiti yakanyanya kupfumvutira  
zvino akati ari mukufamba kudero  
ndokubva awona uno mukono weshumba  
nevana vaviri dzichibva nezasi  
dzichiindawo divi raayiinda. Hana yake  
yakatanga kukindidza sengoma  
yembakumba pamwe nekuvhunduka,  
kashaiwa kuti oyita sei akambofunga  
kukwira mumuti asi akaona shumba idzi  
dzichinanga nekwaiva kwakagara mukadzi  
waChademana saka akaona zvisingaiti kuti  
ahwande osiya munhu waanga ava kuti  
ndivo amai vake achidiyiwa nechikara. Kuti  
adaidzire achivaudza kuti vakwirewo  
mumuti akaona inzwi rake risingasviki  
vainge vasara kure kwazvo. Akabva atanga  
kufamba zvishoma zvishoma achihwanda  
nemiti ayinge oyinda nerimwe divi kuitira  
asaonekwa asi chaakaita hapana sezvo  
akabva awonekwa. Zvino shumba  
dzakamanya dzouya kwaayiva iye

ndokutanga kutiza akananga kwaayinge  
asiya mukadzi waChademana asi nenyaya  
yemukwidza waivapo uyo  
wakamugombera uye akabva apingwa  
nechimuti ndiye pasi mhere  
ndokuikwetsura yakasvika munzeve  
dzemukadzi waChademana .....

Kuchamhembe kwakadziva muzinda  
waMambo Dzimbarimwe, uko kwaiva  
nemakomo makuru kwazvo necheseri  
kwemakomo aya kwaiva neumwe mambo  
ayinzi Mambo Zvinavashe. Mambo ava  
muzinda wavo waiva pakati nemakomo  
matatu uye kuseri kwerimwe gomo rainge  
rakaita guru racho kwaiva neumwe  
muzinda uyo waiva wamambo Pasihariguti  
asi mizinda miviri iyi yaiva isiri pedyo  
napedyo.

Mambo Zvinavashe vaiva nevana vaviri  
mukomana umwe chete uyo ayinzi Pedzisai  
uye ayinge avawo mujaya ayinge ogonawo  
kushandisa zvombo asi ayinge achiri  
mudiki nemusikana uyo ayiva ayinzi  
Rujeko anova ayinge ava nezuva rimwe  
chete achangozvarwa.

Mambo Zvinavashe ayiva mambo ayiva  
nehupfumi hwakawanda kudarika mamwe  
madzimambo uye panyaya dzekurima  
ndivo zvakare vaizivikanwa iriyo hurudza

huru . Mumuzinda mavo maisaita nzara  
nguva nemisi. Vairima zvirimwa zvavo  
zvichiibva kudarika zvemamwe  
madzimambo. Kutura kwevamwe vaiti  
dunhu ravo ndiro chete rainyanya kunaya  
mvura kana dziri semombe dzaigara  
dzakabereka izvo zvayiitawo kuti mukaka  
ugare uri machakwi mumuzinda. Mombe  
dzavo dzose dzaiwonekwa kukora dzimwe  
kununira mafuta dzichifamba sezvo  
dzaigarowana mafuro manyiro akaringana  
.

Mamwe madzimambo akaita sana  
Dzimbarimwe nana Pasihariguti neamwe  
ayiva akava poteredza ayitouya  
kuzoshuzha zvokudya pamuzinda wavo.  
Hapana mambo akamboda kutsvaka kuti  
mambo Zvinavashe sei vaine hupfumi  
hwakadai uye mvura ichingonaya kudunhu  
kwavo vega kwevamwe kuchizongosvika  
zvipfunha mbuya.

Zvino nekufamba kwayiita makore mambo  
Pasihariguti vakazozvibata kuti mambo  
Zvinavashe vane Nyanga yeChipembereb  
yavakasiirwa nababa vavo inova yaiita  
mabasa ose aya ekuti vave nepfuma  
yakadarika yevamwe. Zvino vakatsvaka  
mazano ekuti vatore Nyanga iyi  
ndokutanga kuita hushamwari naMambo



Zvinavashe kusvika pakunzwanana uye chikafu vainge vava kupihwa mahara kwete zvavayisita kare kuti vachida dura rizere nezviyo vaichinjana nezvipfuyo kana kuuya kuita mabasa ekusakura kana kukohwa vozopihwa zvino pavainge vowirirana dzimwe nguva vaipihwawo pasina muripo.

Vari mukuwirirana kudero vaitsvaka paigara Nyanga iyi asi havana zuva rimwe chete ravakaiwana dzamara zvekuda kutora Nyanga iyi vasiyana nazvo asi machinda avo ose ayiziva nezvenyaya iyi kuti mambo vedu varikuda Nyanga yeChipembere, asi kuti vainde kunoitora ayiva manhenda, kuti vaite hondo vaitya Pfumo ramambo Zvinavashe sezvo vairiziva kuti rinorakasha kuruma senyuchi mumukoko. Zvino nyaya yeNyanga vakabva vasiyana nayo sezvo kuitora vakaikoniwa.

Nyanga yeChipembere yaiva naMambo Zvinavashe vakaita yokusiirwa nababa vavo mazuva avakafa uye baba vavo vainge vari munhu akambotorwa nenjuzu akazodzoswa mushure mekunge paitwa chivanhu chaidikwa. Naizvozvo kudzoka kwavakaita vakazotanga kuita hushamwari nenjuzu inova yakabva yavapa nyanga yeupfumi iyi. Vaiti kana vachida kuti mvura inaye mazuva matatu kana mana

vaidetemba nezvazvo vakabata Nyanga iyi  
paisapera mazuva mashanu mvura isati  
yadzatuka, asi zvazvaizoita yainyanya  
kungonaya mudunhu ravo chete,  
kunedzimwe dzvimbo kwaizongosika  
mhute kana zvipfunha mbuya badzi.

Zvino pakazoti nerimwe gore mvura  
yaramba kunaya, mudenga maisaoneka  
kana gore kwaiswera kuchingopisa mazuva  
ose Mambo Zvinavashe vakati zuva  
rorereka kwakutora mwanakomana wavo  
Pedzisai ndokutora Nyanga yavo iyo  
yaigara munhava yainge yakagadzirwa  
nedehwe reMvu-u ndokuibereka Pedzisai  
ndokutora hari yainge izere doro zvombo  
ndokuisa kumisana kwavo kwakubuda  
mumuzinda vakananga kuchikomo icho  
chainzi Manzerere chinova chaiva neninga  
yavo uye chiricho chaiva chidiki pamakomo  
ose ayinge akavapoteredza. Chinangwa  
chavo vaida kunokumbira kuvadzimu vavo  
k kuti mvura inaye vakabata Nyanga iyi  
sezvavaisingoita kare.

Zvisinei vakasvika kuninga kuya  
ndokunomira pamusiwo peninga vose  
ndokuchonjomara vakabaya pasi nemabvi  
ndokuombera vachiti.

***'Nyashanu we-e tauya isu pwere dzenyu  
kuti ticheme kwamuri. Tinoda kuuya  
mberi kwenyu chaiko misodzi iwire***

***pamuri nekuti....."***

Mambo Zvinavashe vasati vapedza kudetemba musiwu weninga wakabva wati bheu, vanosimuka nanevanji wavo ndokupinda mukati ninga ichibva yavharika Pedzisai ayinge odedera nekuti ndiro raiva zuva rekutanga kupinda muninga, chaedza ndokuti ngwe-e rima ndokutiza. Vanofamba kusvika vasvika kune zvituna zvemadzitateguru avo ndokuchonjomara. Vanoudza vadzimu vavo maererano nekusanaya kwemvura nyanga vaininge vakaibata mumaoko avo vakatora nguva varimo muninga ndokubva vaisa Nyanga iya pamberi pezvitunha zvemadziteteguru avo pamusiro pedombo jena raivemo nechikari chainge chizere nedoro, munonzwikwa kuridzwa mhururu katatu, Zvinavashe akabva anyemwerera achipuruzira musoro waPedzisai uyo akaratidza kuvhunduka. Vanosimuka ndokutendeuka kubuda muninga umo mavakati kubuda siwo richibva ravharika pamwe nekuita rima.

Vachipedza vakabva vadzokera kumuzinda zvino chifumi chamangwana vakatorana zvakare naPedzisai ndokudzokera kuninga uko kwavaida kunotoro Nyanga yavo ndokusvika pachikomo chiya kwakukwira pasina nguva ndokusvika pasiwo reninga

ndokuona Nyanga yavo yava panze zvese  
nehari yedoro ndokufara vachiona doro  
musisina sezvo vakaziva kuti chikumbiro  
chavo chagashirwa zvino vakatora nyanga  
iya ndokuyiisa munhava mayo mambo  
kwakuikochechera mukuro uyu Pedzisai  
kwakuisawo hari iya muneyakewo nhava  
sezvo yaiva hari diki zvavo.

Vakabva vatendeuka kudzokera kumuzinda  
ndokudzika gomo zvino vakati vachangoti  
taramukei negomo iri ndokubva Pedzisai  
awona mhembwe mbiri dzaiva dzakamira  
nechekurudyi kwavo dzichidya zvadzo  
mashizha eminzwa ndokubva amisa baba  
vake.

***"Paita chinyautsa mukanwa baba  
mhembwe idzo miraipo "***

akadero achitoisa museve pauta ndokubva  
agwadama pasi kwakuutepfenyura uyo  
wakasvikobaya mhembwe iya  
yakangosvetuka mudenga ndokuwira pasi  
ndiyo pfanhu pfanhu sarai.

***"Uri hombarume nevanji wangu,  
ndaingonzwa zvichitaurwa zvino nhasi  
ndazvionera pamhino sefodya "***

vakadero mambo ndokubva vaima paiva  
nemhembwe iya zvino Pedzisai akatanga  
kuivhiya sezvo ayisada kuremerwa neimwe  
nyama yaayisada sematumbu nezvimwe

zvemukati zvinoraswa ayida kurasa.

Akatanga kuvhiya baba vake vakamubatira vachiona uye kumuudza mavhiire. mwanakomana akaita basa zvino Pedzisai mukuvhiya kwaayiita akabva azvicheka ruoko rweruboshwe apo pakatanga kubuda ropa akaitarombo rakanaka kuti vaiva pedyo nemususu. Akasvuura gavi rawo ndokusunga painge pachekwa . Mambo zvavanoona mwana azvicheka vakabva vabvisa nhava iya yaiva neNyanga muhuro ndokuiisa panechimwe chimuti yakaremba ndokuchipedzisa ivo kuvhiya nyama iya.

Vachipedza kuvhiya vakabva vasimuka vonanga kumuzinda asi vakakanganwa nhava yavo yaiva neNyanga hanganwa dzavo dzaiva sedze gunguwo . Zvisinei vakasvika kumuzinda ndokugashirwa nyama nemusikana uyo ayishanda mumuzinda panova pamba pamambo sezvo Mambokadzi vaigeza ndokubva mambo vazoina padare paiva nemachinda avo apo pavakasvika pachitaurwa nhaurwa yainakidza sezvo vakasvika machinda achiseka vamwe kuumburuka pasi vachibata mbabvu idzo dzainge dzorwaza nekuseka uye mambo vakangoziva kuti mabasa erimwe jinda iro raidanwa nezita remadunhurirwa rekuti Dari.

Jinda iri raizivikanwa nenyambo pose  
parinenge ringori vanhu vanobvapo  
mbabvu dzorwadza nekuseka

## **KUPERA KWECHITSUKO 4**

## CHAPTER 5

---

Sarudzai anomanya achikwidza makata uku achipfemedzereka mutsipa ndiwo waipota uchicheuka shure kwaiva nezvikara izvi. Kucheuka ikoko kwakaita kuti apingwe nerumuti achibva atatarika mapfura ose ndiye kwakadero waya, iyewo ndiye ndonyo nemuromo mhere achibva ayikwetsura yakavharisa sango rese.

Yakasvika munzeve dzemukadzi waChadenama sezvo ayinge avakusvika paari. Mukadzi waChademana anobva ati nyamwi paanga agere achidedera serutsanga rwuri mumvura ndokupotsera maziso kunyasi kwainge kwabva mhere iyi, vanoshama muromo wavo vachiita kuhuta.

Sarudzai anowumburuka ndokubva amuka, anosumudza nhanho mhatu asi simba rakabva rati ndayenda ini, ayinge aninga gumbo rekurudyi tsoka yake yainge yatarisa kurutivi. Akangomira akatarisa mukadzi waChademana apo ndokubva vatarisana. Anosimudza ruoko rwerudyi achipa chiratidzo chekuti tozoonana. Anoona mukadzi waChademana achiita kunge avakuuya kwaayiva asi akangoshevedzera kuti.

***"Tizai musauya kuno amai, toonana kudenga kana vadzimu vate....."***

Haana kuzopedzisa kutaura Shumba yakabva yamusvetukira ndokubva yanyudza mazino ayo muhuro yaSarudzai ndokukwaura ropa ndiye dzatu senhongo yabaiwa. Sarudzai akaramba akangosimudza ruoko rwakazoita zveku gurwa neshumba, zvikara zvainge zvotapirirwa nenyama isina makushe.

Mukadzi waChademana anoyeredza misodzi yake ndokutendeuka onanga



nekumavirira achimanya, asi kwaingovawo kuzvishingisa nekuti nzara yainge yafunya chisero mudumbu mavo. Zuva rainge ragara miti shiri dzainge dzotanga kuimba ndire ndire kuti dzichizoinda kumatendere adzo. Rakasvika pakuvira vachingofamba musango. Vanoti vavakure vanokwira mune chimwe chikomo kusvika pamhanza pacho vanoinda pakati pematombo ndokurara ipapo. Hope hadzina kuuya vakatora nguva refu pfungwa dzavo ndidzo dzaivhiringidzika nekuda kwekurasikirwa naSarudzai. Sezvo hope dzisina mugoni dzinovanyangira ndokubva varara.

Padzainge dzotanga kunaka vano peputswa nemvura yainge yonaya denga rainge rasunama, kwainge kwava nedehwe mukwindi werima zvokuti ukaisa chanza mberi kwako waisachiona. Vanowedzera kuti kwati kwati nezimbwe raivepo. Yakazogasa hweva yavakubuda mai Chadenama ndokuchivatawo, ndokuzopeputswa nezuva rainge ropisa huma yavo. Vanomuka kwakugara dzungu rikabva rati tsvete mumaziso avo. Vanobatira matombo ndokumira vanoringa mativi ose anoita mahwekwe ndenzviru makomo dzainge dzakaita kurembera muti wese. Vanodya kusvika dumbu rati tashu ndokumwa mvura yainge yakanjenga mumakuvi. Vanotura befu ndokubva

vadzika gomo.

Zuva rainge rati kwirei zvishoma,  
vanopinda nepakati pezvikomo zvaivapo,  
vanofamba nepamupata uyoyo vaingoona  
ndove yemhuka dzavasingazive. Hana yavo  
inotanga kuvaudza kuti nzvimbo yavari  
haina kunaka vhudzi ndokubva rati  
nyangarara kumira semunzwa yenungu.

Vachingopedza mupata uyu, vanoona  
rimwe zimuka rinenge gudo asi risiri  
rainge rakashama muromo waro hwasha  
hwaro hwainge wakatsvuka semhiripiri  
kunyangwe meso aro. Rakangosvekuta  
kubva padombo paraiva ndokunanga  
mukadzi waChadema. Iyewo achiona  
mhuka iyi simba rakabva rapera mabvi  
ndokutanga kudedera ndiyegwadagwa  
pasi, achirovera nedumbu pasi ropa  
rakabva ratanga kubuda nezasi supa rainge  
ratoputika.

***"Vadzimu vangu ndaida kuti mhodzi  
yandiinayo iwonewo zuva asi zvakona  
N'anga murapwa achida, rwedzo  
rwangu rwabva rwagurwa negurwe"***

Ndiwo mashoko akataurwa namai ava  
vachibva vatsunzunya, zimhuka riya  
rakasvikotsika musoro wemukadzi uyu,  
ndokushama muromo waro richibuda

masiriri parainge roda kuti richibvajure mukadzi uyu rinoyerekana ranzi tibvu nemuseve mumukanwa imomo, umwe unosvikobaya muhuro umwe ndokubaya mudumbu yose yaibudira neseri. Rakabva rati rimbinyu pasi ndiye sarai.

Mukadzi uyu ayinge ava kugomera zvinopisa tsitsi...

Imwe hwitakwi yerume inosvika ichimanya yakabata museve, chiso chake chairatidza kuti makore famba asi nekuda kwekudya achiguta waisazviona. Anosvika paiva parere mukadzi waChadema ndokusvikogwadama kwakumusumudza, rime riya rinonanga nedivi remavirira asi raicheuka cheuka zvairatidza kuti nzvimbo iyi haina kunaka. Rinofamba chinhabwe ndokusvika paiva nezimushavhi raiva nebvute raitonhorera.

***"Muri kuinda kupi muchibvepi uye sei mafamba musango rine zvikara kudai chii".***

Anotaura Murume uya akatarisa mukadzi uyu, asi anozoona nezvipfeko ndokubva atoziva kwainge kwabva mukadzi uyu.

***"Ndakurirwa gashirai mwana wangu abude".***

Anotaura mukadzi uyu, murume uya akambotadza kunzwa nekuti mukadzi uyu

ayinge ava kutaurira pasi pasi. Anoyedza kugomera asi simba akarishaiwa. Murume uya anoyedza kupinza zvigumwe zvake mumuromo nemukadzi uyu kuti agomere asi zvaiva zviroto manyautsa mukanwa harahwa kurota ichiyamwa.

Mai Chademana vainge vangoti rapata vavakufemera kure kure.

Murume uya achiona izvi akabva atora mumwe museve wake ndokucheka dumbu remukadzi uyu ndokubva abudisa mwana, iko kanobva kati mhere turii....

Anokaputira nedehwe remhembwe raanga ayinaro raitova nyoro.

Apedza kudero anovhara paya paanga acheka kuti mhopo isapinda.

***"Ndiratidzeiwo mwana wangu ndimuone ndavakutungamira mosara naye zvakanaka pangu ndasakura ndikazunza chiregai kundisona, torai chuma chirimuruoko mangu mozopa mwana iyeye kana akura ndinoziva kuti mukomana momupa zita rokuti Jemedza "***

anotaura mukadzi uya achibinyauka.

***"Ndinonzi Chabhanga "***

anotaura murume uya achisimudza  
mwana uya ndokutambidza mai vacho  
vachibva vamubata ndokunyemwerera asi  
vachibudisa mudzodzi yekutambudzika  
ndiye zi-I vakadero .....

***"Toro tora chiropa ugoche zvako zviya,  
ndinoda kusumuka nacho iyezvi newe  
ndine mashoko akakosha kwazvo "***

vanotaura Mambo Dzimbarimwe rute  
ruchidonha.

***"Toro anotora chiropa neumwe  
mushuna,"***

anoteta mazimbe ndokutsveta ipapo  
inotanga kubuda mafuta achidzima  
mazimbe anoshandura katatu kechina  
mambo vanobva vati yaibva chibura.  
Inoiswa pamashizha ndokuisumudza  
ichipisa kudero vanotungamidzana  
vakananga muimba yehumambo.

Vanogara pazvituro zvaivemo Dzitiro  
anoshevedzwavo ndokuuya pamwe na  
Temba kureva kuti vainge vavavashanu.

***"Dzorera! musiwu mashoko asanzwika  
memadziro".***

Vanotaura mambo.

Munomboita runyararo kwechinguva  
hapana ayidya sezvo yaipisa.

*"Machinda angu musaona ndakushevedzai kudai pane nhau hombe yandakasiirwa nababa vangu pavakafa paya mwedzi wapera, saka ndanga ndichimirira kuti vaputike ndozotaura nhau yacho".*

Vanotaura ndokumbogura kanhindi kechiropa ndokupotsera mumukanwa. Vanozosimudzira mushure mokunge vamedza.

***"Munoona nzara yasakiswa nekusanaya kwemvura yavakuda kupinda muno mudunhu inotipedza kana zvipfuwo zvedu zvingapera. Baba vangu vakasiya vandiudza kuti ini pano ndinofanirwa kuinda kuna Toropito N'anga iri seri kwaMudzamiri uko indipe masimba akawanda kwazvo zvekuti ndinokwanisa kunaisa mvura ndomene. Uye tinofanirwa kutsvaka kunenyanzwa yeChipembere yaitaurwa nababa vangu vachiri vapenyu tikava nayo ufumi muno hatihupedzi kana imi ndinokugurirai kwekutonga muri vaviri Dzitiro newe Toro, munozviona zvakadii?"***

Vanotaura mambo Dzimbarimwe.

*"Zvirimunzeve changamire iroro idama ndosaka tiripo kwaToropito kwacho dayi zvaibvira kana nhasi chaiye handei nekuti*

*tirikumashure nenguva".*

Anotaura Toro Jinda guru ravo. Dzitiro chaakangoita kugutsirira badzai uku achitsenga.

***"Nhasi hazviite uko kunoda kuindwa mwedzi uchangogara, asi ndovimba kuti svondo rino unogara nekuti wavakubuda kwavakuyedza".***

Vanotaura mambo Dzimbarimwe.

***"Chimwe chandanga ndichida kukuudzai tava kuda kuchinja matongerero zviya zvaiitwa nababa ndasiya pasi imbwa ikanongera maona zvandakaita Chademana ndokutonga kwangu ikoko. Imi semachinda angu ndimi ziso rangu, imwe nhau ndeyekuti mwana wangu munooni kuti ibofu haranga dzirikumuramba zvava pano iye achasarudza waanoda ndiye waachatora".***

Vanotaura Mambo vakaringa nevanji wavo achibva agutsirira musoro.

***"Pane angaramba mambo here hakuna zvakadero mangwana chaiye tichaunganidza mhandara dzose osarudza waanoda zvitete izvo"***

anotaura Dzitiro paakangonyarara pamusiwo pandobva pagugudzwa vose ndokutarisana Temba anosimuka kundovhura musiwo anoona varimai

Chengeto.

***'Tti kuna mambo vagosvika kusasa  
kwangu kana vapedza nhaurwa dzavo".***

Vanotaura mai Chengeto .....

**KUPERA KWECHITSAUKO 5**



## CHAPTER 6

---

***"Takawira pane makunguwo apo  
hapana mvura here pachaware icho  
nyota nyota yandiya"***

rinodaro rimwe jinda rainzi Tozvipei.

*"Chero neni nyota yandikurira tichiri  
kumashure pachikomo chiya  
chawandiratidza Monga asi ndati pamwe*

*tinogona kuzongosanganawo nayo "*

akadero Takawira.

***"Kungoti ukatumwa namambo hapana marambiro asi ini kwatiri kuinda handinyatsi kukuziva zvinoda vana Gwinyai ndivo vajaira basa rekusora mizinda izvi hameno kuti vamboregerei kuvatuma uye ndivo vanonyatsoziva nzvimbo yacho "***

akadero Tizvipei.

*"Gwinyai ndakanzwa kuti akarumwa nenyoka mazuva apfuura ayo handifungi kana akapora ini "*

akadero Takawira.

***"Ndaiva naye nezuro chaiye akapora uyo ayitoti ava nemazuva maviri apora "***

Ayitaura machinda aya achiinda paiva nemakunguwo aya. Pavakasvika Tozvipei anoshatirwa kuona pasina mvura asi yainge yambonyepedzera kudonda donha manheru ayinge apfuura. Zvino vakabva vazoindirira mberi nerwendo rwavo asi vakati vachangobva paruware urwu ndokuona makava maviri ayiva pasi peumwe muti

***"Unodya gava here ndikuuraire "***

anotaura Tozvipei achibata mumwe wake kuti amire,

*"Rwendo rwunenge rwakurwadza Tozvipei*

wakamboona pose pandainovhima  
ndichiuya negava here, chingoripfura hako  
ndimborionawo sezvo handisati  
ndamboriona ndiri pedyo, asi ndikaona  
rakanuna ndinodya ndosara zvemukati "

akadero Takawira.

Tozvipei anoutatamura museve uyo  
wakasvikoti tibvu mumusoro merainge  
rakaita guru racho iro rakasvetuka  
mudenga ndokuti rimbinyu pasi pfanhu  
pfanhu ziii rakadero.

**'Ndangandichiti uchaposha  
ndimbokuseka chisionekwi mimba yego  
inonaya nhasi iwe kubaya "**

anotaura Takawira achiratidza kufara  
zvake,

*'Ndasiyana newe Takawira, ini ndinowisa  
mukono weshumba kwete zvikava izvi "*

**"Gudo ranonga roro nhasi ".**

Vaitaura vachiinda painge paine gava riya  
vakaona kuti ranga richitodya dehwe  
remhembwe yaitaridza kuti yava nemazuva  
angangoita matatu kana mana yaurawa  
sezvo rainge robudisa gwema sechidembo.

Takawira akatanga kun'anan'idza gava riya  
sezvo ayinge asati akambosvika pedyo naro  
zvino akazonzwa Tozvipei odzanha dzana

pasi, achibva akacheuka ndokuona akabata  
nyava yainge yakagadzirwa nedehwe  
remvu-u iyo yainge yakanaka  
zvemandorokwati,

***"Tozvipei waiwanepi nhava iyi"***

akadero Takawira ndokubva anongedzera  
panechimwe chimuti payainge  
yakakochekerwa.

***"Wawana nhava yakanaka wamboiwona  
sei idonditambidza tione"***

akadero Takawira achitambanudza ruoko  
ndokubva agashidzwa ndokutanga  
kuin'anan'idza sezvo yanga yakanaka  
zvayo nhava iyi zvino akazovhura mukati  
umo maakabva awona muine Nyanga  
yeChipembere.

***"Haisiyo Nyanga yaidikwa naMambo  
vedu hereiyi"***

akadero Tozvipei achinyemwerera.

***"Tenge ndiyo iyi ngatitodzokera kumuzinda  
tinovabvunza uye tinengewo tatorega  
kuinda kunosora sezvo ini hangu  
handizvigoni izvi unoonekwa ukaurairwa  
mahara"***

akadero Takawira.

***"Apa wataura shamwari ukaona ikaita  
Nyanga yavaida tinogona kana  
kupihwawo kana budzi mbiri mbiri,  
ngatitodzokera"***

akadero Tozvipei ndokubva machinda maviri aya atendeuka kudzokera kumuzinda kwavo uye nhava yainge yakabatwa nemuridzi nyakuona Tozvipei.

Panguva iyi zuva rainge rorova nhongonya uye kunze kwairatiradza kuti kunogona kungonaya. Machira edenga ayimanyirana ayinge akasviba kunge tsito repahadyana yagadzwa pachoto kwemazuva maviri isati yaburwa.

Akafamba machinda uku mhupo yainge yoita kunge nguva yaNyamavhuvhu asi izvo vaiva mumwedzi wekutanga wegore pasina nguva denga rakakaruka ratsamwa vana Takawira pavakange voda kusvika pachikomo chiya chavainge vamboona monga, yakakaruka yadzatuka mvura ndokucheuka kwavaibva kwakuona kuchiuya imwe yairatidza kuti chinenge yakasangana ne chimvura mambwe. Zvisinei yakasvika iyo yavakabva vaziva kuti ine chimvura mambwe sezvo chainzwika kurira pamuviri pavo kuita kunge munhu arikutemwa neshumha mbishi.

Vakashaiwa pokuvanda vaviri ava sezvo kuchikomo vaine vasati vasvika zvino nekuda kwemhupo yaivako uye nechimvura mambwe ichi vakatya kubatwa nechadzimira izvo zvakaita kuti varege

kuramba vachifamba sezvo mhute yainge  
yatitsvete ukumvura ichinaya zvakare.

Vakaonawo umwe muti wainge  
wakapfumvutira ndokumanya vachiindako.  
Vakasviko kutukutira ndokumira pasi pawo  
vanonginzwa kuti kwarakwashu vose  
ndokukanda meso ikoko vanoona  
pachibvawo iwe mhuka yavasina  
kunyatsoona kuti imhuka rudziyi.  
Yakambovavhundusa asi vakazoteramira  
havo ndokubva vaticwati kwati uku  
vakambundirana kutsvaka kudzirwa asi  
hazvina kutadzisa mvura kuanaya chero  
hazvo yainge yoitawo ichibatwa  
nemashizha emuti.

Vakanaiwa kusvika zuva rivire uye yaitoita  
kunge iri kuwedzera kunaya kwacho.  
Vakatozoonza nedima rainge rowedzera kuti  
zvaireva kuti zuva rapinda muna mai varo,  
asi mvura haina kuvara yakaramba  
ichinaya husiku hwese dzamara kwaidza  
apo payakamboita kunge yaserera yoita  
zvifunha mbuya chete.

Tozvipei naTakawira vakabva  
varwusimudzira asi chando chainge  
chovabvunza mutupo icho chainge  
chapinda nemumabhonzoro. Zvisinei sevanhu  
vainge vasimuka rungwanani  
vakazosvikawo paitangira dunhu ravo zuva  
richitanga kurova nhongonya.  
Vakashamisika kuona mvura yakangoita

madonhwe madonhwe imvu richitoratidza  
kuti rakawoma izvo guruva richipfumbuka  
zvaidudzira kuti mvura yainge isina  
kutonaya zvinemazvo kudunhu kwavo.

Vakazofamba havo kwakusvika kumuzinda  
zuva rarereka apo pavakasvika mambo  
vakagara mudare nemamwe machinda  
kusanganisira Jinda ravo guru iro rainzi  
Gwinyai rinova rainge rakamborumwa  
nenyoka asi mazuva aya rainge rapora  
zvaro.

***"Vemumasango tigashire, manga  
matopedza here kusora muzinda  
waDzimbarwimwe nemukuriro  
wawakaita uye kwaDzimbarimwe  
mungadai izvozvi muchisvika sezvo  
kunoda mazuva maviri kuti  
musvikeikoko zvino imi maitasei  
mafamba nemumhepo here "***

akadero Gwinyai.

*"Gwinyai pano pava nemhepo yawanda  
pamwe mvura yamisa apo inogoba  
kusvikawo kuno nhasi handei kuimba yangu  
yematare tinonzwa mufambiro wavaita "*

vakadero mambo Pasihariguti  
vachitosimuka pavainge vakagara  
ndokunanga kuimba yavo ndokubvawo  
vana Takawira vatevera pamwe chete  
naGwinyai uyo ayiva kumashure kwavo

vose akabata tsvimbo ine musoro mukuru  
sewechana.

***"Nhava iyi waiwanepi Tozvipei"***

akadero Gwinyai sezvo ndiye ayiva  
kumashure,

*"Ndaigira mambo regai titange tagara pasi  
sezvo pane nhoroondo huru kwazvo"*

akadero Tozvipei ndokubva vasvikawo  
paimba yavaida kupinda izvo zvakadzima  
nhaurwa dzavo ndokubva vapinda umwe  
neumwe ndokugara pachidaro uye ndiyo  
nguva yakaona mambo nhava yaiva  
naTozvipei iyo yakavatora moyo nekuda  
kwerwunako rwayo.

***"Nzeve taisa kwamuri taurai tinzwe  
mufambire wamaita"***

akadero Gwinyai,

*"Changamire wangu hatina kuzokwanisa  
kusvika kwamanga matituma mushure  
mekunge taona Nyanga yamakambotaura  
nezvayo yeChipembere hameno kuti ndiyo  
here"*

akadero Tozvipei achibudisa Nyanga iya  
munhava iyo yaakatambidza muruoko  
rwaMambo avo vakabva vangonyemwerera  
kamwe chete v vakatarisa chiso chejinda  
ravo Gwinyai vachinanzvira muromo.



Chabhanga akazoita zvekumanya kubata kamwana ako kainge karegedzwa naamai vacho sezvo vainge vatevera Sarudzai pamwechete nemurume wavo kumaziva ndadzoka kwamupfiganembwe. Izvo zvakarovesa hana yaChabhanga kuti zvino rusvava urwu ndoruchengeta sei amai vacho zvavafa uye iye ayinge ava hariyofanzirofa ayinge atikure. Zvisinei akazobviswa mundangariro nemwana ayinge ochema uyo ayinge apihwa zita rekoti Jemedza zvino akatanga kumusvuvudzira dzamara kamwana kavata.

Akabva akaradzika pamusoro perimwe dombo ndokuvhomora bvumo rake kwakuinda pasi peumwe muti uyo waiva pakati pematombo awo ayinge akaita mahwendefa kwakutanga kuchera pakati pematombo dzamara pavakukwana munhu kuti agare akanyura mugomba iri iro raingova nematombo divi nedivi ndokubva atora Mai vaJemedza ndokuvaita zvekuvagadzika mugomba iri vakazembera muti kwakutanga kunonga mamwe matombo awo avakatanga kuturikidzanisa uye pamusoro paçho akabva apavhara neimwe hwendefa yaakanonga kudombo raayinge aradzikwa Jemedza . Ndiro rakava guva remukadzi waChademana.

Chabhangha achipedza kuviga mukadzi uyu akandотора Jemedza kwakutora zvakare nyama yaayinge abata ndokutanga kufamba akananga kubako rake iro raiva chinhamwe kubva apa. Akafamba zvino akati ari mukufamba kudero ndokuona muchakata wainge wakaibva ndokubva anonga chakata dziya kwakuzadza nhava yake ndokuzopfuurira mberi kwakuzonosvika kubako rake zuva rarereka.

Akadzisa chisvava chake kwakuchiradzika pakanaka ndokubva avesa moto wake kwakutora chakata dziya ndokudziisa munechimwe chitsiga chaayinge akaboora pakati paçho asi kwete kubudikidza seri bodo. Adero akabva atora rimwe danda ndokutanga kutswa achiisa mvura kusvika painge pava kutapira mvura iya kwakuzorega ndokuyiisa munechimwe chikari kwakuisa pamoto pasina nguva zvakatanga kufazha ndokubva abura sezvo ayingoda kuti zvidziye.

Akamirira kusvika zvapora kwakupinda maiva nekamwana umo maakasvika kakasvinura kachisvisvina zvigunwe ndokubva azotanga kukapa mvura iya iyo yainge yaita kunge mapwa kukora kwayo, hakana kumbonetsa kakadya kusvika kapedza ndokubva kavata.

## **KUPERA KWECHITSUKO 6**

## CHAPTER 7

---

Mambo Zvinavashe vakasviko nanga kudare asi Pedzisai haana kunanga kudare anonanga kuimba yamai vake nenyama yaayiva navo, anosvikirana na mai vake vachibva kunogeza, vanosvikatora mwana wavo ayichema ndokutanga kukasvusvudzira kacheche kavo vagere pachinja pechoto.

***"Vadzimba mhofu maita maita "***

vanouchira mai vake vakatarisa jaya ravo.

*"Muchigashireiko amai mowanawo mate matsva, ko vaChihera varikuchemeiko asi mavatsunya kani "*

anotaura Pedzisai akachonjomara ndokubata matama ekamwana kachibva

kanyarara ndokubva kanyemwerera zita kainzi Yemurai.

***"Mhamha uyu haangotorwi pasina muripo mumwe ndinonyika pfumo mirai muone".***

Anotaura Pedzisai akatarisa Yemurai hanzvadzi yake achibva akapatsvodi ndokusimuka kwakugara pachituro achake.

*"Ko baba vako wavasiyepi zvawangouya iwe chete"*

vakotaura mai vake.

***"Vananga padare pavo ini ndatouya kuzodya munya wangu wandakasiya madeko".***

*"Murume haadyi munya Pedzisai, ndatoudya ini kuti ndiwane mukaka waYemurai wozodya pfuma yake sezvawataura handitika"*

vanotaura mai vake vachinyemwerera.

***"Dai machingondisiira dakataka chete nekanhindi kamwe, regai ndigoche chiropa ichi chimwe ndosiira baba"***

anotaura achitosimuka ndokugocha achibva adya.

*"Ndaguta amai ndichamboinda kuna Runesu"*

anotaura achitobuda.

Dari ayitaura nyambo agere padare

nemamwe machinda. Vaigashidzana mukombe wehwahwa. Machinda aya anobva amutsa mambo wavo sezvo vainge vasati vamboonana kubva makuseni. Dari anosimuka ndokuchera mukombe wehwahwa achibva atambidza mambo Zvinavashe.

Nekuda kwenyota yainge yavabaya vakangotambira ndokuukutura,

***"Murume haarohwi netsvimbo imwe pamha zvekare"***

vanotaura mambo vachinanzvira muromo wavo. Dari anochera mamwe zvakare ndokuvatambidza vanokutura zvekare ndokutambidza Dari mukombe wake.

*"Nyota yanga yakubayai mhukahuru mutunhu une mago".*

Anotaura Dari achidzokera pachituro chake.

***"Kwandabva kure, zuva racho ramukira kuvanga inogona kuturuka nhasi"***

vanotaura mambo Zvinavashe vakazembera chigaro chavo.

*"Tyo yava nenguva hapana angairamba, ndiyo ingotokodza nzungu nenyimo".*

Rinodavira rimwe jinda.

Hwahwa hwakamwiwa huchibva hwagara  
mumusoro mamambo Zvinavashe  
nemamwe machinda, sadza chairo Havana  
kutozoridya vainge varara muimba mavo.  
Denga rakabva rasumana mvura ichibva  
yadzatuka kusvika ripinde muna maivaro.

Pakanaya mvura Pedzisai anga ari mugota  
ma Runesu shamwari yake, vainge vakarara  
vakatarisa mudenga asi vakanyararidzana.

***"Vadzimu vatinzwa, saka Nyanga iya  
yakakosha ndazviona "***

anotaura ega Pedzisai nechemumoyo make  
zvisina kunzwikwa na Runesu.

***"Runesu ndiri kudzoka ndichambonoona  
mambo ndine mashoko navo "***

anotaura achitosimuka.

***"Unozoinda yagasa, unogona kurohwa  
nemhemi Pedzisai."***

***"Nditoriwo mheni ini "***

anovhura musiwo ndokubva abuda  
achimanya akananga kuimba kwababa  
vake, anosvikorova gonhi ndiye bheu  
machinda ayiva akarinda musiwo haana  
chavakataura sezvo vakaona ari Nevanji  
wamambo. Anowana baba vake vakarara  
vachitofozoza ngonono.

***"Baba.... Baba mukai ndini Pedzisai "***

anotaura achigara pasi pajinga navo.

*"Imvura irikunaya here yandirikunzwa iyo"*  
vanobvunza mambo.

***"Hongu baba".***

Anodavira Pedzisai.

*"Nditambidze nyanga iya ndipedzise  
chikaranga chacho ndizokuudza kuti  
nyanga iyi yakakoshei".*

Vanotaura mambo.

***"Ndimi manga muinayo paya, maiisa  
papi ndikutambidzei".***

Mambo vanobva vanyarara vakavhura  
wavo muromo uye vakatarisa panzvimbo  
imwe doro raiva mumusoro rakabva rapera  
rose.

***"Mwanangu nyanga yasara pagwenzi  
reMuswati patavhiira mhwembe iya  
ndakoshiwa kuzoitira pandapedza  
kuiivhiya***

***Ngatitosimuka izvezvi tinoitora  
zvakanwanda touya totaura nekuti ndiyo  
yakabata muzinda uno"***

vanotaura mambo vachitosimuka asi  
vairatidza kuti pfunga dzavo hadzichasi  
panzvimbo.

*"Tadii kuzoinda yavara baba izvezvi  
zvinoita here uye kwavira mwedzi hakuna".*

***"Mwanangu hana yangu haina***



***kugadzikana hande "***

Mambo vanotora pfumo ravo nekutora museve mishanu kwakutambidza Pedzisai ndiye dhugu vakatungamidzana, machinda maviri ayinge akavarinda pamusuwo akapiwa chiratidzo chekuti sarai naizvozvo ndokusara.

Vanofamba pasina ayitaura nemumwe kusvika vasvika pavavhiira mhembe iya, mambo vakabva vananga pagwenzi riya asi vakawana ririgwenzi chete nhava ikati wakandisiya rini pano.

***"Mwanangu nyanga haipo yakanga iri apa "***

vanotaura vachitsvanzvadzira asi havana chavakawana kwaiva kutsvaka tsono mujecha.....

Kurara kwakaita Jemedza, Chabhanga anotora chimukuya chake ndokudya akazembera dombo rebako rake. Pfungwa dzake dzainge dzopishana kuti chii chainge chafambisa mukadzi uyu kubva kumuzinda kwaDzimbarimwe.

'Dzimbarimwe ndomuziva ini asi zvandichaita mangwana chaiye ndofanirwa

kuindako ndonobata mukomana mumwe  
wemombe anondiudza chete chakatora  
nzvimbo, Jemedza anonge adonha  
rukuvhute ndomuisa mutswanda umu  
kanokwana ndozviziva ndochidzoka,  
kuitira mangwana Jemedza anoda kuzoziva  
chakadya Mai vake ‘.

Anotaurira mumoyo ndokubva asimuka,  
anotora museve yake gumi nemishanu  
ndokuitsveta mudati mayo, apedza anotora  
nhaya yake ndokubuda mubako umu  
anoinda pamutamba ndokunonga  
matamba kusvika nhava yazara  
ndokudzoka mubako make maiva na  
Jezedza. Anoputsa matamba aya achisvinira  
muto wematamba imomo kusvika wazara  
ndokubva avhara dende riya nemuti.  
Apedza anotora miseve yake ndokubereka  
anosumudza Jemudza ndokumuisa  
mutswanda anotora bakatwa rake achibva  
atobuda mubako make ndokunanga  
kumuzinda kwaDzimbarimwe, ayida  
kusvikako mangwana nguva dzekuvhura  
mombe.

Akavata achifamba haana kumbozorora.

Zuva rakazobuda ava murwizi Mungezi  
munova imo munomwira mombe  
dzamambo Dzimbarimwe.

Anobva ananga pamuonde waiva mujinga merwizi ndokugara zvake pasi pawo akauzembera, hope dzakabva dzatanga kumunyangira semunhu akavata achifamba, ndiyo nguva yakamuka Jemedza nzara inenge yainge yamubata. Chabhanga anobva asvinura ndokubudisa Jemedza mutswanda achibva atora dende rake riya ndokumwisa Jemedza muto wematamba kusvika kaguta anovhara dende riya ndokuriisa munhava make. Chabhanga anoramba akatarisa Jemedza misodzi yake ichibva yabuda ndokudonhera kumeso kwa Jemedza.

***"Unherera humambo Jemedza ndovimba  
kuti nerimwe gore uchamuka  
chibhebhenenge senyanga  
yeChipembere"***

anobva apukuta misodzi yake. Anogara kusvika zuva rorova nhongonya ndipo paakazonzwa muchema kwembudzi dzayiuya kuzomwa mvura akabva aziva kuti vakomana vemombe vakuuya. Anobva asimuka ndokuisa Jemedza mutswanda ndokubudisa chimwe chitehwe chaiva munhava make anochisungirira kumeso kwake chainge chakaboorwa kusiya pemaziso nemhino pamwe nemuromo anobva aturika tswanda iya mumuonde uya ndokutora museve yake kwakunyangira

vakoma vemombe vaitoita ruzha.

***"Handiti kutanga kudzora mombe, ndoda kupedzisira"***

*"Tonongesana mazhizha anonga  
rakarumwa ndiye anodzora, kana kuita  
chipakirwa"*

anotaura mumwe wevafudzi.

Chabhanga anoti kwati kwati negwenzi  
reMukweshameno. Vakomana ava vaiva  
vashanu vose vanobvisa nhembe  
ndokumanyira murwizi vanotanga  
kudhidha vachishambira. Chabhanga  
anosumuka ndokunanga kume mombe  
anodzitunha dzichibva dzateererawo.

***"Muto hona mombe dzakuinda ndiwe  
urikutanga"***

anodaviridza mumwe wevafudzi.

*"Regai hangu ini nditange dzichipadhuze  
idzi"*

chimwe chikomana chinoratidza kuti  
ndine makore gumi nematatu chinotaura  
chichibuda mudziva ndokutora shamhu  
yainge yakarukwa nemakavi emupfuti  
hakana kupfeka kakainda kakashama  
kudero. Chabhanga akabva ati dzawira  
mutswanda akamanya mberi kwaiinda  
mombe ndokunovanda mugwenzi

remuroro. Nenguva isipi chikomana  
chichibva chati pfacha ndokutenesa mombe  
kaidzirova kwazvo kanopfuura bepagwezvi  
riya pakainge koda kupfuura ndiye mba-a  
ndokuvharwa muromo.

**"Nyarara kuti zi-I ukangotadza  
kupindura zvandichakubvunza  
ndinokucheka vana vako ava  
vakaremba"**

anotaura Chabhanga akabaya sikarudzi  
yechikomana ichi nebakatwa raayiva naro.

*"Mambo Dzimbarimwe variko here"*

anobvunza Chabhanga.

**"Hongu".**

Ndiudze kuti kuserwa zuro kana kuswera  
zuro wacho chii chakaitika mumuzinda  
menyu iti daku daku uyende kumombe  
dzako.

**"Mambo vakauraya Chademana,  
ndokuzoda kuuraya mukadzi wake  
zvekare asi akashaikwa hameno  
kwaakainda pamwe akatodyiwa  
nezvikara nekuti ayiva nepamuviri."**

*"Chademana akaurairwei?"*

**"Akaramba kutsemura huni dzemukadzi  
wamambo vanonzi mai Chengeto**

***ndokuzoda kuita bonde naye  
ndozvaakaurairwa izvozvo".***

*"Ho-o ndizvo chete zvandirikuda. Iwe uri  
mwana wani".*

Anobvunza Chabhanga.

***"Ndiri mwana waDzitiro jinda ramambo,  
ini ndinonzi....."***

*"Nyarara hako zita rako wonoudza baba  
vako kuti vagare vakaringa nzira Jemedza  
achauya iwe ndoda kukunyora pachidya  
ukati bufu ndokuuraya nebakatwa iri".*

Anotaura achirisumudza ndokutora  
museve kwakunyora pachidya  
chemukomana uyu akaita kutara  
dendenedzwa ndokuisa mufananidza  
webakatwa achipedza ndokuti.

***"Wonoratidza baba vako chimboramba  
wakamira pano kusvika ndapota seri uko  
ukafamba ndokubaya nemuseve."***

Chabhanga anobva asimuka ndokunanga  
kurwizi ndokunotora twanda yake hoyo  
tande akananga kumavirira achiita  
kukanda nhanho.

Zuva rakazosvika pakupinda munamai varo  
agura matunhu akanana kubako kwake, asi  
akatozosvika kwavakutoyedza. Jemedza  
haana kutomboti chwa hopo pase apa,

ayiva akasvinura. Achisvika kubako kwake  
anovesa moto ndokudziisa muto  
wematamba uya ndokuisa mvura pamwe  
nemudzi wemupangara munyoro, zvakabva  
zvavhira ndokuzomimina achibvisa midzi  
iya ndokuzopa Jemedza. Achipedza  
kukamwisa anotora rimwe dende raiva  
nemvura yepamapopoto ndokuyiisa  
muhari anotora museve uya  
waakashandisa kunyoresa kwana  
waDzitiro kwakuuyisa muhari kunobaya  
ndiko kwaiva mukati mehari. Inovira  
ndokubva awubudisa ndokubura mvura iya  
anoitimudza neimwe yaiva munerimwe  
dende yaiya yemuchitubu chenhokore  
kwakugezesa Jemedza nayo mvura iyoyo.  
Achipedza Jemedza akabva arara naiyewo  
Chabhanga akabva ararawo.

Mazuva haana kumira kupindana Jemedza  
achikurawo zvaidadisa asi ayingorarama  
nematamba nechakata, nemuto yenyama  
dzemhuka dzakasiyana siyana kusvika ava  
kandumurwa .....





## CHAPTER 8

---

Gwinyai paakaona Nyanga yakabudiswa naTozvipei achigashidzwa mambo, akabva asimuka paayinge akagara ndokuinda paiva namambo anosviko kuchonjomara akabaira ibvi pasi ndokubva atambidzwa Nyanga iya. Akainan'an'idza kwakubva asimudza chiso kutarira mambo wake.

***"Vadzimu vatinzwa mambo ndiyo chaiyo  
Nyanga yeChipembere yekwamambo  
Zvinavashe"***

akadero Gwinyai achiitambidza kunamambo.

Gwinyai ayinge akambogara kumuzinda kwaMambo Zvinavashe uko kwainge kwakaroowa munin'ina waamai vake mushure mekunge vabereki vake vose vatorwa nepasi kuinda kwamupfiganembwe. Mazuva akapinda chimwe chirwere chisina kuziikanwa kuti chirwere rudzii, chakapedza ruzhinji mumuzinda uyu uye ndipo pakafira baba

vamambo Pasihariguti zvinova zvakavapa  
kuti vazotumidza muzinda wavo kuti  
Pasihariguti sezvo mazuva aya pakasara  
vana chete vamwe vose vakainda pasi asi  
chirwere ichi chakabva chauya kupedzwa  
nababa vaMambo Zvinavashe avo  
vakashandisa Nyanga yavo kuparadza  
chirwere ichi asi pavakazodzokerawo  
kumuzinda kwavo havana kunoita mazuva  
mashanu ndokuurawawo nechirwere  
ichochi asi hachina kunge chazopindawo  
kuvanhu vavo.

Zvino Gwinyai kugara kwaakamboita  
kwaZvinavashe akazobvako munin'ina  
waamai vake achinge afa ndokuchiuya  
kumuzinda kwerukuvhute rwake zvino  
ndizvo zvakaita kuti azoziva Nyanga iyi asi  
mushandisirwo wayo ayinge asingauzivi  
chaayingoziva ndechokuti vayiinda nayo  
kuninga vondoisiya ikoko vozodzoka  
voitora mangwana.

Mambo vakanyenwerera sezvo vakaona  
vaitawo hupfumi sehwa Zvinavashe,

*"Zvekutonotora zvipfuyo zvedu zvakatorwa  
naDzimbarimwe ngatichikandira kure sezvo  
tinogona kuzotapudzirwa varwi vedu isu  
hupfumi tavanahwokudai, ndashaiwa kuti  
ndokutendai nei machinda angu dai ndaiva  
nevanasikana vaviri ndaikupai umwe*

*neumwe wake zvino ndingori neumwe chete  
iyeyu saka ndakupai sarudzo kwamuri  
taurai chamunoda kupihwa seshangameso  
yenyu "*

vakadero mambo vachikanda kanda  
Nyanga iya mudenga.

***"Ini handina kana chipfuyo Changamire  
wangu mungandipa henyu mbudzi mbiri  
nhunzvi nechikotora "***

akadero Tozvipei,

*"Gwinyai pachadzoka zvipfuyo  
unovasarudzira mhou mbiri mbiri nemhuru  
dzayo uye nembudzi dzavareva ",*

vakadero mambo ndokubva machinda  
maviri aya anyemwerera. Pane imwe  
pfungwa yakapinda munamambo kuti  
machinda aya ndofanha kumaswedzedza  
pedyo neni sezvo vakatyira kuzobudiswa  
kwemashoko ekunongwa kweNyanga iyi  
akazosvika kwaZvinavashe.

Zvisinei vana Takawira vakabva vazonzi  
chiindayi henyu ndokusara mambo neJinda  
guru ravo.

***"Gwinyai zvanga zvakadiyi tiswededze  
machinda maviri aya pedyo nesu kuitira  
tivhare guhwa reNyanga iyi sezvo  
tinenge tava kushanda tose "***

vakadero mambo,

***"Ichokwadi ichocho mambo wangu,  
handiti mutevedzeri wangu anga asati  
asharwa here kubva zvafa ayivapo  
togona kuti Tozvipei chigaro ichocho uye  
Takawira oyita jengeta mambo sezvo uyu  
aripo akambotaura kuti haasi kunzwa  
zvakanaka miviri yake "***

akadero Gwinyai ndokubva vatenderana.

Mambo vakasimuka ndokuisa Nyanga iya munhava yayo kwakuiturika apo paigara Tsvimbo yavo yehushe ndokubva vadzoka kugara pachigaro chavo zvino vakabva varonga kuti vadane vanhu padare asi zvakazotadziiswa nemvura yakabva yatanga kunaya yakananya kusvika zuva ravira mambo naGwinyai vangori mumba umu.

***"Ukati haisiyo Nyanga yotoshanda here  
iyi Gwinyai, mvura yaisanaya kwenguva  
refu sezvariri kuita izvi "***

vakadero mambo vachiratidza kufara ndokusumuka vakananga pamusuwo vanodongorera panze ndokuona ichiita kudzaturana .

***"Hupfumi hwavamumuzinda mambo wangu  
chekutya hapachina ndaikuudzai kuti  
Nyanga iyi tichaiwana tarirai nhasi zvaitika  
heyo mvura yonaya "***

akadero Gwinyai vakazotaura  
dzakasiyana siyana ndokubva Gwinyai zoita  
zvokubuda mumba umu nekushinga sezvo  
kwainge kwasviba uku mvura ichinaya.

Gwinyai kubuda kwakaita, mambo  
vakaona jinda rinova revamwe vanoshanda  
mumuzinda richipinda rakabata rusero  
rwaiva nesadza ndokupa mambo waro  
sezvo mukadzi wavo akatya mvura yainaya.

Zvino mambo vakabva vadya zvavo vose  
nejinda iri sezvo vaiwirirana naro.  
Vakazorovera matama pasi nguva  
dzayedza. Kuchiidza vakabva vamuka ndiye  
panze ndokuona kuti zvechokwadi mvura  
yakanaya zvikuru madzetse ayinge ochema  
kubani.

Zvino vakada kugara vapedza hurongwa  
hwavo ndokubva vananga kudare uko  
kwavakawana Gwinyai atoveko neamwe  
machinda vachidziya moto ndokubva vose  
vakwazisa mambo wavo.

***"Mangwanai Changamire "***

anodero machinda achiindirana,

*"Ndamuka mamukaseiwo makasara here  
nemvura iyi "*

vakadero mambo,

***"Tiri vatano isu vadzimu mwaka uno vaticheukawo tinogona kuibvisa",***

rakadero rimwe jinda ndokubva ratanga kutaurwa zvemvura. Zvino mambo vakabva vazevezera Gwinyai zvisina akanzwa sezvo vaiva pedyo napedyo ndokubva Gwinyai angogutsurira musoro kwakusimuka ndokuridza hwamanda yekudana munhu wese. Vanhu vachinzwa hwamanda iyi vakamanyirana kuuya padare pasina nguva vakanga vatozara mudare ndokubva Gwinyai asimuka.

Mambo Dzimbarimwe sekutaura kwakaita mukadzi wavo mudiki anova mai Chengeto vakati kupedza kuita nhaurwa dzavo nemachinda avo ndokubva vazoparadzana ivo kwakunanga kuimba yamai Chengeto svovi yavo.

Vakasvika vachimwa maheu ndokubva vagara pachidaro chavo kwakutambidzwawo mukombe wedetei uyo wainge wakazara mahewu.

***"Konganda ndoti mainda kwavahosizve nhai Mambo wangu sezvo roda kupinda munaamai varo kudai"***

akadero mukadzi.

*"Mazuvano ndiri kuno ndanga ndichauya hangu kungoti pane nhaurwa yatanga tichidzeya"*

vakadero mambo vachibva vaisa mukombe  
pamuromo ndokurova huru mbiri  
kwakuugadzika pakati pemakumbo avo.

***"Maisateerera zvandaitaura nhasi  
mazozvionera pamhinosefodya pana  
Chademana kundituka pazere vanhu,  
ndainge ndakakuudzai kare kuti  
murume uyu anozvidza asi  
maindirambira"***

akadero mukadzi achiita kakupopota.

*"Chiregai kuchapopota mai mwana kubva  
nhasi ndava kuziva kuti chabuda  
mumuromo mako ndechechokwadi uye  
ndatozonyatsoona kuti pavakadzi vangu  
vose ndiwe unondiudza mashoko echenjedzo  
vamwe vose vangori vagari vemudzimba  
dzavo havataririwo zvinoitika kumurume  
wavo"*

vakadero mambo vachiratidza  
nyemwerero.

***"Mukati ikozvino ndichataura here  
zvandinenge ndaona ndichangoti  
nde zvemeso muromo zvinyarare asi  
kana muchida kuti nditaure  
mungatondipa chinobatika nemaoko uye  
chichioneka nemeso semuripo wangu"***

akadero mukadzi achiratidza kurevesa,

*"Taura chaunoda ndikuitire risati rapinda  
munamai varo mukadzi wangu"*

vakadero mambo.

***"Ndinoda kuti kuimba huru yangu muuye  
mazuva matatu akaderekedzana uye  
kunevamwe munoinda kamwe chete"***

akadero mukadzi,

*"Zvega here mukadzi wangu ndinoita  
sekudero sezvo iwe ndatoona musiyano  
panevamwe, waimbovepiko kare dai  
ndakakuita hosi yangu"*

vakadero mambo asi mukadzi haana  
kuzopindura mushure mekunge Chengeto  
apinda nevasikana vaayifamba navo.

Mai Chengeto vaiva munhu  
akambochengetwa nambuya kubva  
varikasvava kusvikira varoorwe zvino  
hapana mushonga wavaisaziva izvo  
zvakaitsa kuti vadyise murume wavo kuti  
avade kudarika vamwe madzimai.

Asi mushonga uyu hauna kunge wabvuma  
kushanda paropa raMambo Dzimbarimwe  
kusvikira mai ava vasiyana nazvo ndokubva  
vafunga kuita zano rekushandisa muromo  
wavo uyo unova wakatanga uchataura  
zvaisatendwa naDzimbarimwe asi  
vakazobudirira panyaya yaChadema  
sezvo vakazvionera neavo maziso mukadzi  
wavo achitukwa uye ayinge  
akambozvitaura nezva Chadema asi  
havana kuzvibvuma kusvikira musi uyu



zvino mambo vakachitanga kuona mai  
Chengeto semutauri wechokwadi kupinda  
vamwe vakadzi vake.

Vahosi vanova Mai Temba vainge vakura  
uye vakanonoka kuita mwana izvo zvakaita  
kuti vatore munun'una wavo semukadzi  
wepiri riri bondwe, asi ndiyo nguva  
yavakazoitawo pamuviri panova  
pakazvarwa Temba. Pavakadzi vana  
vamambo Vatatu ndivo vaiwirirana vanoti  
mai Temba, mai Sekai vanova mukadzi  
wechipiri kozoti mai Tsungai, vari vatatu  
avo vaiwirirana asi mai Chengeto vainge  
vasingadi zvokuwitirana nevamwe uye  
zvinhu izvi zvaingoizivikanwa naivo vakadzi  
chete, kune ruzhinji hapana ayizviziva uye  
pavakadzi vose vari vana paingova  
nemukomana Umwe chete anova Temba

Zvisinei kwakazosviba zvako,  
rechimangwana racho Temba anomukira  
kumisungo yake nejinda raayifamba naro  
semuchengeti wake. Vakanotanga kuteya  
misungo yaayinge achangogadzira sezvo  
imwe yake yaayishandisa yainge yapera  
kusambuka zvino zuva iri akashandisa  
yaakabva nayo yaiva mitsva . Vakazodzoka  
pamuzinda zuva rorova nhongonya zvino  
Temba akati achangopinda mumuzinda  
ndokuona vasikana vayiinda kumvura  
vakapfura nepaari vakatarira pasi

ndokubva afunga mashoko ayinge  
ambotaurwa ekuti anofana kusarudza  
musikana waanoda kuroora zvino akabva  
asvika kudare kwaiva mambo naDzitiro  
uye nemamwe machinda vakagara  
vachiita nyaya sezvo kwaiva nerumhepo

Akaswedza baba vake uye ndiyo nguva  
yakapindawo Toro uyo akagara padivi  
naTemba zvino mwanakomana wamambo  
akabva zvezera Toro munzeve uyo akabva  
agutsirira musoro kwakusimuka ndokubva  
anozevezera mambo avo vakabva  
vagutsurirawo musoro nyemwerero ikabva  
yabudiswa vakatarira kwainge kwakagara  
nevanji wavo.

Toro akaita sekuudzwa kwake ndokuridza  
hwamanda yekudana munhu wese izvo  
zvakaite kuti vanhu vapesanise makumbo  
avo vakananga padare pasina nguva dare  
rainge razara.

***"Mukasvika pano munonyarara monzwa  
chidanirwa, musade kuitwa sezvakaitewa  
Chadema"***

akadero Toro achibva afamba kuinda  
painge pakagara mambo ndokubva  
akotamisa musoro wake achida kuudzwa  
zvokuita asi akabva agara pasi mambo  
ndokubva vasimuka.

*"Muchiona madanwa rakacheka nyika kudayi kuziva kuti ruzhinji rwenyu rwageza geza rwukatsvukira saka panguva ino vasikana vose simukai muuye mberi kuno mumire makaita mutsetse uye vakadzi varinechekumberi dziurirai vasikana vauye vawane pokumira "*

vakadero mambo neinzwi rakanyorovera izvo zvakashamisa ruzhinji kuti mukono wapfava kudero kwakanaka here uye kovasikana vosimudzwa asi vodazve kuroora mukadzi wechishanu. Yavaka mibvunzo isinha mhinduro kuvazhinji asi vakazongoti cheregai tione sezvo ichiri kupakurwa.

Vakasimuka vasikana vose ndokubva vaita mutsetse sekutaura kwa mambo, munhu wese ayinge anyarara ateya nzeve kuda kunzwa kuti vasikana vasimudzirwei.

***"Nhasi izuva guru raTemba rekushara achazova mukadzi wake saka sunungukai zvenyu vasikana mose maka wisa zviso, simuka Temba ufambe uchiona atora moyo wako "***

vakadero izvo zvakaaita kuti vasikana vose vatarire pasi uye ndokunzwikwa mahon'era kumunhu wese izvo zvakaaita kuti Dzitiro asimuke.

*"Uyo mukadzi akagara apo simuka uuye*

*mberi utaure mashoko auri kutaura ndibve  
ndakuperekedza kunaChadema*

akadero Dzitiro ndokubva panyararwa  
kunge pafiwa zvino Temba paakati atange  
kufamba achitarira vasikana pakabva paita  
kamwe kakomana kakauya kachimanya  
kachibva kusiwo guru.

Kaimanya kachinongedza kwakaibva  
ndokubva kasvika kuwira pamakumbo  
aToro izvo zvakavhundusa vanhu wese uye  
vamwe vaininge vatosimuka kumira.

Kaiva karugotwe kaToro zvino akabva  
amanya paiva nemwana wake,

***"Tapiwa mwanangu chiyi chaitika uri  
kutizei"***

akadero Toro.

*"Zivai haachagoni kufamba achekwa gumbo  
neumwe munhu kumombe kwatanga tiri  
izvozvi arikungoumburuka sembongoro  
pamadota achichema"*

kanotaura kajaya ako kainge kabva  
kumombe kachimanya zvino  
zvavhundusa vanhu vaivapo ndokubva  
mambo vazevezera Dzitiro.

***"Mungambodzokera henyu kudzimba  
dzenyu tichakudanai topedzisa  
chirongwa chedu uye vasikana muuyewo  
makageza"***

akadero Dzitiro zvehasha ndokubva vanhu

vapararira kwakusara machinda  
ayiremekedzwa chete.

*"Munhu wamaona murume here kana  
mukadzi uye munomuziva here"*

akadero Toro,

***"Ini handina kumuziva anga akavhara  
musoro wake uye ndazomuona avakure  
akabata tswanda asi Zivai ndiye anyatsa  
kumuona"***

akadero izvi zvakashatirisa mambo kuti  
chiyi choda kuitika mumuzinda mangu,  
Dzitiro ayinge ongotenderera panzvimbo  
imwe shungu dzakamuputira hapana  
chaayinge onzwa pane zvaitaurwa.

*"Ndiyani ava kuda kundicheka  
nerakagomana, angifa mwana wangu  
ndopika na sekuru vangu varipachiru"*

anotaura Dzitiro.

Zvino vakabva vatuma machinda kunotoro  
Zivai wacho vanzwe zvizere kubva kwaari  
kana arisa Dzitiro chiso changa  
chashanduka nenguva diki paakanzwa kuti  
mwana wake achekwa gumbo zvino  
machinda mashanu akamanya akananga  
kumafuro .....

## **KUPERA KWECHITSAUKO 8**

## CHAPTER 9

---

***"Kungoshaikwa Nyanga here baba,  
pamwe marasika gwenzi ramaisa kwete  
apa here "***

Pedzisai anotaure akatendeka rimwe  
gwenzi raiva padyo.

*"Kwete ikoko ndepano mwanangu wati  
ndingakangamwa here pandaisa nyanga "*

vanotaure mambo Zvinavashe.

***"Imi handiti mamboikangwana kuitora  
here hazvishamise kuti mhanza  
yembudzi iripabvi "***

anotaure Pedzisai achitoinda pagwenzi  
raanga akatendeka asi akasvikowana  
ririgwenzi.

*"Kuita kunze kwasviba uye mvura irikunaya  
dayi taona kuti hapana anetsoka yasvika  
pano here "*

***"Mwanangu hazvinetsi indakumba  
unotora tsvatsva wobva ikoko  
wakaibatidza mvura yakuita seyogasa  
haidzimi wochimbidza kudzoka inda  
uchimanya Pedzisai"***

vanotaura mambo asi meso avo ayiva pasi.

Pedzisai anomanya dzamara asvika kumba.  
Anonanga mugota make haana kuda  
kuinda muimba yababa vake ayisada  
kuonekwa naamai vake. Anotora tsvatsva  
mbiri dzaivemo ndokutungidza imwe  
yacho achibva atobuda ichibaka, rimwe  
Jinda raiva rakarinda paimba yamambo  
rakamboda kubvunza kwaiinda Pedzisai asi  
rakazopfumbira muromo waro.

Pedzisai nenguva isipi ayinge asvika  
paainge asiya baba vake. Anotambidza  
mambo tsvatsva yaipfuta ndokubatidza  
yakewo kuti chaedza chiwedzere.  
Vanovheneka pose pose asi kwaiva kuteta  
kwehuku irikutsvaka chisvo chagondo.

***"Baba panetsoka iripano mambotsika  
apa here "***

anotaura Pedzisai akatendeka tsoka iya.

*"Tkoko handina kugurayo, ingava tsoka yani*



*iyoyo haadero ari munhu ayitora agoziva  
kuti ingava yani "*

Mambo Zvinavashe vanotaura  
vakaicherechedza tsoka iya.

***'Tyi yakabhafuka zvikuru ndaitadza  
kuiziva, uye haina kutarisa kumuzinda  
kwedu, dayi isiri mvura tainyatsoiwona  
tsoka iyi zvakanaka baba "***

anotaura Pedzisai achiibaya baya  
nemuseve wake.

*'Mwanangu patoshata munhu uyu anoda  
kutsvakwa nguva ichipo nekuti nyanga iyi  
ndiro ziso redu, kana isipo tinoparara uye  
nzara inopfunya chisero mudumbu redu, iwe  
kuti usasiya nyika inyanga iyoyo, baba  
vangu vakanditi isatorwa nani zvake asiri  
hwehumambo "*

vanotaura Mambo vachiratidza  
kushushukana.

***'Nyanga iyi ichatsvotsvomesa ropa  
rakawanda nerisina mhaka kusvika  
yadzoka mumaoko enyu baba ".***

Vanotaura vakamira mvura yakabva  
yatovara.

*'Ngatimbotevera kwainda netsoka idzi  
dzinenge dzevanhu vaviri iwe yacho iyi "*

vanotaura mambo vakavheneka  
netsvatsva. Vanotarisa asi avana kuzoona

tsoka dziya kwadzayiinda nako.

***"Ngatidzoke kumuzinda ndinozivisa  
machinda vanhu vagare vazviziva "***

vanotaura mambo.

Vaviri ava vanotungamidzana vakananga kumuzinda kwavo. Vanosvikonzwa ngonono dzairidzwa mumuzinda nepwere dzaivhumuka dzimwe ndidzo dzaitowetera paruvato. Asi varindi vainge vakasinura vachitenderera nemuzinda vakarembedza nzvombo meso asingahwairi.

***"Tofuma tovaudza mambakwedza,  
chiinda unoroverta matama pasi  
mwanangu asi uku ndiko kubvutirwa  
moyo "***

vanotaura mambo vachitonanga kuimba kwavo. Vanowana rimwe jinda raivarinda raishevedzwa nerokuti Madzambagate richitambisa tsvimbo rimire pamusiwo, rakangokotamisa chiso ndokuvhura gonhi mambo vachibva vapinda. Vanowanda mukadzi wavo atorara pamwe chete na Yemurai.

Kuchiyedza mambo Zvinavashe vanomuka rungwanani, ndokunanga kudare kwavo. Asi vakawana jinda ravo guru Dari avepo nemamwe maviri kusanganisira na Madzambagate.

*"Kwakanaka here Mhukahuru kumuka  
nguva dzino kune rumhepo rwuri  
kuvhuvhuta zvakadai"*

Anotaura Dari jinda guru.

***"Kurara hope rugare Dari!. Muzinda  
wapinda mhepo rugare chairwo  
hapachina nekuti chitsigiso chemuzinda  
uno chakanyangarika "***

vanotaura mambo Zvinavashe.

*"Changamire wangu muri kuti chiiko itiidyo  
nguva ichipo".*

Anotaura Dari.

*"Nezuro paya pandakabuda nanevanji  
wangu tichinotora Nyanga kuninga  
unozviziva iwe, pakudzoka Pedzisai akabaya  
mhembwe tichibva taivhiya ini ndokuturika  
nhava pagwenzi ndichibva ndaita  
hanganwa sedzegunguwo ndokuisiyapo,  
saka madeko iwawa nguva dzainge dzonaya  
mvura ndaida kupedzisa mhiko nenyanga  
iyoyo ndipo pandakayeuka kuti ndasiya  
Nyanga saka ndazodzokera naPedzisai asi  
tasvika pasina ndokuona tsoka dzevanhu  
vaviri asi hatina kuziva kuti ndivanani uye  
nekwazoinda tsoka idzi. Saka  
motombonotenderera kumakomo uko  
pamwe mogona kuwana vanhu vakaitora*

*nyanga iyoyo".*

Dari anoramba akatarisa panzvimbo iwe,  
Madzambagate anosimuka ndokuridza  
hwamanda vanhu vachibva vauya  
neuwandu hwavo. Machinda anoudzwa  
nezvenyanga iyi ndokusarudzwa gumi  
nevashanu kunotsvaka vanhu vainge  
vaitora. Pedzisai na Runesu vakaindavo.  
Nyanga iyi yakarwadza vanhu vakaanda  
kwazvo sezvo vaiiziva.

Machinda akainda akaita muswere wese asi  
havana chavakaona kana tsoka zvadzo,  
vakatozodzoka kumuzinda richipinda  
munamai varo.

Mazuva akapindana mambo Zvinavashe  
vachiti pamwe nyanga ichawanikwa asi  
zvaiva zviroti zveharahwa kurota  
ichiyamwa.

Yemurai mwanasikana wamambo  
Zvinavashe ayinge atokura chipfuva  
chainge chatomera.

***"Pedzisai asi hauzodi kuti ndiite  
mukwasha wako here ndisane kutema  
ugariri hangu, nekuti inhosvora meso  
runako rwake harwufadzi varoi"***

anotaura Runesu nguva iyi vaiva pamusoro  
pechimwe chikomo chainzi Chinyamafuri.

*"Uyo ndakagara ndarovera hoko yekuti anomutora anenge ari mukono asi kana uyine mombe mazana maviri unoita hako mukwasha wangu".*

Anotaura Pedzisai akabata rushaya hameno zvaayifunga.

***"Kana kuti unamambo vaunoda kuzopa".***

*"Runesu chimbomira nyaya iyoyo urikuona kuti kubva gore riya ratashaya nyanga zvinhu zvakatanga kushanduka serwaivhi ikozvino mvura chaiyo murwizi yapwa mombe dzavakufa muzinda wababa vangu waondomoka".*

Anotaura Pedzisai achitosumuka ndokusiya Runesu shamwari yake agere.....

Kukura kwaiita Jemedza zvaifadza Chabhanga nekuti kwaakabva kwaiva kure achirera Jemedza neurozvi hwemuka muto nematamba pamwe nechakata pamwe nekumugezesa nemvura ine mushonga.

Jemedza ayinge avanemakore gumi nemaviri ava chikomana uye akagwinya zvaimwisa mvura. Nerimwe zuva Chabhanga achitoveza tsvimbo yake ari pasi pebvute raiva pajinga pebako rake

Jemedza anobuda mubako maayiva  
ndokunogarawo paiva na Chabhanga.

***"Muri kuvezei baba "***

anotaura Jemedza.

*"Ndiri kukugadzirira tsvimbo yako hauyidi  
here "*

anotaura achiisumudza mudenga.

***"Ndoida asi ngainake kukunda yenyu  
nekuti ndichakukundai kupotsera  
tsvimbo, ko nhai baba isu tinongogara  
tega here mudondo muno ko vamwe  
vanhu varipi uye mai vangu varipi "***

Anotaura Jemedza meso ake akatarisa  
tsvimbo yaivezwa na Chabhanga.

Asi Chabhanga anomboramba akanyarara  
ndokuzoti,

***"Jemedza zvawataura kudai wakura dai  
uchiri mudiki waisabvunza izvozvo  
ndaimirira kuti undibvunze asi  
ndichakuudza mangwana, nhasi ndoda  
kunokudzidzisa kurwa kuzasi uko pedyo  
nekuya kwatakageza "***

Anotaura Chabhanga akatarisa Jemedza  
uyo ayinge ashandura chiso.

*"Baba asi chiripo chakavanzika kani "*

anotaura Jemedza.

***"Chiinda unotora zvombo zvako nguva***

***hatichina utore chimukuyu chako  
chanda isa papfihwa "***

anotaura Chabhanga asi haana kupindura  
zvainge zvabvunzwa na Jemedza achibva  
atosimuka ndokutora pfumo rake. Jemedza  
anonotora zvombo zvake ndokudzoka  
paiva naChabhanga uyo waayiti baba.

***"Wasiya pfumo rako zvekare dzokera  
unoritora nekuchimbida "***  
anotaChabhanga.

Jemedza anomanya ndokunotora pfumo  
riya achibva adzoka. Chabhanga anosiya  
tsvimbo yaanga achiveza achibva asimuka.

Vanodzika nechezazi kwebako ravo uko  
kwaiva ne rwizi rwaiveko nedziva  
ravaisigezera.

*"Jemedza tasvika ndichakudzidzisa kurwa  
nepfumo pano nekuzorwa uri mumvura  
uchishambira uye kusvunura uchifema uri  
pasi pemvura mangwana toita zvimwe saka  
izvezvi isa miseve yako pasi kana  
kukochejera dati rako pamuti uyo wouya  
nepfumo rako chete "*

anotaura Chabhanga.

Jemedza anoita zvainge awudzwa  
ndokusara nepfumo chete.

*"Jemedza chekutanga usatangirwa*

*nekuvengi kubaiwa uye kana uchida kubaya  
munhu usatarisa paunoda kubaya tarisa  
maziso emuvengi nekuti iye haazive kuti  
munhu anotarisa maziso, wadero wagona  
muvengi unomubaya nyore sekudya chiropa.*

*Chepiri pfumo haripotserwi usati waona  
kuti wakunda ndiro basa remuseve iroro.  
Unofanirwa kudzidza kuhwatata pasi  
senyana rehanga pamwe chete nekuwaruka  
semwana wetsoko, musoro wako  
haufanirwe kubaiwa ngauve wenyoka  
yenhakure kunzenga".*

Anotaura Chabhanga achiita  
kakutevedzera kuti Jemedza anzwisise.

***"Zvirimunzeve baba idama chairo iroro".***

*"Unofanirwa kuzvika zvekare murume ifa  
wayedza sezvakaita ma....."*

Chabhanga akabva anyarara shungu  
dzainge dzakamubata anotendeuka  
ndokupukuta misodzi yake zvisina  
kuonekwa naJemedza.

***"Chimira uko Jemedza bata pfumo  
zvakasimba harifanirwi kusvoboka  
muruoko ngarivhunike badzi kwete  
kubva".***

Anotaura Chabhanga.

Jemedza anotonga kudzidziswa kurwa



nepfumo naChabhanga akambotanga  
asingagoni ndokurohwa shamu shanu  
kumusana dzakasimba akavata pasi.

Anomuka zvekare ndiye kweda kweda  
mapfumo anonzwikwa kurira Jemedza  
ayinge oyita seagarwa zvino. Chabhanga  
ayiti akavhika ruviri ketatu Jamedza akabva  
awaruka nedivi reruoko rwaChabhanga  
rweruboshwe rusina simba ndeye seri  
kwake apa pfumo rakatendeka huro  
yaChabhanga. Zvadero Chabhanga akabva  
asimudza maoko mudenga, Jemedza  
ndokubvisa pfumo rake pahuro  
paChabhanga asi haana kubaya.

***"Ya-a kurwa pasi wava shasha  
mwanangu hande Mudziva umo zvekuita  
ndakuudza usamwa mvura uye  
usatsunzunya nekuti ukatsunzunya  
muvengi anokubaya".***

Vanopinda mumvura vose dziva iri raiva  
rakadzika kwazvo vange vasina kutsika  
pasi. Mapfumo anovheyeswa vheyeswa  
mumvura imomo, yakava batai batai  
imomo mvura yakatsvuka ropa kuti piriviri  
revaviri ava. Vaigona kutora nguva  
vakanyura mumvura vachirwa vari pasi  
ipapo vozobuda pamusoro payo mvura.

***"Wadadisa Jemedza ngatichibuda tigeze "***

anotaura Chabhanga vachibva vabuda

zvavo asi ayinge azara nyemwerero.

***"Jemedza unofanirwa kuchemedza  
nhandu dzako sezita rako. Chasara  
ikozvino kupotsera museve netsvimbo  
pamwe nekutsvetuka mumatombo,  
chekupedzisira ndoda kuti uzouraya  
garwe ririmudziva repamusoro apo ne  
kurwa wakasungwa kumeso "***

anotaura Chabhanga.

***"Muvengi wacho ndiyani nhai baba paya  
hamuna kundiudza "***

***"Jemedza ndinokuudza mangwana zvose  
izvozvo sekureva kwandaita paya "***

anotaura achitogeza.

Vachipedza vanobva vatodzokera kubako  
kwavo vachiseka zvavo .....

**KUPERA KWECHITSAUKO 9**



## CHAPTER 10

---

### Kumuzinda kwaMambo Pasihariguti

Zvakadanwa vanhu padare Gwinyai akabva asimuka ndokubva ati,

***"Pamusoroi muzinda waMambo Pasihariguti, chokwadi pasi raisaguta asi ikozvino rava kuguta inzwai madzedze kumapani uko kuchema ngatirovei mhururu nemuridzo titende vadzimu vedu",***

anotaura Gwinyai achionekwa mufaro pachiso chake. Zvino mhururu nemiridzi zvakabva zvarohwa izvo zvakavharisa muzinda wese.

Gwinyai akatozoita kuridza hwamanda kuti vangu vachidzima miridzo yavo.

***"Nguva ino ngatipei nzeve dzedu***

*kunaMambo tinzwe ravakapfumbata  
ravadai kukudanirai rungwanani rwuno "*

akadero Gwinyai ndokubva agara pasi.

Mambo vakasimuka ndokumboita chinguva  
vakanyarara kwakubva vazonzwikwa  
kugadzirisa pahuro.

***'Mangwanai akanaka kwamuri  
ndisingadi kupedza nguva sezvo pasi  
pane mwando unotonhora uye mvura  
yakamisa kumavirira uko inogona  
kuturuka tisati tapedza zvirongwa zvedu  
saka chindipai nzeve dzenyu ".***

Vanodero mambo ndokubva vambonyarara  
ndiye koso koso katatu ndokusvipa  
chikarabwa icho chainge chovatadzisa  
kunyatsobudisa inzwi ravo icho  
chavakasvipira pavivi remoto raiva padare.

***'Sekutura kwatakamboita mushure  
mafa mutevedzeri wejinda guru ndikati  
ndichazokuzivisai achamutsiva zvino  
zuva racho rasvika uye pamwechete  
nejengeta mambo rangu sezvo muchiziva  
kuti riri kudzimbikana nenyama dzaro  
saka vose varivaviri  
ndovandakudaidzirai kuti ndikuzivisei  
kuti ndevapi vachavatsiva ".***

Vakadero mambo ndokubva panzwikwa  
miridzo yakabva nekuvarume.

*"Ranga riri jengeta mambo ndichamupa mbombe mbiri dzokurimisa sekumutenda nekundichengetedza kwaayiita uye handimurasi sezvo ndiye chipanga mazano wangu"*

akadero mambo izvo zvakafarirwa neruzhinji.

***"Tozvipei simuka uuye kuno kumberi"***

vanotaura mambo ndokubva asimuka uyo akabva ayinda paiva naMambo,

*"Uyu ndiye ava Muteedzeri waGwinyai kureva kuti chose chamunoda kwandiri munotanga maona iyeyu ndiye achaziva zvokuita"*

Mhururu nemiridzi zvinonzwikwa kubva muvanhu.

***"Takawira simuka uuye kuno"***

vanotaura mambo vakatarisa Gwinyai uyo akabva angogutsurira musiro. *"Takawira ndiye ava jengeta mambo kutanga nhasi saka chaanenge ataura musapikisa sezvo zvinenge zvabva pamuromo pangu",*

vakadero mambo zvisinei vanhu vakachizonzi vachiinda havo.

Mambo, Gwinyai, Takawira, naTozvipei

vakabva vatoranawo ndokuinda muimba  
yehumambo umo mavakasvika  
kutsanangurira vaviri ava mushandiro  
wavachaita uye chazvainge zvakanakira  
machinda ose arimaviri awo dzaiva mhare  
pakurwa chero hazvo vaisa svika pana  
Gwinyai asi ndivo waitotevera pahumhare  
hwavo.

Vachipedza kuita nhaurwa dzavo Gwinyai  
akazoinda navo kumatanga ndokuvapa  
umwe neumwe mhou nemhuru yayo  
kwakuchizodzokera zvavo kudzimba umwe  
neumwe avakuchiita basa rake uyu  
Takawira akabva atotanga kugara pasiwo  
ramambo akapakatira zvombo zvake sezvo  
panguva iyi mambo vaiva mumba yavo.

### **Kumuzinda kwaMambo Dzimbarimwe**

Machinda mashanu akamanya akananga  
kumafuro uko kwavakasvikowana Zivai  
achibongomora mhere akabata gumbo rake  
pavanoti tsvee meso avo pagumbo rake apo  
paayinge anyorwa vakangobata muromo  
yavo sezvo painge pakaita kuzara ropa  
mwana achioneka tsinga mumusoro  
nechepashaya kuti abvira kuchema kare  
uye maziso ayinge atsvuka kunge runambi

rwemoto.

Vakangokasimudza ndokudzoka nako  
kumuzinda vasina kutaure nako  
ndokusvikomuisa mudare umo maiva na  
Mambo.

Dzitiro pakasvika mwana wake akabva  
abva pachigaro chaayiva ndokuinda  
pamwana wake.

***'Zivai waitwa sei chinvarara wanangu  
ndiri pano baba vako waitwa sei'***

akadero Dzitiro asi mwana haana  
raakabudisa ayinge akangobata gumbo  
rake. Pane rimwe jinda rainge  
rakateererawo iro rainge rakaita kuvhura  
meso rakatarira paiva naDzitiro uye jinda  
iri raiva panze pedare asi riri pamukova  
uye ndiro rimwe revamwe vainge vanotora  
Zivai.

Dzitiro akaisa meso ake mudare ndokuona  
muine machinda ayisvika masere  
ndokubva meso ake asanganidzana nejinda  
riya rekumira pamusiwo wedare rakatarira  
pavaiva.

***'Twe wakamira pamusiwo huya pano'***

akadero Dzitiro izvo zvakavhundusa jinda  
iri sezvo mudanirwo wacho waiva wehasha  
ndokubva auya.

***'Wetera pagumbo remwana wangu apa  
ropa rose ribve'***



akadero Dzitiro izvo zvakaita kuti  
machinda ayiva umu aseke asi pakaita  
umwe akabva awonekwa achiita  
kuumburuka pasi nekuseka,

*"Urikuseka iwe chiuya uyite zvataurwa  
izvozvi"*

vakadero mambo vachinge vafinyamisa  
chiso.

Jinda riya rakabva rapfumbira muromo  
kwakusimuka sezvo rainge rakatariswa  
namambo neziso rekuti regauwone. Zvino  
akasvika paya ndokubudisa sikarudzi yake  
kwakuwetera paronda paya izvo zvakaita  
kuti Zivai ayikwetsure mhere sezvo  
akanzwa kushinya asi yakazorega kubuda  
ropa risati rapera kubva pagumbo  
ndokubva uya wekumbotanga kunzi  
awetere ndokunzi achipedzisawo zvasara  
ndokubva awetera asi panguva iyi Zivai  
haana kuzonzwa kushinya kuya.

Chiitiko ichi chakaitirwa kuti marwadzo  
ayiva naZivai ambonyarara zvisineiwo  
akabva ambonyarara uye zvaipa zvakare  
kuti ronda rikasire kuoma.

***"Waitwa sei nhai mwanangu"***

vakadero mambo mushure mekunge Zivai

ava kupukuta misodzi yake uye agarawo zvakanaka.

*"Ndabatwa neumwe munhu abva andibvunza kuti Chademana akaurairwei ndokubva ati ndikasataura ayindiuraya ndokubva ndamuudza kuti ayida kuita bonde nemukadzi wamambo ndokubva anditi inda unoudza baba vako kuti vagare vakaringa nzira nekuti Jemedza arikuuya zvino abva andicheka cheka gumbo rangu akati ndinoratidza baba "*

akadero Zivai izvi zvikaomesa mate mumukanwa kumunhu wese ayiva mudare umu.

***"Munhu wacho murume here kana mukadzi uye ukamuona unomuziva here "***

vakadero mambo vachiratidza kukanadzika .

*"Hongu murume asi handimuzivi sezvo anga akavhara kumeso kwake nedehwe "*

anodero Zivai.

***"Toro ridza hwamanda yehondo varwi vauye vakapakata zvombo "***

vakadero mambo vachinge vasimuka uku bvumo richibairwa bairwa pasi. Akasimuka Toro ndokuridza hwamanda iyo yaiziikana kuti kana yarira pane muvengi apinda mumuzinda zvino varwi vakamanyirana

kutora zvombo zvavo kwakumanyirana  
padare uko kwavakasvika mambo  
vachingoze zeya.

***'Benhure tora varwi vose muinde  
munotsvaka murume ataurwa uyu  
muuye naye pano, muchatungamirwa  
nevarume vashanu vava ndivo vabva  
naZivai, simukai nguva  
ndoyavakutopera makagara  
makanditarisa "***

vakadero mambo izvi zvakaitea kuti  
machinda asimuke nekukasira ndokubuda  
mumuzinda achiita kumanya. Vakamanya  
vachibuda mumuzinda asi pavakange vava  
kunze vakabva vatanga kufamba.

Vanonanga painge patorwa Zivai apo  
pavakasvika kuona zvechokwadi  
paineropa pasi uye vakabva vaona zishoka  
rairatidza kuti ziguru iri ravakatanga  
kuteedza iro rainge rakananga murwizi  
umo mavakanyatsakuzoona tsoka iya  
zvakanaka asi vakaicherekedza ndokutadza  
kuziva kuti ndeyai. Zvisinei vakaiteedza iyo  
yakabva yabira rwizi panova  
pavakazotadza kuyiona kuti yainda nekupi,

***"tsoka haingo nyangariki varume  
ngatinyatsotarira kuti yapinda nepapi  
asi munhu wacho anogara murwizi***

***muno".***

Akadero Benhure ndokubva vanhu vanyatsotarira asi vakatadza kuiwona chavanga vongoona matsimba emombe chete.

Havana kupererwa varwi vakabva vaita fararira nesango rese asi kwaiva kutsvaka nhiyo yehanga mugombo zuva rakasvika pakuvira pasina chavawana ndokubva vadzokera kumuzinda.

Mambo vanosara vachingotenderera mudare ndokubva vazoitwa zvekubatwa naToro ndokubva avagadzika pasi,

***"Changamire wangu musazvidya moyo siirai zvole kwandiri hapana chinoitika kwamuri ndiripo hongu muzinda wapinda gonye asi charichadya richachishaya rangarirai mazuva aya aMambo Pasihariguti kubva zvandazoindako tikauya nepfuma yakawanda haana kuzombodzoka zvakare sezvaayiita"***

akadero Toro izvo zvakaita kuti Dzitiro agutsurire musoro asi akabva azobuda mubare umu oyinda kunorapa mwanawake sezvo zvekurapa rapa ayizvigona.

*"Pane varikuda kurwa neni asi  
chavasingazivi ndechokuti havandigoni "*

vakadero mambo,

***"Chiregai tione kuti pfumo renyu rapinda  
musango rinouya rakapfumbata here  
tigotangira ipapo "***

akadero Toro asi mambo mumusoro mavo  
mainge matova neimwe pfungwa inova  
yavainge vakambotaura yekunoona n'anga  
vawedzerwe amwe masimba. Dzitiro  
akazodzoka uye zuva parakavira machinda  
akabva adzoka ari maoko chete izvo  
zvakapedza mufaro wamambo.

***"Zvamashaiwa murume uyu zvinoreva  
kuti nhasi hapana anovata mudzimba  
munhu wese ngaarinde muzinda sezvo  
kana ari muvengu anopinda nhasi  
mumuzinda kana mangwana "***

vakadero mambo kumachinda.

Machinda ose akavata akarinda muzinda  
sekutaura kwamambo asi chakaitika

Hapana, akaita mazuva matatu varwi  
vachivata vakasvinura asi pasina chainge  
chauya izvo zvakapa mambo kuziva kuti  
hakuna chichauya uyewo paya  
pokunyorwa Zivai painge poonekwa kuti  
pakanyorwa mufananidzo webakatwa izvo  
zvakaita kuti Dzitiro azive kuti ihondo

yainge yatarwa nemurume uyu asi  
chakamunetsa ndechokuti yaizouya rini  
uye ichibva kunani sezvo iye ayiziva kuti  
haana muvengi wake achiri kurarama, izvi  
ayizvifunga ari mumba make ndokubva  
anzwa kugugudzwa pasiwo iro raiva jinda  
rainge ratumwa namambo,

***"Mambo wangu hanzi namambo svikai  
kuimba yehumambo "***

rakadero jinda riya richibva ratotendeuka.  
Dzitiro akabva avhara musiwo wake  
ndokunanga kwaiva namambo.

*"Gadzirira mangwana rungwanani  
pacharira jongwe repiri tiende Kun'anga iya  
yandakambotaura nezvayo Toropito  
yekwaMudzamiri ndizadzise mashoko  
ababa vangu sezvo mhandu dzava kuda  
kundiwandira uye ndinofanha zvakare  
kunaisa mvura ndomene uye kuona  
zvinofungwa nemamwe madzimambo "*

vakadero mambo,

***"Tri munzeve mambo hapana chakaipa "***

akadaira Dzitiro ndokubva vazotaura  
dzakasiyana siyana ndokuwonekana  
panguva yakapinda zuva munaamai varo.

Zvisinei nguva yainge yataurirana Dzitiro  
namambo yakabva yakwana ndokubva  
Dzitiro ayinda kunomutsa mambo wake  
kwakubuda mumuzinda vari vaviri  
vonanga kwaToropito n'anga yaiva

nemukurumbira wamakona ose awunoda waimawana. Vakafamba zuva rakazobuda vava pedyo regomo Mudzamiri raigara N'anga iyi ndokubva vazosvikakugomo iri zuva richangoti dziyei.

Mambo Dzimbarimwe kaisava kokutanga kusvika pagomo iri zvino vakabva vati varimukufamba kudero ndokunzwa inzwi kumashure kwavo,

***'Isai zvombo zvenyu pasi motevera makumbi uyo arikurudyi kwenyu uye musacheuka kusvika masvika "***

rakadero inzwi ravasina kunzwa kuti nderemunhurune here kana munhukadzi ndokubva vaisa zvombo pasi kwakuonawo kurudyi kwavo kuchifamba munhu rume uyo wavakabva vatevera. Vakasvika panezvimwe zviimba zviviri zvainge zvakarereka denga razvo.

***'Mirai ipapo ndichakudanai "***

akadero Makumbi uya ndokubva vaona chiharahwa chakabva nekumashure kwavo icho chakananga kunopinda mainge mapinda Makumbi wake uye Dzimbarimwe akabva achiziva kuti ndiye Toropito n'anga yacho.

***'Hanzi chipindai "***

akadero Makumbi ndokubva  
Dzimbarimwe atanga kupinda achirova  
maoko sezvo ndiye aviya kumberi uyewo  
Dzitiro ndokubva atevera.

**KUPERA KWECHITSAUKO 10**



## CHAPTER 11

---

Pavainge    vosvika    kubako    kwavo,

Chabhanga anoona (**zvikwari / zvikorwe**) zvainge zvakaita dungwe zviri mberi kwavo. Anobata Jemedza bendekete kuti asafamba iyewo Jemedza ndokumira meso ake ari mberi.

Chabhanga anovhomora museve wake ndokuutseta pagonga uta anoutepfenyura ichibva wabaya zvikwari zviviri zvimwe ndokubva zvati dzvamu nedivi remabvezuva.

Jemedza anomanya ndokunotoro nyama yavo ayiita kufara nyemwerero ichisvika kugotsi.

***"Nhasi ndini ndinobika baba ndakugona "***

anotaure Jemedza.

*"Twe unobika iyi nhasi,, iyi ndiniwo mangwana".*

***"Tyi toita yekugocha hatingabiki yose".***

Nenguva isipi ndiye pfacha pabako pavo, Chabhanga akabva asika moto nechitanda chemukubvu zvose izvi zvaiva mumaziso aJemedza, moto wakabva wati ngandu. Jemedza akabva atobika vachipedza vanobva varara sezvo vaiva nemaneto.

Jemedza anoti akarara kudero anobva atanga kurota mumwe murume ayiva akareba uye arimukobvu ayine mumwe mukadzi vamire mberi kwake asi

vaisabwaira bodo.

*"Jemedza ndauya kwauri sezuva rekutanga ini uchandiziva kana wazoudzwa nababa vako sokuvimbisa kwavakuita. Chandinoda kukudza ndechokuti uzotsvaka munhu akandiuraya womuurayawo semauraire aakandiita, asi usati watsaka munhu iyeye unerimwe basa guru rauchaita tarisa kumbabvazuva uko uwone zviriko ndoda kuti undiudze kuti waona chii" anotaura murume uya kuhope.*

Jemedza anobva atarisa kumabvazuva kuya anobva awona .....

Jemedza paayirota ayiita ruzha urwo rwakamutsa Chabhanga achibva amutswa.

***"Chii Jemedza?"***

anobvunza Chabhanga.

Jemedza anoramba akanyarara akatarisa panzvimbo imwe ziya richiti teu-teu kunge adirwa mvura. Anosimuka ndokuchera mvura achibva amwa ndokudzoka achibva agara.

*"Haudavire here chii mwanangu "*

anobvunza zvekare Chabhanga. Jemedza anobva arondedzera Chabhanga hope dzaayinge arota.

***"Ndine urombo Jemedza, ndizvo zvandainge ndakamirira kuti urote hope dzakadero kana warota ndochikuudza asi ndovimba kuti uchazvigamuchira "***

anotaura achibva asimuka ndokutora nyama yaiva muchimbiya ndokudzoka ogara asi vakafunga makumbo nedaunha rainge ririredewe remhara.

***"Taurai henyu baba dzakateerera "***

anotaura Jemedza ndokunongawo kanyama vose vanotsenga.

***"Jemedza potsi tenda vadzimu vako kuti uri mupenyu. Piri kunerimwe dunhu rina manbo vaneutsinye kwavo nyoka inoruma chaisingadye, mumwe murume akaramba kutsemura huni dzemukadzi wamambo uyu ndokubva awurawa achiita zvekupekerwa pfumo kumagadziko richibva ranomirira paguro kuro achibva afa. Murume uyu ayinzi Chademana uye ayiva nemukadzi ayiva nepamuviri, Mambo uya akada kuuraya mukadzi uya asi akatiza nemusango. Zvadero mukadzi uyu akazodzingirirwa nechimupanzu vachibva vabatwa ndokuwisirwa pasi vachiita kutsikwa tsikwa pavainge voda kurumwa pakabva paita mumwe murume ayigara musango ayinzi Chabhanga ndokupfura chimupanzu chiya nemuseve ndokubva chafa.***

***Mukadzi uya simba ayiva asisina mimba  
yakabva yarwadza kuti apone  
zvakaramba ayinge odakufa, akabva  
apo chiratidzo kumurume uya kuti  
chekai dumbu mubudise mwana  
umuchengete ini ndava kutevera  
murume wangu kunyika dzimu "***

anobva anyarara Chabhanga.

Jemedza misodzi yainge yavahova  
mumatama Chabhanga anobhabhadzira  
Jemedza ndokumumbundikira asi  
ayiratidza kuti shungu dzakamuzadza.

***"Jemedza ini ndini Chabhanga wacho  
handisini baba vako, baba vako vainzi  
Chadema ndivo vakaurawa uyemai  
vako ndivo vandareva "***

*"Vanonzi Mambo ano ivavo vakauraya baba  
vangu, ini kuitiswa nherera here aa "*

anochema Jemedza neshungu  
ndokunyararidzwa.

*"Murume haachemi, chitenda vadzimu vako  
kuti urimupenyu ndakakurera chasara kuti  
ndichikudzidzisa zvasara pangu  
ndichipedza, sezvo wanzwa kuti une basa  
rakakumirira kureva kuti nguva hatichina,  
uye vati utsvake munhu akandiuraya  
handikuudzi kune muzida wacho rava basa*

*rakowo iroro. Kana wazosvika kumuzinda iwowo unyatso tarisisa mwana werimwe Jinda akanyorwa pachidya dendedzwa nemufananidzo webakatwa rakaita serangu iro, waona izvozvo wobva wazviva kuti wasvika mumuzinda wemhandu dzako zvakanwanda uchazviwanirako".*

Anotaura Chabhanga.

***"Mukasandiudza ndinovawana sei chingotaurai ndigare ndaziva kune muzinda wacho uye Zita ramambo vacho".***

*"Tzvo handikuudzi ndiro basa rako wotoshinga semurume"*

anotaura Chabhanga.

Jemedza anosimuka ndokumbundikira Chabhanga anotaura nezevezeve achitenda nekurerwa kwaakaitwa, izvi zvakapa nyemwerero kuna Chabhanga.

Vanozorovera matama pasi ndokurara.

Chabhanga anomuka mambakwedza chaiwo ndokusiya Jemedza akavata. Anotora dehenya remhembwe raiva mubako umu ndokubuda panze achibva asvuura rwodzi rwemuswati dokukwira mumuti waiva padyo ndokusungirira

dehenya riya zvakasimba kumadya husvu chaiko. Apedza anotora tsvimbo yake iya yaayiveza ndokuipedzisa kuvezha anobva ayisa mufananidzo webakatwa riya pamwe nedendenedzwa.

Achipedza izvi anosimudza chirongo chaiva nemvura ndokudira Jemedza apa yaitonhora nekuti yainge yararairi panze. Jemedza anoita kuwaruka ndiye dzi-I kwakadero uko.

***"Murume haavati seakapedza nhamo dzake tora museve yako unditevere nekuchimbida"***

anotaura Chabhanga ndokubva atotendeuka achibuda mubako.

*"Madii kundimutsa zvakanaka pane kundidira mvura kudai asi hamuchandidi pano kani"*

anotaura Jemedza.

***"Ita zvandareva nekuchimbida haisi nguva yekusekererana ino, dayi ndisingakudi ndakakuuraya kare nhasi ndipo pauchaona kushata kwangu kwese tora museve yako netsvimbo yako iyo ndaiveza wakavata"***

anotaura Chabhanga achitotseta tsvimbo iya kuna Jemedza iye ndokutorawo yake ndokufamba akananga kunemuti uya

waasungirira dehenya remhembwe  
kwakuvhuna shamhu yemutondo  
isingavhuniki, Jemedza akabva asvikawo  
uye zuva rakabva rativhu-u.

***"Jemedza tarisa pamusoro pemuti uyo  
uri kuonei"***

anotaura Chabhanga akatendeka mumuti  
muya.

*"Mune dehenya asi handisi kunyatsoona kuti  
ndere mhuka rudzii".*

***"Kuziva kana kusaziva hazvichina basa  
chikuru waona, ndoda kuti museve yako  
yose ibaye dehenya iroro, ukapotsa  
ishamhu mhatu pamuseve umwe.  
Ukapotsera gumi badzi imwe isa padivi  
wobereka dati kumusana uchiivhomora  
kumusana ita tione nekuchimbida  
hazvisizvo zvega zvatoda kuita"***

anotaura Chabhanga achitwasanudza  
shamhu yake achiibvisa zvinobaya  
nebakatwa rake.

Jemedza anotora miseve gumi ndokuisa  
kumusana umwe achibva ayisa pauta  
anomira akatarisa dehenya riya  
ndokuuregedza museve achibva apotsa,  
izvi zvakashatirisa Chabhanga ndokubata



Jemedza ndokumurova shamhu nhatu dzakasimba kumusana.

***"Usachema zvako pfura zvakare".***

Anotaura Chabhanga.

Jemedza anovhomora umwe museve ndokuuregedza achibva apotsa zvekare, achibva arohwa zvekare misodzi yainge yava hova mumatamba.

Anotora umwe ndokupotsa zvekare, achibva arohwa zvakamurwadza ndokuumburuka pasi achibva agarapasi.

***"Chabhanga wadii kundiuraya zvakana, urimuroi akafanana neakauraya baba vangu chipfura wega dehenya rako ndavaku....."***

Haana kupedzisa muromo wake akabva arohwa dzimwe shanu dzakasimba.

***"Chindiregererai baba ndaposhwa kutaura nekurwadziwa chiregai ndiite handichazviite"***

anotaura achibva asimuka ndokutarisa Chabhanga achibva adzungudza musoro wake, ndokutarisa dehenya riya anovhomora museve mudati ndokutsveta pauta anouregedza ndokubva abaya dehenya riya Chabhanga ndokuuchira. Yose yaiva yasara misere hapana yaakapotsa. Izvi zvakafadza Chabhanga.

***"Tora svimbo yako uyitarise".***

Anoitora ndokuitarisa anoona mufananidzo  
sewakanga amboudzwa manheru kuti  
ndiwo une mwana wejinda ramambo  
akauraya baba vake.

*"Ndauwona mufananidzo wamanga  
muchireva mauro".*

***"Tsvimbo iyoyo pose pauchange uri  
usaisiya, ndichakupa zvekare pfumo  
rangu ririmubako asi hauna kumbobvira  
wariona, zvakawanda ndichakuudza  
izvezvi turura dehenya iro netsvimbo  
iyoyo usapotsa ukapotsa".***

Jemedza anoiposera anokubva arova  
dehenya riya richibva raita kudzungenyeka.

*"Yaa wava murume hande kubako ndine  
zvandinoda kukupa ikoko".*

Vanodzokera kubako Jemedza ndokusara  
pamusiwo Chabhanga anopinda mukati  
ndokutora pfumo rake raiva rakamonerwa  
nedehwe, ndokuzatora chuma chaiva  
munechimwe chitende nerimwe bakatwa  
kwakubuda mubako muya ndokuinda paiva  
naJemedza. Anosviko mutambidza pfumo  
riya rainge rakapinza semunzwa wenungu,  
apedza anotorachuma chiya  
ndokutambidza Jemedza zvekare chaiva  
chekuisa muhuro

***"Chuma ichi ndakachipiwa namai vako kuti ndizokupa, iri bakatwa nderako zvekare "***

anotaura Chabhanga.

Jemedza anotora chuma chiya ndokubva achifunda muruoko ndokubva apfekedzwa muhuro naChabhanga.

***"Pfumo iri ndiro richabaya muvengi wako uye ariye zvekare muvengiwo wangu, ini nyama dzangu hadzichadi ndirikuona ndisisina upenyu pangu ndasakura ndikazunza tarisa uwone ndakura kana ndafa unondiviga mubako mangu muno unongovhara musiwu chete ini wondimonera nedaunha rangu riya ratinofuka..miseve yose unotora nenhava yangu iyo "***

anotaura Chabhanga.

***"Asi makuda kutofa kani mashoko enyu munhu asina kumborwara here baba nyararai nyaya dzenyu idzodzo "***

anotaura Jemedza.

***"Kuti uzoziva kuti munhu anofa sei huya kuno uwone "***

anotaura Chabhanga achitotendeuka ndokupinda mubako anotora daunha rake ndokuwaridza achibva avata akatarisa

mudenga.

*"Bata maoko angu atevedze muviri wozobata makumbo oti twi-I wapedza wondivhara kumeso, ita izvozvo tione nekuchimbida".*

Jemedza akashaya kuti zvinorevei akabva ayita zvaaive awudzwa anopeta maoko ndokupeta mambo ndokuzopedzisira nekuvhara maziso. Nguva iyoyo Chabhanga akabva angofema kamwe ndiye sarai ndiko kwakava kufa kwaChabhanga.

***"Baba ndapedza chimukai mudiudze kuti ndizvo here zvandaita"***

anotaura Jemedza ndokubva agarapasi. Chabhanga anotoranguva asati amuka Jemedza anoyedza kumutsa Chabhanga asi chainge chavachando. Jemedza anoona kuti ukundiko kufa kwemunhu anobva ayikwetsura nhere yakavharisa bako sere asi hazvina chazvakabatira. Anoputira Chabhanga nedaunha riya ndokubva ayita wekuzvuva sezvo ayisagona kumusumudza ndokumutsveta mujinga jinga mebako nechemberi kwaro.

***"Baba makabata basa guru kwazvo asi mafiro amaita aita kundiredza nemavara seshato asi ndinoti zororai murugare Chero matadza kundiudza"***

***kumuzinda kwemhandu dzangu asi  
nebasa ramakaita ndinotenda  
mondivhenekerawo pandichafamba uye  
muhondo dzemberi".***

Ayitaura mashoko aya akagwadama  
ndokuzosimuka anatora nyama yose  
ndokuisa munhava ndokutora miseve yose  
yaiva mumba umu ndokuisa mudati rake  
ndokutora tsvimbo pamwe chete nepfumo  
riya raaiye apiwa ndokubuda nazvo panze,  
bako iri raiva mujinga megomo anobva  
atakurazitombo ndokuvhara musowo  
webako achipedza anobva apanama  
nemabhaka anatora mumwe museve  
ndokubaira pamusiwo ndokutora ivhu  
achibva arirudza ndokutora chibakwe  
chefodya achibva ayirudza pasi ipapo  
zvekare achipedza ndokubereka dati rake  
nenhava yaiva yakazara nyama pfumo  
netsvimbo zviri muruoko ndokubva ananga  
nekumavirira apa zuva rainge rorova  
nhongonya.....



## CHAPTER 12

---

### Kumuzinda kwamambo Dzimbarimwe

Makumbi akadaidza vana Dzimbarimwe kuti vachipinda muchiimba ichi, vakabva vapindawo ayiva kumberi ndiDzimbarimwe uyu Dzitiro ayiva kumashure. Vakapinda muimba vachiuchira asi maiva nerima guru kwazvo, pavakapinda makabva maita chaedza asi rimwe divi rainge riinerima.

Vakanongedzerwa pokugara namakumbi paiva padehwe reshato ndokunzi vagare

vakapfunya zvibondokoto. Zvino sevanhu vanga vakura makumbo avo akavarwadza kufonyora asi zvokuita paiva pasina sezvo ndivo vainge vazvipira saka vakangoshingirira zvakadero nekuti hairemerwi nenyanga dzayo. Makumbi ayinge akagarawo nechepamberi pavo aripanerakewo dehwe raiva rebere uye ruvara rwaro rwaiva rwutema. Toropito ayinge akagara kuseri kwamakumbi uko kwainge kwakaita dima asi chaingoonekwa paari ibendekete rekuruboshwe zvichidzika negumbo rekuruboshwe divi rose rekuruboshwe ndiro raiwoneka asi musoro nedivi rerudyi zvaiva mudima izvo zvaireva kuti makumbi ndiye ayiva pakati pavo.

Panguva yose iyi mambo naDzitiro vainge vachiri kuuchira ndokubva vazonyararidzwa naMakumbi,

***"Sekuru vati chii chariuraya zizi Mambo wangu"***

anotaura Makumbi akarereka musoro wake kunana Dzimbarimwe.

*"Ndiri mwana waDzimbarimwe ndakasiwa nababa vataura mashoko ekuti ndizosvika kuna Toropito andipe masimba ekunayisa mvura ndomene, masimba ekuona zvinofunga munhu uye ekuona zvirikure kunyanya zvakavanzika uye ndinodawo*



*kuita mufumi kudarika mambo Zvinavashe "*  
anodaura      Dzimbarimwe      ndokubva  
anyarara.

Makumbi anoisa musoro Kuna Toropito  
ndokumusvitsa mashoko ayinge ataurwa  
naDzimbarimwe zvino ndokubva Toropito  
akabva      apindura      awo      mashoko  
akazosvitswa zvakare naMakumbi kuna  
Dzimbarimwe.

*"Hanzi nasekuru zvawataura zvitete pano  
ndipo pamusha wazvose asi panongoda  
makwati nedanga renyu chete kuti zvose  
zviitwe asi vati zvinoda munhu anehana  
yakasimba, wazvipira here zvawatanga izvi  
Dzimbarimwe "*

anotaura Makumbi.

***"Danga riripo taurai henyu kuti  
rakamisa sei danga racho uye kuona  
ndasvika pano ndazvipira "***

akadero Dzimbarimwe.

*"Regai ndinzwe kuna sekuru kuti danga  
vanoda rakadiyi",*

anotaura achidzosa musoro kuna Toropito  
uko kwaakamboita nguva refu akadero  
ndokuzotarisa kwaiva nana Dzitiro.

***"Zvawakumbira ndezvoupenyu hwese  
uye wataura zvinhu zvakawanda  
zvaunoda zvino pane zvose zvawataura***

**panoda mombe makumi mashanu  
nembiri uye zvose zvinoitwa kana  
mombe dzava pano "**

akadero makumbi izvi zvakaita kuti  
Dzimbarimwe naDzitiro vamboita  
kazevezeve ndokubva vazotarira kwaiva  
naMakumbi,

*"Danga riripo sekuru mangwana chaiye  
tinouya naro "*

akadero Dzitiro ndokubva Makumbi ataira  
kwaiva naToropito ndokubva achidzosa  
musoro pakati.

**"Kuti zvose zvawataura zviitike hanzi  
Dangwe rako rinofanha kunge riine  
mukadzi saka zvaranga risati raroora  
chidzokerai rindoroora mukadzi  
pamuchadzoka nedanga muuye  
neDangwe renyu uye muuye naye asati  
ayita bonde nemukadzi wake sezvo  
anofanha kuzomubvisa humandara kana  
abva kuno ndipo pachaiswa masimba  
ose asi achishanda kubva kumukadzi  
wake zvichisvikira mumusoro menyu  
mambo ndimi munenge muchiona zvose  
mega, hupfumi wavamo mumuzinda  
menyu, kana muchiri nechokuda kutaura  
mungataura kuitira kuti Sekuru vasare  
vachiziva zvokugadzira "**

akadero Makumbi.

*"Pane jaya rangu rakauya rakanyorwa  
pagumbo mufananidzo webakatwa zvino  
munhu akamunyora akasiya ataura kuti  
tigare takaringa nzira Jemedza arikuuya  
zvino ura hwava mumaoko"*

akadero Dzitiro ndokubva Makumbi  
asvitsa kuna Toropito pasina nguva anga  
adzosa musoro wake.

***"Panhau yaJemedza hanzi idoko chose  
munowedzera mombe shanu sezvo  
tinenge toto uraya Jemedza wacho nekuti  
murandarume iyeye haana kumira  
zvakanaka munoparadzwa mose hongu  
inyana asi kasisi kutsonga hakasi  
kanyana",***

anodero Makumbi ndokubva agashidzwa  
chimwe chirongo chainge chakazara mvura  
asi chaisimudzika zvacho  
ndokuchirerekesa kunanaDzitiro.

***"Ndiye Jemedza uyu arikufamba apo  
mwana wemunhu asina mhosva  
wamakauraya makare kare zvino pfumo  
rake rakasimba kudarika pfumo rako  
Dzimbarimwe, kana muchiri  
kurangarira jinda rainzi Chabhanga  
ndiro rinemabasa akatakurwa nejaya iri  
uye tarira Tsvimbo yaakabata pane***

***mufananidzo uripo hausiwo here  
wakanyorwa pamwana wako, zvino  
zvizhinji sekuru vatidanga mberi zvole  
togadzirisa, nhasi varikutoswera  
vachigadzira makona ako dai kwanga  
kusiri kuti unofanha kunge uripo  
nedangwe rako richiroora taiti wawauya  
naye adzokere anoita kuti aroore iwe  
tosara tichiita basa asi hazviiti zvino  
mungachidzokera asi mukaita mazuva  
mashanu musati madzoka uyo  
murandarume anonzi Jemedza  
hatizomukwanisi kudeura ropa rake  
nekuti zviri paari zvikuru "***

akadero Makumbi ndokubva adzosa  
chirongo chiya icho chavaiwona mujaya  
ayifamba akabereka zvombo zvake  
kumusana akabata bvumo netsvimbo  
mumaoko ake.

Vakabva vazowoneka uye vakavimbisa  
kudzoka rechimangwana ndokubva vanzi  
zvombo zvavo indai munotoro pamazvisiya  
zvisineiwo vakasvika zviripo  
ndokumamedza masango vakananga  
Kumuzinda.

*"Nhai Dzitiro Chabhanga tingai ayiva asina  
mhosva here uye tisu takamuuraya here  
paya "*

vakadero mambo vari munzira kudzokera  
kumuzinda,

***"Ipapo ndatadza kunzwisisa pamwe mashoko akataura Chabhanga aya ekuti handina kuita neune kubaya Temba ayiva echokwadi uye pamwe kwaakazotizirawo anenge akazonofa asi Jemedza avakutaurwa nezvake ndiye avakundinetsa kuti ndiyani pamwe akaita mwana neumwe mukadzi"***

akadero Dzitiro.

***"Toropito ndinoziva kuti zvose anozvipedza izvi rega tifambise tiwane kuita basa iri nguva ichipo nekuti zvechokwadi muzinda washata"***

vakadero mambo ndokubva vamboidzeya nyaya yaJemedza dzamara vapinda mumuzinda zuva rarereka umo mavakasvika nekuridza hwamanda kuti Temba achitsvaka wake wekuroora.

Yakaridzwa naToro hwamanda yekudana munhu wese vanhu vachinzwa izvi vakaita sevachavhunika nekumanya vakananga padare.

***"Pamusoro ndovimba mose murikuziva zvamadanirwa zviya zvatakagurisirwa munzira saka vanasikana vose simukai multe mutsetse apa mwanakomana wamambo ashare waanoda sekutaura kwatamboita"***

akadero Toro achibva atanga kufamba

famba bvumo richibairwa pasi.

Vasikana vakasimuka asi hana dzavo  
dzaingorova sezvo hapana ayida kuroorwa  
naTemba nekuda kweziso rembudzi  
raayiva akaiswa iro raityisa chero  
kumutarisa kumeso kwake chero masikati  
uye kana huri husiku kutyisa kwacho  
kwaitowedzera sezvo waiwona kutaima  
taima murima riri ziso rake. Vasikana  
vakaita sekuudzwa kwavo ndokumira  
vakaisa zviso zvavo pasi zvino Temba  
akachisimuka ndokutanga kufamba achiisa  
meso ake kutsvarakadenga dzainge  
dzakamira.

***"Munhu wese simudza musoro wako  
musade kundigumbusa ayizve-e !"***

Vakadero mambo vachinge vasimuka  
vakateverawo paiva nemwana wavo zvino  
vasikana meso akabva achisimudza nekuda  
kwekutya kunyanya vaininge vadarikwa  
naTemba vaininge vofara kuti tapukunyuka.  
Hongu ayiva mwana wamambo asi kugara  
nemunhu anotyisa hapana ayida.

***"Ndoda kuona maziso enyu panze  
nyemwererai kwete kuita sekuti makafunda  
mapfura mumuromo kunge mbudzi"***

vakadero mambo vachinongedza umwe  
musikana asi ayinge atodarikwa hake  
negejo, zvino vasikana kwainge kwava

kungoteedzera uye hapana kana akati bufu  
kune wese ayiva padare apa.

Akafamba Temba ndokusvika pane  
wechitatu kubva kunewekwekapedzisira  
uyo ayiva mwanasikana waToro asi ayiva  
mudiki ayinge akasiyana naTemba  
nemakore masere pakuberekwa uye  
musikana uyu parunako ayiva  
tsvarakadenga, hapana chaayishaya pane  
zvokudya sezvo ayiva mwanasikana  
wejinda guru ramambo akamira paiva  
nemwana uyu ndokubva musikana ashatisa  
chiso (**kufinyamisa kumeso**) asi Temba  
akabva anyemwerera ndokuda kumubata  
ruoko asi musikana akanzvengesa ruoko  
rwake ndokubva Temba ayita zvechisimba.

***"Vamwe mose mungachigara zvenyu pasi  
ndawana chido chemoyo wangu"***

akadero Temba ndokubva vasikana vagara  
pasi umwe neumwe ayingotura befu kuti  
tabuda murutsva, ndiko kukurukura hunge  
wapotswa.

Toro kubva ruva rakataurwa namambo kuti  
vanoda kuti mwanawavo atsvake musikana  
wekuroora akaona zvakakodzera kuti ayite  
mukwasha wamambo afananewo naDzitiro  
sezvo ayinge avakuona kuti Dzitiro ava  
kutatora chigaro chake zvishoma  
nezvishoma iye aripo sezvo pose painge  
pongofamba mambo vainge vofamba

naDzitiro asi vachisiya Jinda guru  
ravaifamba naro kubva makare makare ose.  
Toro ndiye ayiva zvakare jinda guru kubva  
baba vaiye Dzimbarimwe vachiri kutsika  
bundo richimuka asi zvainge zvoitwa  
panguva iyi ayinge asingachazvifariri.

Toro ayinge asara nemwanasikana umwe  
chete ayinge asati aroorwa uyo ayinzi  
Gamuchirai uye vamwe vose vainge  
vakaroorwa kare vatovawo nevakwasha  
vavo zvino Gamuchirai mwana uyu ayinge  
achiri mudiki ayine makore gumi nematatu  
okuberekwa. Toro akafunga kunoonwa imwe  
chembere yaivawo kuneumwe muzinda iyo  
yaayiziva nenyaya dzemushonga ndokubva  
anoipira nyaya yake kuti anoda kuti  
mwanawake aroorwe nemwanakomana  
wamambo ndokubva apihwa mushonga  
wekuti anoisa muchikafu chemwanasikana  
wake uye kupamwanasikana wake azore  
kwemazuva matatu izvo zvakanzi  
nechembere iyi mushonga uyu  
pachangoonekwa mwanasikana wako  
nemwana wamambo uchaita kuti  
mwanakomana wamambo abve ada mwana  
wako kweupenyu hwese.

Toro akapihwa mushonga uya kwakudzoka  
kumuzinda ndokubva apa mwanasikana  
wake kuti ageze nekuisa muchikafu chake  
uye akamunyepera kuti pane denda rinoda



kuuya pauri izvo zvakaita kuti  
mwanasikana ateedzere zvose  
zvaakaudzwa nababa vake. Musi uyu Toro  
ayingokwenya mhino nekasiyanwa  
ndokuzofara paakaona mwanasikana wake  
asarudzwa ndokubva aziva kuti avapedyo  
namambo uye akaona zvakanaka kuti  
oyindewo pedyo naTemba sezvo ndiye  
mukwasha wake uye ariiye zvakare  
achazотора humambo kana baba vake  
vasingachatsiki bundo richimuka.

Arimukufara kudero chero ayisazviratidza  
hake akaona chiso chemukadzi wake  
chichiratidza kurambirana nezvainge  
zvaitika uye akamuona zvakare  
achidzungidza musoro ukuwo Gamuchirai  
ayivhizura maoko aTemba kuda kuzvibvisa  
mumaoko ake asi akatadza.

***"Hukama hwaramba kuputsika vadzimu  
vedu vasarudza kuti zvataingoita  
zvirambe zvakadero uye zviwedzere  
kutodarika ipapo"***

vakadero mambo vachitambanudza ruoko  
rwavo kunaToro uyo akabva anyemwerera  
ndokubva vambundira kwakuzoregedzana  
apo Toro paakaona mwanawake achida  
kumunyadzisa.

***"Gamuchirai"***

akadero neinzwi rakazara hasha izvo

zvaiziikanwa naiye Gamuchirai kuti baba kana vadero panotsva demo pachisara mupini ndokubva arega zvaayiita.

***"Mambokadzi werino dunhu munenge mavaona, imba yangu naToro yawedzera kubatanidzwa vamwe mose mungachiinda henyu asi mai vemwana nababa vemwana tonosangana kuimba yehumambo"***

vakadero mambo ndokubva vanhu vapararira uye zuva ndokupindawo munaamai varo.

Toro nemukadzi wake na Gamuchirai, Temba, naivo mambo uye naDzitiro uyo akanomira semunyai vakabva vaimba kuimba yehumambo asi Dzitiro naMambo naTembera vakambosara vakamira voga vachitaura zvavaitaura ndokubva Dzitiro azopinda uye mambo nemwana wavo kwakuinda paneimwe imba yainge yakatarisana neiyoyi,

***"Mukwasha ati anoda kubvisa pfuma zvino ati motaura pamunoda kuti pakakura sei"***

akadero Dzitiro asi Toro haana kumbosvoda akabva ati anoda mombe gumi nembudzi shanu ndokubva Dzitiro ayinda kwaiva namambo uye Toro nemukadzi vakasara vakanyararidzana

pasina ayitaura.

Dzitiro akainda kwaiva namambo umo mainge mazova navatete vaGamuchirai pamwe chete naGamuchirai wacho ndokunotaura zvainge zvataurwa asi mambo nekufara kwavainge vaita nekuroora kwemana wavo vakabva vazobvisa mambe gumi neshanu nembudzi dzainge dzataurwa izvo zvakanotinhwa naDzitiro kwakuvata zvava kwaToro uye musi uyu Gamuchirai akanzi ambondovata kunaamai vake achirairwa ozouya mangwana kumazuva rovira.

Mambo vachipedza izvi vakabva vadana Dzitiro kwakumuudza kuti atsvake machinda gumi achatinha mombe dzekuinda nadzo kwaToropito vaidakutobuda kuchingoti zvarara sezvo vaidakusvika zuva richibuda.

Zvisinei vakazoti kwasviba ndokutorana vari vatatu Dzitiro Mambo naTemba pamwe chete nemachinda ekutinha mombe ndokubva vapinda munzira uye mombe dzaisava dzenhamo sezvo vainge vanodzirozva kwamambo Pasihariguti mazuva ayinge akapfuura zvino vakachifamba vonanga kwaToropito.

## **KUPERA KWECHITSUKO 12**

## CHAPTER 13

---

Zvairwadza vaiwona asi vaisaona hapana  
chaivarwadza vainge vatori  
mumutambarakede. Muviri wamambo  
Zvinavashe wainge washanduka  
kuperezeka sevanemapere mbudzi.  
Vakawanda vainge vongokwenyana vamwe  
mahon'era ekuti tichanzwa kuti mambo  
vedu vadona vakafa kana kuoma mutezo.  
Zvose izvi zvaikonzereswa nepfungwa

dzaifunganya nenhau yenyanga yavo iyo yainge yakabata muzinda kuti pasava nekugeda geda kwemeni sezvazvainge zvavepo. Panguva iyi Mambo Zvinavashe vainge vagere muimba vayo yehumambo mai Pedzisai vainge vakazembera madziro esasa asi hope dzainge dzovakurira asi nekuda kwe murume wavo ayinge agere vakaona kuti hazvingaite kusiya murume agere. Vakuru vaisanyepa pavaiti vaviri vachava nyamaimwe ndizvo zvainge zvoita Mambo Zvinavashe ne svovi yavo mai Pedzisai.

***"Murume wangu makore afamba muchingo zvidya fungwa nguva nemisi. Musingavati nekuda kwenyanga yenyu iyoyo mati ichawanikwa here Musiyamwa".***

Anotaura mukadzi wavo.

*"Mukadzi wangu izvi ndezvedzinza iwe uri mutorwa nazvo izvi kubva bambo vangu vachirimambo havana kumbobvira yashaiwa nyanga iyi, baba vangu chaiva havana kubvira vashaiwa nyanga iyi, nhasi ini ndini ndinozoti nyanga ndaishaiwa ndakamira sani uye ndirwo rufu rwangu irworwo ndinenge ndisisina makore akawanda ekurarama nekuti ndakoniwa chirangano. Uye pakadarika makore maviri*

*ndofanirwa kuchera mvura yekuchitubu  
ndoisa munyanga imomo yovata irimo  
ndoziwa avamangwana acho, izvi zvinoita  
kuti ndirarama saka apa zvaremera  
kumusoro setsvimbo mukadzi wangu zano  
chaira handina, mazano marairanwa uye  
pangwa uyine rako saka wotondirumawo  
nzeve ini ndapererwa".*

Vanotaura mambo misodzi yavo  
yakanjenga mumaziso.

***'Ini semutorwa handikwanipo sezvo  
ndezvemhuri yenyu ndoona sekuti Dari  
kana Madzambagate kunyangwe  
dangwe renyu Pedzisai anokupai  
mazano akanaka nekuti ini kuona  
kwangu nyanga pane pairi  
pakavanzika".***

Vanotaura mai Pedzisai.

***"Rega ndigotaura naye Pedzisai  
mangwana ndonzwa dama rake kuti  
rakadii rega ndimbotsivama  
zvishomanana nekuti jongwe rekutanga  
ndanzwa kuchema kwaro nhambo  
dzanguvaira svovi yangu chiswederwa  
padyo ndazviona kuti unondida mai  
Pedzi".***

Vanotaura Mambo Zvinavashe ndokubva  
vatovata zvavo.

Mangwana acho nguva dzemadziya  
mushana, Pedzisai anopinda muimba  
mamambo ndokuvamutsa asi akaona  
mufaro wavo wakamhova semoto  
wemashanga.

*"Pedzisai mwanangu wanatsa ukauya,  
zvawadai wakura ndiwe unotondibatsira  
pazvizhinji dayi ndiine vanun'una  
ndaisachema asi mwari vakandiseka  
vanun'una vangu vakaperera pasi vachiri  
vadiki nechirwere chemapere mbudzi, nhau  
yangu ndeye kuti Nyanga yedu ingava kupi  
uye todii kuti tiwone mwanangu nekuti iwe  
mangwana ndiwe uchava mambo  
ndinofanirwa kuzosiya ino nyika yava  
mumaoko ako, nekuti ndikasiya zvakadai  
vadzimu vanondiseka tarisa uwone nzara  
yapfunya chisero muno kunyange zvipfuwo  
chaizvo zvasara zvinoverengeka kureva kuti  
ndiko kupera kwazvo zvatarangana  
semazino eharahwa meso ako ari kuona "*

vanotaura Mambo.

***"Baba ini ndine nhau yekuti imi  
mukabvuma nyanga inogona kudzoka  
nekuchimbidza, uye izvozvo zvinoita kuti  
machinda edu awane simba rekuitsvaka  
zvimwe kuda itori nemamwe machinda  
enyu ipapa kana kuti vanoziva kwairi,  
nekuti isu zvatirisu takazvirasira nyanga  
indomene haichemedze, wekuti nanga***



**kuti tipumhe hatina. Dadzvo rangu  
riripakuti handiti munoono kuti Yemurai  
akura yavenhandara uye runako hapana  
angakwikwidzana naye mudunhu rino  
wave chikuku chobvira kuti vayeni vadye.  
Saka imi samambo mochiudza machinda  
ose kuti awana nyanga iyi momupa  
mwana wenyu kureva Yemurai. Apa  
tinenge tafananidza Yemurai senzungu  
yakazorwa dovi, munongoziva kuti gonzo  
rikanzwa munhuhwi uyu rinouya  
richimanya rega richisvika robva  
rabatwa neriva "**

anotaura Pedzisai.

**"Wanyanya kutauro nemadimikira  
mwanangu ndijekere zvinomwisa mvura "**

vanotaura mambo vachipukuta mhanza  
yavo ziya.

**"Baba ini ndiri kuti nyanga ikabuda  
ririzuva iroro ramunenge maudza  
machinda enyu kuti ayiwana ndomupa  
mwanasikana wangu tozoiva kuti Jinda  
iroro rauya nayo ndiye muparanzvonga  
ndiye ayiva akainonga kana kuti ayiva  
akativandira musi uya tinenge tozoiva  
kutimuvengi wedu tamuwana dzawira  
mutsvanda kunongera hadzichanetsi "**

**"Ko zvauyine pfungwa yakanaka mwanangu  
ndiko kufunga kwamambo ikoko zvimwe**

*hazvidi machinda angu zvinodavo iwe. Saka zvotoita pano chirega ndinange kuna mai vako ndovapira dama iri havarambi ndozviziva, asi koikashaikwa tozodii nekuti apa tofanirwa kufunga mativi ose zvimwe machinda acho haatorina "*

vanobvunza Mambo.

***"Kana zvadero zvanaka takuziva kuti muvengi hamuna, uye anenge aziva kwairi nekunoitora ndiye achava Mukwasha tomupa Yemurai, nekuti nyanga iyi yakakosha uye hazviite kuti ayiwana tomuti sarudza mhandara mumuzinda yaunoda nekuti mhandara idzodzo hadzisi dzeropa renyu uye munenge matonga nefufuro udzvanyiriri chaihwo baba "***

Anotaura Pedzisai.

*"Ndarinzwa dama rako rakanaka chose, chiinda kunoshevedza mai vako vauye muno ndivapire kana ndapedza navo ndochiudza machinda angu "*

Padzisai anobuda musasa ndokubva atoinda kuimba yamai vake yekubikira, anoti ava pamusiwo ndokudirwa mvura yaiva nemakoko esadza nhembe dzose ndokubva daita sadza rega.

***"Yowe kani hezvo wondidira masadza kundivenga here Yemurai ndiri kuzviona***

***hangu kuti hausi kuda kuti mai vako vawane muroora".***

Anotaura Pedzisai.

*"Handina kunge ndakuonai mukoma kani ndiregererewo, ko ndotadza sei kuda muroora, uye angakurambai ndiyani ndakanzwa vasikana vachikurevai pataiva kumupfuku uko"*

anotaura Yemurai achiinda kunopukuta Pedzisai.

***"Watanga nhema dzako, ini handitauri kutsime uye ziva kuti handiroori kusvika nyanga yababa vangu yadzoka muno mumuzinda saka avo zviroto zveharahwa kurota ichiyamwa zvavari kufunga, ko Mai varipi ndovandirikuda"***

anotaura Pedzisai.

*"Saka anoroorwa wacho ndiyani kana nyanga isina kudzoka muruoko rwababa kana rwenyu mukoma, ndingatopikira kufa nahwo humhandara hwangu, mai vagere panze apo pamukamba apo"*

anotaura Yemuarai.

***"Ho-o totenda raibva ndichadzoka rega ndinoona mai"***

Pedzisai haana kuda kuchamira akabva atobuda ndokunoudza mai vake ndokuzodzoka kumba kwaiva naYemurai mai ndokuinda kwaiva namambo.

Mambo vachiona mukadzi wavo asvika vakabva vatomupira nhaurwa yacho. Mukadzi wavo akamboda kutsika tsika asi vakazobvuma zvavo. Vachipedza mambo vanoudza Dari kuti Hwamanda ngairidzwe ndine mashoko. Nenguva isipi hwamanda yakabva yaridzwa machinda ose akabva awungana padare akati mwiro .....

Jemedza akabereka nhava yake yaiva yakazara museve, bakatwa rake ndokuripfekera paudyu pake ndokuchibereka imwe mhava yake yainge yakazara nenyama pfumo ririmuruoko pamwe tsvimbo ndokuchifamba akananga nekumavirira apa zuva rainge rorovanhongonya. Shungu dzainge dzakamuzadza tsinga dzake dzaiwoneka kuti tare tare mumaoko mananda ari pahuma. Kufa kwaChabhanga kwakamurwadza kusvika mubhonzo. Kuisa munyu muronda nyoro ndizvo zvainge ayitirwa pana Chabhanga.

Jemedza dai ayiziva kuti muzinda wemuvengi wake urikugotsi kwake haangadai akainda nedivi remavirira. Hana yake yairova semunhu ayiinda kwaaisaziva uye munhu ari musango dema.

***"Mutoro wese warasira ini, asi  
chondiremera inhau yekuti ndirikuinda  
kwandisingazive kondikanowira  
mumukanwa meshumba apa ndichiri  
rusvava kudai"***

anotaura ega nechemumoyo make ziso  
rainge rakaringa mbari asingabwairi. Zuva  
rainge rachigara miti kuneta makumbo  
ayinge asingachadi kumberi kwake kwaiva  
negomo raiveko akabva azviudza kuti  
ndiko kwandichanoputsira matama pasi  
ikoko. Akafamba zuva richibva rati ngori  
munamai varo asi kuzororora haana  
chaakangoita kusvuura makavi ake  
ndokuisa munhava achibva afamba  
akananga gomo riya.

Mazizi ayinge otanga kurira achibvumirana  
nemapere, akaona kuti kugomo kwaita  
kure uye bvudzi rake rainge roti zhwara  
rakamira zvairatidza kuti nzvimbo yaari  
haina kunaka. Akabva atsauka ndomuinda  
pamuti wemushuma waiva pajinga  
pekanzira kaaifamba ndokukwira,  
achingopedza kukwira akagara pahunde  
anobva anzwa mutsimbo waiva pasi  
uchivhuna uswa nemiti waibva mberi  
kwaaiinda. Zuva iri ndiro rakagara mwedzi  
nezuro wacho ndipo pawakaonekwa  
neshiri.

Jemedza anobva ati kwati kwati nehunde  
yemuti kuti asaoneka asi mwedzi wainge  
watonyura kwasara vhenekera  
tsvimborume badzi. Anotendeutsa mutsipa  
wake zvishoma zvishoma ziso  
akarivhomora sechidharimbo chaona  
gonzo, kunoti ba-a ndokuona mukono uno  
weshumba yayitobudisa masiriri  
ndokubva yadzvova iripasi pamuti uyu.  
Jemedza ayinge achingokwenya mhino  
nekasiyanwa maoko ake ayinge ava  
nenhetemwa ziya ratinyakata shumba iya  
yakabva yatorara pasi paya yairatidza kuti  
yakaguta. Jemedza haana kuwana nguva  
yekuzvisunga asi rombo rakanaka nhava  
yake ayinge ayikochonora muhuro kusiya  
kwedati chete ndiro raiva kumusana,  
pfumo netsvimbo ayinge azvikochechera  
paiva neimwe hunde zvekuti zvaisadonha.  
Shumba iya ayakatozoina kunze kwava  
kuda kuyedza. Ndipo paakatozotanga  
kudya nyama yake kusvika aguta  
ndokumwa mvura yaiva muchoro achibva  
avata hope sezvo ayinge asina  
kumbodzitichwa ayinge akazvisunga  
nemakavi kuti asadonha.

Akatozopepuka zuva ravakupisa huma  
yake. Anovhunduka kuona ratokwira  
ndokubereka nhava yake ndiye munzira  
akananga nemavirira kwakadziva  
kuchambembe. Anopota seri kwe gomo  
raiva mberi kwake riya achangoti fambe

ndokuita mahwekwe nerwizi ayida mubira  
mhiri kwarwo asi rwaiva nemvura.  
Anokwidza nerwizi ruya ndokuzowana  
panerwumwe ruware paiverera nemvura  
akawona pachiita kuti ayambuke napo.  
Chaasina kuziva ndechokuti ayinge ayirasa  
paiva nemararandzwi aya anosveedza kana  
ukamatsika anoita paruware, chimwe  
zvekare rwizi urwi raiva regarwe rainge  
rakapedza mhuka pamwe chete nevanhu  
vaifuura neparuware urwu. Jemedza  
zvaakaita akatora tsvimbo yake  
ndokusvuura makavi achipedza  
ndokusungirira dati rake raiva nemiseve  
patsvimbo iyi ndokubva ayipotserera  
kumhiri kwerwizi urwu, anotora dombo  
ndokuisa munhava yake achibva ayisunga  
ndokupotsera zvekare kumhiri,  
anochizopotsera pfumo rake zvekare,  
ndokuvhomorwa bakatwa rake raiva  
muhudyu iri haana kuzoriposera hana  
yake yakamurambira. Anotanga kufamba  
achiita zvishoma zvishoma asingasimudzi  
tsoka kuitira kuti isamutora mvura.  
Nechezasi kwaiinda mvura paiwoneka  
dziva mvura yaiti ikasvika imomo  
yaisafambisa kureva kuti raiva rakadzika.

Akafamba asi hana ichikindidza nengoma  
yepandari. Kumusoro kwaibva mvura iyi

kwairatidza kuti mvura yainge yanaya  
zvikuru. Anoti ava pedyo kuti achibira  
kumusoro kwaibva mvura iyi anoona  
zidanda raiverera parainge rava kusvika  
anobva asvetuka mudenga kuti  
risamurova, danda rakabva rahakakwa  
nematombo ndokumangirapo ndiye tsvi-i.  
Jemedza ayinge avhura maziso zvino  
kusvetuka kwaakaita paakazodzika kutsika  
pasi ndipo paakairasa ipapo ndiye sverere  
pasi dhi-I hoyo wumburu wumburi  
akayedza kubatira asi zvakakona n'anga  
murapwa achida hoyo **'Yowe yowe'** bvo-o  
muzidziva riya ndiye makarasionani  
nechikara chemumvura garwe.  
Rakangoitawo zvekusvetukirawo mudziva  
iri richibva paruware rwaiva nechemberi.  
Uchiriona rainge danda chairo mumaziso.

Rakasvikorova Jemedza nemuswe waro  
nechemudumbu make umu anobva ati pasi  
nyaya. Garwe riya rinobva rashama  
muromo waro mazino ari mbezo kupinza  
kwawo. Nguva iyoyo Jamedza anobva  
afunga zvaainge akadzidziswa  
Chabhanga. Anobva nzvenga garwe riya asi  
akanyangira yaona rakabva ramuti gumbo  
mba-a ndiyetsukutu tsukutu, Jemedza  
kutiaridze mhere kwaiva kupedza nguva  
kuteya nzou neriva. Anoyeuka kuti ndine  
bakatwa muruoko rwake  
ndiyezvongonyoko nemuzasi maro chero



hazvo rainge rakabata gumbo rake. Anobva anyudza bakatwa mudumbu maro kwakadziva kugumbo raro rekumashure ndokurivhomora irowo ndokumuregedza ngumbo rake. Asi atokonya mukuze wenyuchi, garwe rakashatirwa zvikuru rakabva rasvetukira mudenga ndokudzoka mumvura rakashama muromo uku rakananga musoro waJemedza ndiye bvo-o mumvura zvine simba zvekuti makaita mafungu mudziva rose makava nekudengenyeka kukuru kwazvo zvekuti hove dzaivemo dzakamanyira mumapako adzo chinofema chose chakatiza pakati pedziva iri. Hapana kutora nguva dziva rose rainge rasvuka ropa kuti piriviri kunge rabva mumuviri wenyati .....

**KUPERA KWECHITSAUKO 13**



## CHAPTER 14

---

### Kumuzinda kwamambo Pasihariguti

Mambo Pasihariguti zuva ravasvededza pedyo machinda ekunonga Nganga mangwana wacho vakabva varongana naGwinyai kwakutuma vanhu kuti vabike doro zvirongo zviviri iro rakabva rabikwa zvino pakazoti kupera kwemazuva maNomwe rakanga raibva ndokubva vatorana naGwinyai rungwanani kwakunanga kuninga kwavo hazvina kuvanetsa sezvo Gwinyai ayinge akazorangarira rimwe zuva arikuwa Zvinavashe apo paakanzwa bambo vanova baba VaZvinavashe vachituma mwana wavo kuninga kunoisa Nganga iyi zvino akabva arangarora mashoko aakanzwa ipapo ndokubva amakutura munzeve dzamambo wake Pasihariguti.

Vakasvika pasiwo reninga ndokubva  
Pasihariguti atanga kudetemba pasina  
nguva ninga yakabva yavhurika ndokubva  
vapinda voga jinda kwakusara panze.  
Vakasvika pachitunha chababa vavo  
ndokuisa Nyanga iya pamberi pavo pamwe  
chete nezvirongo zviviri zvainge zvakazara  
doro ndokubva vatanga kutaura.

***'Ndauya pamberi penyu baba yanga iri  
misodzi yega pamatama emhuri dzose  
mumuzinda nzara yanga yatambarara  
serunyemba vamwe tikafusira, mombe  
chaidzo dzanga dzapera mumatanga  
nekufa asi mazotirangarira Nyanga  
yamakafa muchishuvira kvanayo  
yavamo mumuzinda, ndauya kwamuri  
mundisvitsirewo kune varipedyo nemi  
nzara yapere mumuzinda".***

Vakadero mambo muninga muchibva maita  
rima kwenguva refu ndokubva mazotanga  
chaedza zvisihoma zvisihoma. Pasihariguti  
ndokuona zvirongo zvisisina doro uye  
Nyanga iya yainge yasungwa nedehwe raiva  
reshato sezvo rainge rakazara mavara  
mavara vakabva vaona harahwa yaiva  
kumusiwo kweninga.

***'Muzukuru***

***kuchema***

***kwako***

***kwanzwikwa hatingaregi uchifanenzara  
nekuti hauna mhosva ropa rako  
rakachena tatarisa rudzi rwako kubva  
pauri kusvika kurudzi rwechitatu  
tashaiwa chitema asi kana  
wazo....."***

Yakabva yanyangarika harahwa iya. Zvino Pasihariguti akambomira achiti ichadzoka asi haina kudzoka akazotoona musiwo wavhurika izvo zvairatidza kuti vadzimu vapedza naye ndokubva atora Nyanga yake nezvirongo kwakubuda muninga iyo yakabva yavharika.

***"Ndanga ndotyazveMambo pamanga  
murimuninga panze panga pachiita  
mipande yandisina kukwanisa  
kuverenga kuti yarira rungani"***

akadero Gwinyai mushure mekunge vadzika gomo iri,

***"Kwanga kuri kutosimbiswa kweNyanga  
kuti ichishanda mumuzinda medu"***

vakadero mambo machirayidza kufara uye havana kuda kumbofunganya kuti mashoko asina kupedziswa kutaurwa mumuzinda panga pachida kunzi kudii.

Vakazofamba ndokubva vasvika kumuzinda uko kwavakasvika kuisa Nyanga yavo

muimba yavo yehumambo ndokubva  
vaina padare. Vakaita mazuva mashanu  
pasina charatidza kuti Nyanga yava  
kushanda zvino mambo vainge vofunga  
zvakare kudzokera kuninga asi musi  
wavarongana zvokudzokera manheru acho  
kwakabva kwanaya mvura iyo yakaita  
mazuva matatu ichinaya pasina kuzorora.

Mombe zhinji dzainge dzakawondoroka  
dzakaurawa nemvura iyi izvo  
zvakambosuwisa vanhu asi mukufamba  
kwakazoita mazuva pamwe chete  
nemakore mumuzinda namambo  
Pasihariguti mainge mava neupfumi  
mombe dzainge dzasara dziya  
dzakachizoberekana mvura yainge yava  
kunaya kubva musi wavakainda kuninga  
paya pokutanga havana kuzodzokera sezvo  
zvose zvavaishuvira zvainge zvava kuitika.  
Mukaka wakava machakwi mumuzinda  
sezvo mombe, mbudzi dzainge dzava  
kuwana bundo rakafanira zvinova zvakaita  
kuti muzinda uyu uwedzere kukura.

**Kumuzinda kwamambo Dzimbarimwe**

Zuva rakazobuda vatarisana negomo raigara Toropito sezvo mombe dzainge dzambotanga dzichanetsa kufamba husiku sezvo dzainge dzisati dzajaira. Panguva yakatanga kudziya mushana mambo vakachiudza machinda avo kuti achidzokera kumuzinda,

***"Mungachidzokera henyu machinda tinenge tasvika kwatanga tichiuya "***

vakadero mambo uye hapana akapikisa ndokubva machinda adzokera kumuzinda. Vana Dzitiro vakabva vangoti fambe fambe kwakusvika pamuti uya wavakamboudzwa kuti vatevere Makumbi. zvino vakawana pakamira majaya matatu naMakumbi.

***"Chisiyai zvenyu mombe sekuru vakumirirai nditeverei uye zvombo musiye ano "***

akadero Makumbi ndokubva atotendeuka. Zvino majaya ayivapo akabva atinha mombe achidzokera nekwadzainge dzabva nako uye Dzitiro na Mambo ndokubva vatevera Makumbi.

Vakasvika patudzimba tuviri tuya asi musi uyu vakapinzwa muneimwe imba isiri yavakambotanga kupinda musi wekutanga. Vakapinda ndokungoona zvaiva mukati zvakangofanana nezvaiva mune iya yavakambopinda, vakagariswa vose pasi vakapfunya zvisero uyu Makumbi ayinge akagara pakati paiva nedehwe dema dema

ravasina kuziva kuti ndere mhuka ipi sezvo  
rainge rakakura uye ndiro zvakare rainge  
rakagarwa namambo. N'anga yaiwonekwa  
divi rimwe chete zvino nhaurwa  
dzakachitanga.

***'Sekuru vati vafara kukasira kuuya  
kwawaita uye wauya nedanga risina  
mibvunzo zvino vati tombotanga kuita  
zvatakatenderana kuti tiite. Zviya  
pamujaya uya Jemedza wakati tiite sei  
naye?'***

akadero Makumbi mushure mokunge  
Toropito ataura makumbi ayiva muturikiri,  
*"Uyo urayai handina imwe nzira  
yandingataura"*

vakadero mambo izvo zvakavhundusa  
Temba asi N'anga yakazviona ndokubva  
yasanganisa imwe mishonga iyo yaiva  
yehushingi ndokubva yapa Makumbi  
akabva apa Temba kuti anwe sezvo  
mishonga yacho yainge yaiswa mumvura  
akanwa Temba uyo akabva abatirwa  
nehope.

***"Tichazomumutsa kana paanodiwa  
pasvika uye anenge asimbawo hana  
yake"***

akadero Makumbi. Makumbi akaisa



musoro kunaToropito ndokubva asimuka kwakutora rimwe zidende raiva nemvura kwakuriisa pamberi pamambo umo mavakatanga kuona Jemedza ariparwizi achishaiwa kuti obira nepi sezvo ayida kubira kumhiri.

Makumbi akadzosera zvakare musoro ku Toropito uko kwaakaita nguva akadero ndokubva azoudzosa kwaiva namambo akatambidzwa bvumo nen'anga iro rainge riine zvizino zvitatu kumberi kwaro zvainge zvakatesvera kwabva agashidza mambo bvumo riya.

***'Ndinoda kuti mubaye gumbo remukomana uyu rutatu sezvo anofanha kumborwadziwa negumbo zvekuti asaramba achipfuurira mberi kwaarikuinda ukuwo tichipedzisa kugadzira mhiko yatichakupai yatichaisa pamwana komana wako, mhiko iyoyo ndiyo ichazouraya mujaya uyu paachangofamba chinhambwe chiduku chingaita mazuva maviri kubva parwizi anobva asangana nechichapedza hupenyu hwake zvishoma zvishoma dzamara Jemedza hakusisina "***

akadero Makumbi ndokubva mambo vaita zvavainge vaudzwa mudende makabva mazara ropa uye Jemedza ayinge awira pasi.

Rakabva rabviswa zidende riya panguva iyi

Makumbi akabva andogara pedyo naToropito sezvo ayinge ava kuda kutaura oga uyo akabva atanga kutaura,

*'Ndava kukupa masimba ekunayisa mvura nemasimba ekuona zviri mumatehenya emamwe madzimambo sekutaura kwako "*

akadero Toropito achibva agashidza Makumbi chikari chainge chakazara mvura yainge yakasviba setsito iyo yainge yakazanganiswa netsvina hemunhu nezvimwe zvisina kuoneka kuti zviyi asi zviri mumaziso aDzimbarimwe yainge yakachena ndokubva apihwa kunzi anwe, haana kuramba asi paakapedza kunwa ayinge ongofinyamisa kumeso pahuro pake pakabva pamira rakaita zimusuva vachibva vazosvada.

*'Mhiko yekutanga tapedza yechipiri kuti zvataita zvisimbe unofanha kuuraya Mukadzi wako umwe chete wobva waita bonde naye kwemazuva matatu akafa kudero kana wapedza jinda rako rawauya naro rinofanha kuitawo bonde nemukadzi uyu kwemazuva matatu kana apedza iwe mambo mobva matora urozvi hwake motaura zvose zvaunoda wobva wauzodza mumusoro mako wapedza Mukadzi uyu haafanirwi kuvingwa asi uchamuisa muimba yako yehumambo ndiye achaita kuti uzive zvose zveimwe mizinda uye*

*uchatyikwa zvichaita mukurumbira wese  
akuona anokotamisa uso uchipfuura, chese  
chawati munhu ayite hapana anoramba uye  
mumuzinda mako muchaita magutwa  
kupinda amwe madzimambo ose, mauto  
**(varwi)** vako dzichava mhare kupfuura  
ingwe kwese kwavayenda hapana ropa  
remumuzinda wako rinodeuka "*

*yakadero Toropito ichibva amwaya  
Dzimbarimwe nemvura achishandisa  
muswe wenyati ndokubva anyarara.*

***'Zvanzwikwa here mambo uye  
munozvikwanisa here "***

*akadero Makumbi asi pakamboita nguva  
pasina adavira.*

*"Sekuru vakamirira mhinduro "*

*akadero Makumbi.*

***'Hongu ini ndinozvikunda handizivi  
jinda rangu pamati rozoitawo chimwe  
chidimbu kuti rinokundawo here "***

*vakadero mambo asi Dzitiro akabva ati  
anozvikunda asi iye mupfungwa ayinge  
asati ava nesarudzo yekuzviita.*

***'Pazvose zvandataura zvinozozadziiswa  
nemwanakomana wako sezvo  
ndichamupa masimba kudarika ako asi  
achange ayinemasimba ose aya uye  
ariye zvakare achange akabata muzinda***

**wako ndiye anonzi Gamuchirai anova mukadzi wemwanakomana wako asi vose havakwanisi kunayisa mvura uye havakwanisi kuona zvose zvakavanzika zveamwe madzimambo kunze kwako chete"**

akadero Toropito.

**"Panguva ino ndava kugadzira mwanakomana wako tichipedza matare edu uye pamuchasvika kumuzinda mwanakomana wako anofanirwa kutanga ayita bonde nemukadzi wake ukaona akawana mukadzi wake iri mhandara ziva kuti Jemedza afa uye zvose zvataita pano zvinenge zvavakushanda asi hapana zvakare munhu anozofanirwa kuita bonde nemukadzi wemwana wako chero mwanawako akazofa usatendera kuti mukadzi uyu azoita bonde "**

akadero Toropito ndokubva Makumbi asimudza Temba kwakuinda naye kuseri kwematehwe uko kwainge usingaonekwi sezvo painge pakaiswa muganhu wematehwe.

Toropito akabva akurura zvipfeko zvaTemba zvose ndokubva atanga

kumunanzva muviri wese achipedza akabva abata sikarudzi yaTemba kwabva yaisa mumuromo make kwakubudisa mate awo ayinge akawanda kwazvo izvo zvakaita

kuti sikarudzi yose inyorove izvo  
zvaakaramba akadero kwenguva refu  
ndokuzobva avhura muromo maTemba  
kwakuisa amwe mate imomo achipedza  
yakabva yapfekedza Temba zvipfeko zvake  
ndokubva Makumbi amusimudza  
kwakuinda naye paiva namambo  
ndokumuisa pasi.

***"Matare tapedza uyu mujaya muita  
zvokumusimudza achazomuka mava  
munzira, kana muine chokubvunza  
bvunzai"***

akadero Makumbi,

***"Mujaya uya mati anofa kana taita sei"***

akadero Mambo asi Dzitiro akabva  
apindura,

***"Zvanzi kana Temba ayita bonde  
nemukadzi wake uye mukadzi kana iri  
mhandara"***

akadero Dzitiro.

***"Ndizvo chaizvo"***

akadero Toropito.

Dzimbarimwe akazobva pan'anga apa uyu  
Dzitiro ndiye ayinge akadzvara Temba  
zvino vakafamba vachisimbisana zvainge

zvataurwa kun'anga uye Temba akazomuka  
vava kuda kusvika kumuzinda uye vainge  
vachifamba zvishoma zvishoma izvo  
zvakaitsa kuti vasvike kumuzinda zuva  
richivira uko kwavakasvikirana naToro  
arikuimba yamambo uko kwaayinge auya  
nemwanasikana wake Gamuchirai asi  
ayinge akazadza misodzi pamatama.  
Vakakwazisana namambo zvino Mai Temba  
vainge vakatogadzira gota  
remwanakomana wavo kurishongedza  
zvose uko kwavakati kusvika kwakaitsa  
vanamambo ndokubva vabuda nemuroora  
wavo kuinda kuimba yemwana komana  
wavo izvo zvakaonekwa naTema kuti  
mukadzi wangu auya zvino akabva atevera  
ikoko sezvo zvaayinge onzwa mumuviri  
wake ayinge asingachazvinzwisisi. Zvino  
akada kuona mukadzi wake uko  
kwaakasvika Mai vake vachitaura  
nemuroora wavo asi kupinda kwakaitsa  
mwanakomana wavo vakabva vabuda  
ndokuvasiya vari vaviri.

Temba muviri wake akautadza kuubata  
zvino akasvedera paiva naGamuchirai uyo  
waakatanga kubata bata pasina raataura  
zvino musikana akambotanga achiramba  
asi paayirangarira mashoko ababa vake  
avainge vamuudza zuva riya akanzwa

kupindwa nechando pamwe chete nekutya.  
Naizvozvo akabva azongosiya Temba  
achiita zvaayida kuita izvo zvakazoperera  
pakuita bonde ndipo pakabvira  
humhandara hwaGamuchirai kumunhu  
waayisada zvino vachipedza kuita bonde  
vose vakabva vabatwa nehope.

## **KUPERA KWECHITSAUKO 14**

## CHAPTER 15

---

Machinda amambo Zvinavashe vakaita sengoza dzirikuinda pahundi. Nenguva isipi vainge vaungana zvombo, mapfumo vakaiswa pamapendekete. Madzambagate na Dari ndivo waitenderera tenderera



padare vachitarisa angati bufu. Zingwanda ndiye ayiva amire shure kwechigarochamambo tsvimbo yake iri muruokorwerudyi. Hapana akasara kusvika kumajaya ayo ayinge avanezera gekugonakuveza migoti, nekupfirira dzimba pamwe nekuvhima akauyawo asi vakadzi vaisavepo.

***"Uko Majoko unotaurei ipapo newe Ngavi, moda kuzviidza vanani pano! Muri chii panyama yehuku".***

Anotaura Madzambagate achifamba kuinda kwainge kuine machinda aya.

*"Ngavi ndiye arikuti mudumbu mandibaya adya zvibhubhunu zvakaoma nechakata dzakaita mbishi haana kunwa mvura"*

anotaura Majoko akatarisa Ngavi uyo ayinge obinyauka semucheche aneruzoka akabata mudumbu.

***"Kufa kwemurume hubuda ura changamire wangu regai ndinzwevo dama ramambo"***

anotaura inzwi ririmunyasi uye richizhozha Ngavi.

Mambo Zvinavashe vaininge vaine imwe ngundu ine ruvara rwembada neminhenga yehanga yaininge yakaipoteredza pakati payo

ndipo paiva bedehwe reshato asi raiva dete.

***"Pamusoroi machinda angu,  
ndokumbirawo nzeve dzenyu mose"***

vanotaura mambo Zvinavashe vachiringa  
ringa mativi ose ndokubva vakosora kaviri.

*"Haingavhiiki nhau yacho pasina nevanji  
wangu Pedzisai arikupi"*

vanobvunza mambo.

***"Ndamuona kuimba yokubikira kwamai  
vake nhambo yandabva kunotarisa  
madhibhura angu"***

anotaura Runesu.

*"Urikutononoka idosimuka unomushevedza  
ndomuda pano"*

vanotaura mambo vakatarisa Runesu. Iye  
akabva ati nyamwi ndiye fiki akananga  
kuimba yamai vaPedzisai anosviko wana  
Pedzisai achidya nyaya naYemurai.

***"Mambo wangu mamirirwa kudare"***

anotaura ziso rake rakaringa Yemurai  
rairatidza rudo iyewo akabva atsikitsira  
pasi.

*"Tyawozve mambo vaunganidza machinda  
kwakanaka here ikoko asi Nyanga  
yawanikwa"*

anotaura Pedzisai achisimuka.

***"Chezivo handina, asi changanire wangu ndinofa ndayedza kuti danga redzinotsika nditsvake Yemurai ndinomuda kana ku....."***

Runesu haana kupedzisa dama rake.

***"Tzvozvo unozotaura kwete izvezvi watumwa ini sumuka tiinde uye ndagara ini newe tinehushamwari hwakasimba semukombe nechiro, mhanza nemunhu asi poda kushinga kudya irihono"***

anotaura Pedzisai ndokubva atarisa Runesu ndokuzotarisa Yemurai.

***"Ndakakuudzai kuti handiroorwi nyanga isati yava muruoko rwenyu mukoma, ndingatofa hangu nahwo humandara hwangu mujuru ukahutora"***

anotaura Yemurai achibva afamba achiinda mberi kwechikuva.

***"Wazvinzwa Runesu ukawana nyanga uyu unotora"***

anotaura Pedzisai asi Runesu haana raakataura Yemurai akabva atobuda panze ivo ndokuchizonanga kudare vachikanda nhanho.

Vanosvikogara pasi vose, Mambo vachiona kuti nevanji wavo avapo vabva vati nyamwi pachituro chavo ndiye tumbi.

***"Watanga takamirira asvika, iwe***

***Pedzisai huya ugare kuno mberi".***

Pedzisai anobva ayita zvaainge awudzwa,  
Mambo ndokubva vaindirira mberi vachiti.

*"Nhasi ndauya kwamuri nedama rakanaka  
uye rinofadza vakawanda venyu,  
chekutanga mumoziva kuti muzinda uno  
waiva wakachengetedzwa neNyanga. Zvino  
panyangarika nyanga iyi mumuzinda mumo  
mabva maita nzara huru kwazvo zvipfuwo  
zvizhinji zvakafa nekuti dunhu redu  
ravagwenga kunyangwe mhuka dzenyama  
hakuchina dzakawanda. Saka kushata  
kwezvimwe kunaka kwezvimwe. Ndazvipira  
ini nekuti ndomene haichemedzi,  
ndavakukupai basa rekutsvaka nyanga  
yangu ayiwana akauya nayo ndichamupa  
haranga yekuti ive mukadzi wake mose  
munomuziva Yemurai mwanasikana wangu  
uya"*

vanotaura mambo machinda avo achibva  
aridza mheterwa yakavharisa padare.

***"Saka ini handizivi kuti muchaita seyi  
kuti muiwane zivai kuti atanga ndiye  
achava Mukwasha wangu ndomupa  
nemombe gumi nembudzi mbiri, kana  
paine anemubvunzo ndakateera"***

vanotaura mambo ndokubva vanyarara.

Runesu anobva ati nyamwi,

**"Mambo wangu ini ndichayedzo pose pandinogona napo kuti ndiwane Yemurai kuti ukama kana hushamwari nanevanji wenyu hurambe huine hochekoche kana iyine munhu asingadi nayo pfumo iri rinomuyendesa kunyika dzimu ndapedza"**

anotaura Runesu.

**"Asi chandinoda kukuudzai kuti kana mumwe wenyu ayiwana usarwadziwa kusvika pakuurayana ndapedza mungachiinda henyu".**

Machinda akabva asimuka asi hapana ayiratidza kafara.

Runesu anonanga kuna Pedzisai,

**"Changamire wangu ndinoda kunyatso ziva kuti makaishaira papi nekuti nhasi chaiye ndinofanirwa kuvirirwa ndavamukwasha wenyu".**

**"Ndinokuratidza usatya asi tobuda kwavakutonhorera tichitoinda mukamwe kunoteya misungu yedu. Pane zimhara Riya ratinongomutsa misi nenguva nhasi ndoda kuriteyera musungo paya paya parinopinda napo"**

anotaura Pedzisai.

**"Mhara iya haidi musungo Pedzisai asi**

***inoda dhibhura chairo tikateya mana  
hatiipotsi"***

*"Semukwasha wangu ndiwe uchateya, ini  
ndakamira uchatu ndichaita basa iwe uripo  
here "*

***"Bodozve tingati rukudzo rwacho rwuri  
pai vanoona vangaseka kuti mukwasha  
wavakutamba achipuruzira mhanza  
yatezvara "***

Anotaura Pedzisai ndokuseka zvavo.

Shoko iri rakaswera rasvika munzeve  
dzaYemurai, asi haana kuda kupikisa nekuti  
ndizvo zvainge zvada baba vake uye ayinge  
ofunga kuti ndiye ayinge adero paya  
pakasvika Runesu atumwa kushevedza  
Pedzisai. Saka kuti abvunze akaona kuri  
kupedza nguva.

Kunze uchitonhorera Pedzisai na Runesu  
vanotora zvombo zvavo uta nemiseve  
pamwe netsvimbo ndokubuda nedivi  
remavirira havo dzadzadza nebani pota  
seri kwechikomo.

***"Pedzisai hona mhara iya iyo itori  
nehadzi yacho idzo asi dzatotiona  
kare,ukabata imwe yacho unoita mazuva  
uchidya ukagoti yakawanda munyepfu "***

Anotaura Runesu.

*"Wavakuda kundinzwisa nhomba Runesu tarisa rute rwangu rwabuda ndavanenguva ndichaiziva here nyama kwava kungorota chete, nezuro ndakanoteya mariva ndikabata matsvinyi maviri rimwe racho ndikabata nyoka iya inonzi Tsukukuviri ine musoro miviri iya".*

***"Saka midzimu yainge yakadambura mbereko kukufuratira kuderu. Ini ndakadzoka nebanya rimwe chete zvirinani atsunya arwa uye yatsika muchecha yamwa, ndingainzana natigere here ini bodo".***

Anotaura Runesu achibudisa makashu avo mudzinhava ndokutsvaka miti yakasimba kwakuteya madhibhura avo mana.

*"Pangu panonzi pagondo harishai, ndogona kudzibata dzose padhibura rimwe "*

anotaura Runesu.

***"Ringasabuda nekumaodza nyemba here, iwe ako maviri ayo haabati asi angu aya ndiwo anobata".***

*"Tingaswero ita nharo iyo shambakodzi yedemhe iri pachoto totenda yavira. Hona zuva parava hande ndinokuratidza patakaishaira "*

anotaura Pedzisai ndokunanga kuya

vanosvika nenguva isipi ndokuratidza  
Runesu. Asi zuva rakasvika pakupinda  
munamai varo pasina chawanikwa  
ndokubva vakanda mapfumo pasi  
vavakumirira zuva ramangwana  
ndokudzokera kumba.

Chifumi chamangwana vakadzoka zvekare  
asi havana chavakawana musu uyu mhara  
havana kudziona.

Kana vakuru voreva vanenge vaona. Zvaida  
kuzvionera pamhuno sepfodya nekuti  
chitaurirwai hunyimwa mbare  
dzokumusana. Muswe chete ndiwo  
wakatanga kuonekazvishoma zvishoma  
uchiuya pamusoro pedziva. Ndokuzotevera  
musana wechikara asi musoro waiva  
wakanyura mumvura Jemedza  
ayisatomboonekwa chinoziva ivhu. Mvura  
yakasvika pakudzikama ropa ndiro chete  
rainge ratsvuka kuti piriviri mativi ose,  
pavapaya musoro wegare unobva wati  
nyangarara pamusoro pemvura asi  
panhongonya paro rainge rakabaiwa  
nebakatwa rakaita kunyura kusara  
mubakato badzi. Jemedza akabva  
azongobudira mberi kumapeto mwedziva  
kwaiverera kuchiinda mvura ndokubva  
agara pasi asi maoko ake ayinge akabata  
gumbo iro rainge rarumwa negare mazino  
akanyura. Ayinge afema sezviya zvinoita



munhu oda kufa. Garwe riya rakabva  
ratanga kuverera richiuya kwaayiva anobva  
aribata hameno kuti simba akariwakupi  
akangoribata ndokuripotsera mhiri  
kwerwizi iye ndokutsvekutawo achinomira  
negumbo rimwe meso ake akatarisa  
chikara chiya.

Mukono unoonekwa nemavanga zvokwadi.  
Ropa raibuda pagumbo rake raichiruruka  
senhongo yabaiwa.

Anokambaira kusvika asvika pane garwe  
riya ndokuvhomorwa bakatwa rake  
ndokukambaira achiinda paiva nemuti  
wemutondo waivepo ndokusvuura makavi,  
kwakugara pasi anogura gvakava  
ndokusvinira mutowaro achibva asunga  
zvakasimba asi ropa rakaramba richibuda.  
Anodzoka ndokutora zvombo zvake  
ndokusiya zigarwe riya rakadero  
richirumwa nemhamhasi. Semunhu  
ayikamhina ayisanyanya kufambisa  
ayitofamba achiteerera marwadzo. Zuva  
parainge rogara miti akatanga kunzwa  
simba rake richipera nekuda kweropa  
rainge rabuda zvakanyanya pagumbo rake  
Asi akaramba achifamba shungu dzaiva  
dzekuti akwanisewo kuona muzinda  
wekupotera. Anopinda nemubani asi  
rainge rakaoma. Nguva iyi rima rakabva  
ramukurira ndiye tsvete mumaziso ose

Jemedza ndiye tatari tatari asingaoni  
misodzi yekutambudzika ndiyo yainge  
yochururuka paakati achidonha pasi  
akayerekana anzi hwengu ndiye rezu  
sechidhidhi chabatwa neurimbo,  
makumbo ake ose ayinge asungwa  
nedhibhura ayinge akatodzimbirwa  
paronda rake riya ropa ndokutanga kubuda  
zvekare richiyerera nemuviri wake .....

## **KUPERA KWECHITSAUKO 15**

## CHAPTER 16

---

## **Kumuzinda kwamambo Dzimbarimwe**

Mambo zvavakapinda mumuzinda zuva iri havana kugarisa muimba yaMai Temba vakabva vainda kumukadzi wechitatu uyo ayinzi Mai Sekai uye mukadzi uyu ayiva asati ayita mwana nenyaya yekunetsa kwembereko asi mazuva aya ayinge ava nepamuviri apo painge pava nemwedzi mishanu.

Vakainda uko kwavakasvika vakanogara kwenguva diki ndokubva vazobuda kuinda kudare uko kwavakawana kuine mamwe machinda uye ndiyo nguva yaka pindawo Dzitiro ndokubva vatorana kwakunanga kuimba yavo yehumambo asi vasati vasvika kuimba vakarangarira kuti vainge vamboona Temba achipinda mugota rake umo mavakabva vananga kwakusvikoona zvakavafadza moyo wavo.

Vakaona nevanji wavo achiratidza kuti akabatwa nehope asi ayiva asina kusimira aripamusoro pemukadzi wake apo pavakasvika vachida kugutsikana kuti amuwana iri mhandara here ndokubva vasvika pedyo kwakuona rora rakazara pavaviri ava izvo zvakaita kuti vanyemwerere asi pane zvakatanga kuitika

mumuviri wamambo izvo zvavasina kunzwisisa mushure mekunge vaona Gamuchirai. Vakatanga kunzwa kuda kuita bonde muziri wavo ropa rakamhanya mhanya vakamboita nguva vakayeva muroora wavo asi semunhu mukuru vakazvidzora ndokubva vazobuda muimba iyi kwakunanga kuneyavo uko kwavakasvika Dzitiro avamirira

***"Nevanji wangu mhiko dzake apedza uye zvinhu zvedu zvazadziswa sezvo mukadzi wake yanga iri mhandara "***

vakadero mambo mushure mekunge vapinda maiva naDzitiro.

***"Zvinokudzwa yasara ndeyedu iyi tiwane kuitawo chinobatika "***

akadero Dzitiro asi hana yake yaizviramba.

***"Kukudana kwandaita muno ndati tionesane kuti tosarudza mukadzi upi wekuuraya sekutaura kwaToropito "***

vakadero mambo.

***"Tpapo isarudzo yenyu mambo wangu chero wamafunga sezvo pfuma ndimi makabvisa "***

akadero Dzitiro,

***"Ndanga ndafunga kuti uyu wekunonoka kubata pamuviri unopaona sei "***

akadero Mambo asi Dzitiro akamboramba

akatarisa panhu pamwe chete ndokubva  
anzwira mukadzi uyu tsitsi asi kuti ataure  
zvakamuremera,

*"Hapana chakaipa mambo wangu"*

akadero Dzitiro ndokubva vazotaura  
zvakasiyana siyana.

Vakazoparadzana umwe neumwe oyinda  
kundodya sezvo kwainge kwasviba mambo  
ndokubva vananga kuneuya wavainge  
vataura wekunonoka kubata pamuviri uko  
kwavakasvika achipedzisa kubika

***"Nhasi mai mwana makasira kubika uye  
mabika zvinoita kuti makonzo abve  
kudzimba dzevamwe achiuya muno  
anzwa kunhuhwirira"***

vakadero mambo izvo kaiva kokutanga  
kurumbidza mukadzi uyu panyaya  
dzokugona kubika.

*"Ndomubikiro wandaingoita wani makare  
ose"*

akadero.

***"Zvanhasi wagona mukadzi wangu  
ndoda uuye kuimba huru nhasi"***

vakadero mambo vachidya apo  
pavakangodya zvishoma ndokubva  
vatowoneka,

*"Unondiwanira kuimba huru ndine manyaro nhasi"*

vakadero mambo vachibuda uye kunze kwainge kwasviba ndokubva vananga kuimba yavo uko kwavakasvika kubatidza tsvatsva yavo ndokuzvambarara padehwe ravo vakatarisa mudenga.

Vachangoti gare gare mambo vakasimuka pavainge vakavata paya ndokubuda mumba umu kuinda panze kunorasa mvura ndokubva vapfuurira kuinda kuimba yehumambo uko kwavakatanga kugadzira pavaida kuzoisa mukadzi wavaida kuuraya uyu uko kwavakatanga kugadzira vachirongedza pokumuisa.

Mai Sekai sekutaura kwainge kwaitwa namambo vakangoti kupedza kudya kwavakaita ndokubva vatevera kwainge kwainda murume wavo uko kwavakasvika kusina munhu ndokubva vavata zvavo tsvatsva ichi baka. Vakati hope dzava kuda kubata ndokubva vanzwa musiwo uchivhurwa apo pavakafunga kuti murume auya asi vakaona vari Mai Chengeto izvo zvakamunetsa kuti arikudei.

***"Nhasi izuva rako rekuvata nemurume asi chimbonovata wakagonya buda muno unoda kuti ndipone nekachando kariko aka bodo sumukai "***

vakadero Mai Chengeto neinzwi  
rineukasha, hongu mai Sekai vaiva mukuru  
asi vaiva nemuviri mudiki izvo zvayiita kuti  
vaite sekamwana kadiki kuna mai  
Chengeto.

***'Nhai mainini umwe neumwe haana  
mazuva ake here akataurwa nemurume  
uye imi munemazuva akawanda  
kupfuura edu saka zvekuti ndibude muno  
zvabvepi murume ndiye adero here  
zvekuti kune ruchando zvinopinda papi"***

vakadero nehunyororo.

*'Murume haana chaataura asi ini ndini  
ndinoda kurara nemurume nhasi manheru  
handina kuguta saka iwe buda muno  
nekuchimbida"*

vakadero mai Chengeto vachiswedera  
painge pakarara mai Sekai.

***'Muno handisi kuzobuda mainini sezvo  
jana nderangu kwete rako asi kana  
uchida murume chingovatawo ipapa  
tivate tose muno nhasi"***

vakadero mai Sekai izvo zvakatsamwisa  
Mai Chengeto avo vakabva vagara  
pamusoro pamai Sekai kwakutanga  
kuvarova, mukadzi mukuru akarohwa uye  
haana kupihwa nguva yekudzosera sezvo  
ayinge akagarwa madunduru uye  
nemuviriwo wamai Chengeto kusimba  
kwawainge wakaita zvakaite kuti mai Sekai



vatadze kupfakanyika.

Vakarohwa kwenguva refu ndokubva Mai Chengeto maziso avo asanganidzana nebvumo iro rainge riri kumusoro kwavo vose rinova rainge raiswa namambo mushure mekunge vapinda mumba umu ndokubva vabva pamusoro pavaiva kwakunotora bvumo riya.

***"Ndati buda muno Mai Sekai ndisati ndakabudisa kamwana karimudumbu rako ako nebvumo iri"***

akadero Mai Chengeto izvo zvakaisa kuti Mai Sekai vavhunduke uye hana yavo ndokutanga kurova.

***"Regedza ndibude hangu Mainini sezvo wandifungira zvakaipa asi wani ini handina mhosva newe, wandirova kunge mwana wako uye chero mwanawako wacho hausati wambomurova saizvozvi"***

vakadero vachichema uye vainge vamuka maoko vakaisa mudenga.

***"Handina kuti ita nhoroondo ndati chibuda muno"***

vakadero mai Chengeto izvo zvisina kuzopikiswa namai Sekai avo vakabva vatobuda asi vainge vokamhina vakafamba vakabata dumbu ravo dzamara vasvike

kuimba yavo yekuvata uko  
kwavakangosvika nekuzvikandira pasi  
musiwo chaiwo vakashaiwa simba  
rekusunga vakangovhara ndiye umburu  
pasi misodziyo ita rukova.

Mai Chengeto vakasara ndokudzima  
tsvatsva sezvo vaisada kuti mambo  
vasaona kuti ndivo vaida kuti vazoona kuti  
ndivo kana vapedza kuita bonde zvino  
vakadzima ndokuzvikurura zvipfeko zvole  
kwakuvata havo asi kwete hope.

Mambo vakazopedza kugadzira panzvimbo  
yavaida ndokuchidzokera kuimba yavo  
yekurara uko kwavakasvika asi vakawana  
mumba murimudima ndokubva  
vambomira pamusiwo kusvika vajairana  
nerima apo pavainge vavakuona zvisvima  
ndokuchifamba kuinda paiva nemukadzi  
wavo uyo anovawo akanzwa kupinda  
kwemurume wake ndokubva anyepera  
kuvata.

Mambo vakangosvika ndokubva vavata  
padiwi ndokubva vafambisa maoko avo  
pamukadzi wavo uyo wavakawana  
arimusvo ndokubva vaida pamusoro pake  
ndivodzvi pakuro mukadzi akambozama  
kupfakanyika asi akakurirwa simba  
nemurume zvakaiteka kwenguva refu Mai  
Chengeto ndiye kana mazobika nyemba  
modya menga.

Mambo vakafara kuti chikamu chokutanga vapedza ndokubva vabvisa zvipfeko zvavo kwakuita bonde vachipedza vakabva vapfeka kwakusimudza mukadzi wavo ndokubuda naye panze apo paiva nejengeta mambo rainge richangosvikawo kubva kunodya kuimba kwaro saka parakaona mambo vakatakura munhu harina kuita basa nazvo rakangoti mukadzi wavo.

Mambo vakanoradzika Mai Chengeto panzvimbo yavainge vagadzira iya uye havana kumupfekedza nguwo vakasiya vamuvhara nedehwe reshato kwakudzokera kunovata zvavo.

Zvakavata mambo vakatanga kurota,

*Vakarota Toropito achivagashidza musoro wegudo,*

***'Musoro uyu ndiwo waunokumbira kuti mvura inaye uye muzinda wako uyite magutwa, simba rose raunoda unorikumbira pamusoro uyu uye unonoucherera pamusoro pegomo ndipo pauchauchengetera kana chaunoda unonotaurira mugomo rauchasisa musoro uyu'***

*akadero Toropito ndokubva anyangarika uyewo mambo vachibva vapepuka kwakuona hweva hwatobuda.*

Vachingomuka vakabva vaona musoro uya  
uri pajinga pavo ndokusimuka kwakuutora  
ndokuwuisa munhava vachibva vatobuda  
kusati kwanyatsochena kudero ndokuinda  
pachikomo chaiva mujinga nemuzinda  
wavo ngokunocherera musoro uya  
vachipedza vakabva vatanga kutaura.

***'Ndauya pano murandarume wenyu  
ndirikuchenawo nenyaya yenzara  
yapfunya chisero muzinda wangu kuti  
muitewo magutwa uye mvura inaye  
pfuma iyite mamvu nemarara'***

akadero achibva anzwa kupenya  
kwakaitika ndokubva parira mupande  
wakavhara nzeve dzavo ndokubva nguva iyi  
kwawedzera rima sezvo kwainge kusati  
kwanyatsochena uye kwakuchidzaka  
muchikomo ichi ndokutanga kufamba  
vodzokera kumuzinda. Meso ayingoona  
nzira yekumuzinda chete asi amwe mativi  
kwainge kuine rima rega. Vakafamba  
dzamara apinde mumuzinda asi kupinda  
kwavakaita mvura yakatanga kukoromoka  
izvo zvakaita vamanye ndokunopinda  
muimba yavo yekuvata.

Mvura yakanaya kunze kwakangoita dima  
uye zuva rikasvika pakubuda kunze  
kwakangoita rima kuchinaya.

Temba akazopepuswa nemupande  
wakaitika ndokubva atsvanzvadzira  
paigara tsvatsva yake iyo yaakabva

abakidza mumba kwakuita chaedza. Zvino kuchena kwakaita mumba make anoona mukadzi wake achizvonyongoka zvonyongoka kunge nyoka aripanhu pamwe chete izvo zvakamushamisa asi hazvina kumutyisa sezvo mate aakapihwa aya naToropito ayiva ekumusimbisa mukutya.

Akaramba akamutarisa ndokumuona oyita kuti akasvinura ovhara maziso akasvinura ovhara maziso uku maziso acho ayiti rimwe ijena jena rimwe rakatsvuka kunge runambi rwemoto. Zvadero anomuona zvakare onyemwerera uye misodzi ndokubvawo yatabva kubuda pasina nguva yainge yaoma. Zvose izvi zvaiva mumaziso aTemba uyo akazovhunduka nemheni yakarira pamukadzi wake ndokubva Temba anowira kwakadero tsvatsva ichibva yadzimwa uye.

Gamuchirai anotiwo arikuhope kudero akatanga kurota ari musango achifamba arioga ndokubva asangana nenyoka yerudzi rweNyamafingu asi yairatidza kuti ichiri doko uye nyoka iyi yaiva yakagurwa muswe wayo uyo wairatidza kuti

uchangogurwa sezvo waibuda ropa.  
Zvakatarisana nenyoka iyi iyo yakabva  
yatanga kutiza iye kwakunzwa inzwi  
remunhu waasina kuona kuti ndiyani

***manyira nyoka iyoyo uyiuraye asi  
uchaiwona kumberi rava gudo iwe  
chingoriuraya***

rakadero inzwi riya ndokubva awona  
mberi kwake kwakandwa bvumo raipenya  
iro raakabva aritora asi kubata kwaakaita  
akabva anzwa simba mumuviri wake  
ndokutanga kumanya achitevera kwainge  
kwainda nenyoka iya paakangopota zvimiti  
zvitanu ndokuona gudo rakagara pamusoro  
pemuti kwakunzwa inzwi rakamuti baya  
gudo iroro iye ndokubva ayita kusvetuka  
ndokupotsera bvumo riya iro rakabva  
rainda rakananga gudo riya akabva  
apepuka Gamuchirai asati aona kuti abaya  
here gudo iri uye paakaepuka haana  
kumboratidza kutya nezvehope dzake  
sezvo haana kunge amboziva kuti anga  
achirota asi akangonzwa kuti nyama dzake  
dzakaneta uye kusvunura kwaakaita  
kwakaita kuti dima rose ranga ririko ripere  
ndokubva nyika yava nechaedza asi mvura  
yaingonaya zvayo zvakadero

Pakaitika mupande wakarasira Temba kure  
ndiyo nguva yaitomukawo Gamuchirai.

Mambo pavakaona kwava nechaedza chero

hazvo mvura yainge ichiri kunaya vakabva  
vasimuka kuti vainde vanoita mhiko yavo  
yechipiri chekuita bonde nechitunha zvino  
vakabuda mumba ndokuinda kuimba  
yehumambo uko kwavakasvika vanyorova  
sezvo mvura yacho yainaya  
zvemandorokwati. Vakasvikopinda  
ndokubva vabvisa zvipfeko zvavo  
kwakuinda pavainge vaisa chitunha apo  
pavakabva vasvikofugura dehwe riya  
ndokuona ndokubva vainda pamusoro  
pechitunha asi pavakazoisa meso avo  
pachitunha ndokuona vari Mai Chengeto  
mukadzi wavaidisisa nemoyo wese uye  
arimwana waDzitiro.

## **KUPERA KWECHITSAUKO 16**





## CHAPTER 17

---

Pamuzinda pamambo Zvinavashe raiva besanwa remachinda ayo ayiita kwire dzike. Hapana ayinge akagara nekuti vose vainzwawo chigagairwa kumwanasikana wamambo uyo ayiva nhosvora meso yeruzhingi.

Mambo vainge vagere muimba mavo yehumambo varivoga pfungwa dzavo dzaisava panzvimbo. Vaifunga kuti mukuvira kwaro zuva vachaona nyanga yavo yosvika nerimwe remachinda avo asi zvaiva zviroto.

Vachiona kuti rapinda munamai varo vakabva vasimuka ndokutora pfumo ravo ravaishandisa semudonzo ndokubuda vakananga padare.

Moto wainge watoveswa wava mabviravira.

Machinda avo anosvika rumwe rumwe asi ayiva akarembedza maoko.

**"Madzoko machinda angu meso angu akaringa kwamuri, hapana ayita mhanza yakanaka here "**

vanobvunza Mambo Zvinavashe.

**"Mambo wangu kana ndiriseni ndakanda mapfumo pasi mukombe wacho ngaundipfuure zvawo ndayedza kuringa asi kwanga kuri kutsvaka tsono mujecha "**

anotaura Madzambagate achitokonya moto nepfumo.

**"Haudero wachimbidza kukanda mapfumo here svinga rinorema wasvika "**

vanotaura Mambo.

**"Kana neni ndazeya nemuzinda wese asi ngoma ndiyo ndiyo asi ndichambotsvaka kwemazuva maviri pamwe ndingaita mhanza "**

anotaura Dari jinda guru ravo.

Izvi zvakafadza mambo.

**"Saka nhasi handingakuunganidzei ndinzwe pfungwa dzenyu ndotozozviita ndaona kuti matadza kuiwana handiti".**

**"Hongu "**

**"Ko Pedzisai aripi wandisina kumboona nhasi wese pamwe neshamwari yake Runesu "**

vanobvunza mambo.

***"Ndapedzisira kuvaona richarova nhongonya vangori vaviri vachidzika nekunyasi uko kudzoka kwavo handina kukuona".***

Anotaura Ngavi.

*"Zvakanaka ini handichagari asi Madzambagate newe Dari huyai kuno ndine rimwe zano randafunga pamwe ririnane toita muonera pamwe".*

Vanotaura vachitosimuka. Ndokunanga mumba mavo, Madzambagate na Dari vaiva kumashure.

Vose vanogara pasi ndokumboita runyararo.

***"Machinda angu ndoona sekuti nguva yareba Nyanga pasina ndafunga kuti mangwana zuva richingoti....."***

Mambo Havana kupedza kutaura musiwo wakabva wanzi bhewu, vose ndokutarisa ikoko vanoona ari Pedzisai nevanji wamambo.

*"Manheru baba "*

anotaura mushure mokunge agara pasi. Mamwe machinda akabva amuswedzavo sezvo mwana wamambo ndimambo.

*"Waita zvakanaka wasvika ndanguri ndakutsvaka ndikakushaiwa".*

Vanotaura Mambo.

**"Mati pangagarika here pano, ini ndinotozogara kana nyanga yawanikwa izvezvi tirikubva kunyasi uko asi masango matema "**

anotaura Pedzisai.

*"Chimwe nechimwe chinenguva yacho, asizve zvose zvinoda vadzimu kuti vatungamire. Chinzwa dama randiinaro mangwana zuva richingoti munamai varo ngori toinda kwa Majakanye zvavakuda N'anga kuti itiratidze gwara pamwe tisu takaresva mhiko ikanyura pasi "*

vanotaura Mambo.

**"Ipapo mataura dama changamire wangu zvauya sei mupfungwa dzenyu dayi zvirizvo zvatakaita kare "**

anotaura Dari.

*"Dama renyu handirirambi asi Majakanye mhiko dzake dzinorwadza, chekutanga zvipfuwo kana akati ndozvida tomupa zvipi izvo zvatarangana semazino emukweguri chakatanga ndicho chakachenjedza mai venyu vanova mbuya vangu havana kungofa here ati anoda kuti aite mukadzi wavo ndokuti vararame "*

anotaura Pedzisai.

**"Chafamba kamwe hachiteiwi**

***mwanangu rega tinoita nzwira pamuviri  
tsvimbo yaro va dapi kugara hakubetseri  
tirimurima kudai "***

vanotaura mambo.

***"Hakuna imwe N'anga yamunoziva here  
kunze kwaMajakanye "***

Mambo vanotora nguva vakanyarara  
vachifunga ndokuzoti.

***"Kune imwe inonzi Toropito asi  
arichinhambo kuti isvike ikoko panoda  
svondo rose, saka kuzodzoka kuno  
panenge potoda masvondo maviri asi iri  
padyo nemuzinda waDzimbarimwe  
togona kuita rombo rakaipa tikasangana  
nayewo ikoko kana kuti tobatwa toitwa  
nhapwa muzinda uno akautora sezvo  
aneudyirwe handei ipapa Majakanye  
ndovimba naye zvangu "***

***"Ini hangu ndichasara moinda naDari "***

Anodero Pedzisai.

***"Bodozve mwanangu, iwe haufanirwe  
kushaikwa tarisa ini ndakura  
mangwana ndimwe uchavamambo  
ndoda kuti uwone zvandinoita  
wozotevedzera matsimba iwawa "***

vanotaura mambo.

Pedzisai haana kuzoita nharo ndokubva abvuma. Izvi zvakafadza mambo Zvinavashe baba vake.

Pedzisai anobuda muimba umu hoyo tande kuimba yekubikira yamai vake nhava yake, asati asvika anobva ayita mahwekwe na Runesu shamwari yake.

***"Urikubvepi Runesu asi wanga uchitaimira Yemurai kani"***

anotaura Pedzisai achiseka.

*"Kwete ndirikubva kudanga kunotarisa kuti mbudzi dzavharirwa zvakanaka here chero dziri shanu"*

anotaura Runesu.

***"Wagona ipapo".***

*"Ko hapana ayita mhanza here akawana nyanga"*

anobvunza Runesu.

***"Nyanga haina kuonekwa, kuiwona kuchanetsa kwakafanana nekuona humhandara hwaamai, asi Mambo vafunga kuti mangwana tiinde kwa Majakanye kunobvunzira"***

anotaura Pedzisai.

*"Manje uko mukainda zvichazobuda here kuti Yemurai ndimutore nekuti uko kuziso rinoona zvirimurima kana munyanza"*

anotaura Runesu atosuruvara.

***"Wotokwenya mumwe nekasiyanwa, uye wotosimba semurume kuti umutore ini handingakupe mahara hanzvadzi yangu rega ndimboinda kunodya nhasi taswerera kutsenga makavi emupfuti"***

anotaura achikanda nhanho Runesu ndokusara akamira.

***"Saka mangwana tomukira kumadhibhura edu musati mainda kwaMajakanye"***

anotaura Runesu zvakaita kuti Pedzisai amire ndokufamba achidzoka.

***"Kwete handiti nhasi waona kuti tabvako hapana chatanga takabata, zviripo mangwana hatiindiko tombozorora, isu manheru acho ndipo patirikuinda kwaMajakanye. Pandichadzoka ndipo patichainda tose kunotarisa madhibhura edu unoti nemamanyire akaita mhara dziya musi uya dzakainda pedyo here zvotoda mazuva kuti dzidzoke"***

anotaura Pedzisai.

***"Saka ndichamirira kudzoka kwako Pedzisai"***

***"Usatya Runesu Yemurai ndewako, ziva kuti hapana munhu wandinoda sewe rimwe gore uchava jinda rangu guru iwe"***

anotaura achitofamba akananga kumba kwamai vake, Runesu anosara akamira kwechinguva ndokuzonangawo kwake.

Ava mangwana acho zuva parakangoti ngori munamai varo. Mambo na Dari Jinda ravo guru na nevanji wavo vakabva vagadzirira zvombo zvavo nenhava yaiva nemukuyu. Pedzisai anobva anowoneka Runesu ndokumuudza kuti usainda kumadhibhura asati adzoka, Runesu semunhu ayiteerera akabvo angoti

***“zvakanaka changamire wangu”.***

Mambo vakapinda munzira nedivi remaodza nyemba vaivhenekerwa neJena guru. Dari ndiye ayiva mberi Mambo pakati Pedzisai kumashure. Vakafamba mutunhu murefu sezvo MaJakanye ayigara kure, vakatozosvikano jongwe rekutanga rachirira, musha wake waiva pajinga pegomo.

***“Tisvikewo asekuru pano”***

vanotaura mambo Zvinavashe vachiombera asi havana kudairwa izvo zvakaita kutimambo vadzokorore zvakare, pakabva pabuda mumwe mukadzi akaita muchembere.

***“Ndiyaniko svikai”***



*"Ndini Zvinavashe ndakuya kuona Sekuru Majakanye nditure nhunha dzangu".*

***"Sekuru vakainda kumusha mhiri  
kwasave kudzoka kwavo ndanga  
ndakavatarisira nhasi asi vatadza  
ndovimba kuti mangwana vanosvika  
kana kuti kunoyedza vavapano".***

Inotaura Chembere iya.

*"Saka regai timire kusvika kwavo nekuti  
tidzokere tisina kuvaona hazviite."*

Vanogara kusvika kwachena, zuva  
rakakwira Majakanye asati asvika. Parainge  
rorova nhongonya mambo  
vanozevedzerana neJinda ravo pamwe  
naPedzisai kuti handei tozodzoka rimwe  
zuva. Akabva vatenderana pavainge voda  
kuchioneka ndiyo nguya yakasvika  
Majakanye ayine zvuma zvakaremba  
muhuro yake nemadeteni mashanu ayiva  
akasungwa nerwodzi rwakarukwa  
nezinhava rainge rakafuta hameno kuti  
maiva nechii. Havana kukwazisa munhu  
vakasviko pinda muchiimba chavo  
ndokupfeka nguwo dzavo dzemavara  
embada mumusoro kwakuisa nehwe  
rechidembo ndokugara parupasa  
rwenhokwe mberi kwavo kuine zvikari  
zvakanwanda wanda zvaiva zvakanabairwa  
zvimiti, mvura dzaivemo dzainge  
dzakatsvukuruka, nguva iyoyo pakabva

pasvika mumwe murume zvekara ndiye  
ayiva makumbi wake ndokumira  
pamusiwo.

***'Ita Zvinavashe apinde nekuchimbida  
nevamwe vake'***

anotaura Majakanye mhuno yake yainge  
yakaboorwa ndokupfekerwa chimuti  
ndizvowo nenzeve. Makumbi anobva  
ashevedza mambo na Dari pamwe na  
Pedzisai ndokubva vapinda.

*"Oooh hiya-hiya aa-ah shi-i-shi-I"*

anodzvova katatu seshumba Majakanye.

***'Sekuru svikai zvakanaka pane pwere  
dzenyu dzine hana nhete ndapota sekuru  
rerusaiwo ndima hana dzavo  
ndingatsemuka'***

makumbi anouchira achidetera.

*"Chokutanga ndisati ndataure ngavaise  
makwati mundiro"*

anotaura Majakanye, makumbi  
ndokuturikira saizvozvo.

Mambo vabva vapinza ruoko rwavo  
munhava ndokubudisa badza rainge  
rakapfurwa nemhizha yemandiriri  
kwakupa makumbi iye ndokuzosvitsva  
kuna Majakanye.

*"Wagona chose regai tipinde mumatare "*

anotaura Majakanye. Ndokubva atora  
hakata dzake zvimiti zviviri  
ndokuzvirovanisa katatu achibva  
azvikandira pasi chimwe chacho chichibva  
chawira pamusoro pedehenya chivangu  
Majakanye anobva asekerera.

***"Nhau yenyu ndaiwona mambo  
Zvinavashe pano ndirikuona misodzi  
yenyu pamatama nenhau yenyanga  
yeChipembere yamakashaiwa muchibva  
kuninga nanevanji wenyu Oooh hiya-  
hiya "***

anotaura Majakanye makumbi  
ndomuturikira.

*"Hongu sekuru ndizvozvo ndizvo  
zvatisumudza "*

vanotaura mambo.

***"Murikuida here kana kwete nekuti iyo  
nyanga yandirikuona haingodzoki  
pasina muripo mukuru nekuti ndiyo  
yakabata muzinda wako "***

*"Kuuya kuno kuida sekuru "*

***"Zvavakwaruri kufuka kana kuwarira,  
ndavakureva muripo wangu, handiti iwe  
waiva wakati ayiwana unomupa  
mwanasika wako, ukandipa hako iyeye***

***zvinoita. Asi kana zvisingaite imwe  
mhiko zvakare iwe haupedzi rino gore  
unenge wafa nyanga ndokuti idzoke  
mwana wako osara ava Mambo. Kana  
izvi zvisingaite ndopofomarisa nevanji  
wako. Kana zvisingaite futi wondipa  
mombe zana nemakumbi maviri  
dzakasimba nhasi chaiye chisarudza  
zvaunoda "***

anotaura maJakanye, mambo vakabva  
vaoma mate mumukanwa.

*"Deredzaiwo mutongo wenyu sekuru yose  
inorwadza iyi "*

vanotaura Mambo.

***"Handidzori tsvimbo nekuti gudo rabata  
kumeso muzukuru chandareva  
ndichocho "***

Pedzisai anobva asimuka ndokubva ati,

*"Kangembeu kurima kwandikona baba  
tozodzoka tarongeka tichimupa mombe  
dzake izvezvi hapana chekutura nekuti  
hadziko zvakona n'anga murapwa achida  
chikuru manzwa kuti iripo "*

anotaura achitobudamo muchiimba ichi.  
Mambo vanoona riridama rakanaka asi  
vakafunga zvekare kupa Majakanye  
Yemurai mumwe moyo ndokubva wati  
tanga wanotaura nemwana wako Pedzisai  
nekuti ungapedziswa.

***"Sekuru regai tinounganidza zvipfuwo tozodzoka"***

ndiwo mashoko amambo vachitosimuka pamwe naDari. Majakanye akangoshama muromo wake achidzungudza ndokubva apotsera hakata dzake kwakadero.

Pedzisai ayinge atova chinhambwe. Mambo havana kuoneka vakangoitawo sezvaita Pedzisai, Dari haana raakataura kusvika vabata Pedzisai uyo ayiratidza kuti moyo wake wava Kuna Runesu.

***"Mambo ndambokuudzai paya, mukati he he tonoono taveko hino ndezvipi makumbo enyoka, handifarire n'anga inobata mai ini, ngazvikone hazvo mimba haibve negosoro"***

anotaura Pedzisai achiratidza kutsamwa kukuru kwazvo.

*"tonotaura tasvika kumuzinda musiyamwa, tanatsa hapana yadeuka zvapo ichiri mudende"*

vanotaura mambo neunyora.

Zuva rainge ragara miti vakafamba ndokusvika kumuzinda kunze kwava kuyedza, Pedzisai akananga mugota make ndokurara, akatozomuka zuva rakwira

akatozoita zvekumutswa na Yemurai ayinge  
auya nechikafu.

**"Mukoma mukai mudye "**

*"Ndi Yemurai, kana wabuda muno  
unondishevedzerawo murume wako Runesu  
sekutaura kwake ndirikumuda "*

anotaura achimuka.

**"Saka ndozvamunotoudzana naye here "**

anobvunza Yemurai.

*"Zvirinane utorwe naRunesu pane kutorwa  
na Majakanye kuti nyanga tiwane izvozvo  
ndakaramba "*

Anotaura Pedzisai.

**"Mati chii mukoma?".**

*"Wazvinzwa zvandareva ita zvandakuudza  
toda kunotarisa madhibhura edu nyama  
ingaorerapo "*

**"Munogona kuteya kwacho here imi  
muchingouya makarembedza maoko "**

anotaura Yemurai achibuda.

*"Uchaona hako kuti ndiri hombarume  
sasekuru vangu Muchadura "*

Anobva atotanga kudya hake nenguva isipi  
Runesu anobva apinda.

**"Wadzoka nguvai Pedzisai, kungonyuka  
sehore kozuro kana kudzoka nhasi dai**

***matadza ndainotarisa madhibhura, iro zuva racho rafamba kudai tanonoka".***

*"Tofumira mangwana ndakaneta ini ndinenhau yandoda kukuudza tozoizeya gara pasi"*

anotaura Pedzisai..

Chakupa chironda chati nhunzi dzikudye. Jemedza ayinge akarezuka mawoko ake akaremba pasi. Miseve yake yose yainge wati warara pasi. Rombo rakaipa raakaita paakaregedza pfumo kuutesvero kwaro ndikokwaiva mudenga kumagadziko kwaro ndiko kwaiva pasi. Pfumo iri rakabva ramudzokera ndokumubaya pambabvu ropa ndokutanga kuverera richitevedza pfumo. Izvi zvakaitha kuti marwadzo aJemedza apamidzire kuita gumi pazano. Rima harina kubva mumaziso ake kunze kwakabva kwatosviba,

***"Shungu ndaiva nadzo vadzimu vangu kupedzisa basa asi zvakona n'anga murapwa achida, mweya wangu wavakuuya ikoko mochiugashira nekuti Simba handichina"***

anotaura nechemumoyo uku misodzi ichichururuka. Mhunzi dziya dzine ruvara serweshizha dzainge dzoimba manhanga kutapira neropa raiyerera.

Jemedza achingotsunzunya anobva awona mumwe murume ayiva naChabhanga vakamira mberi mwake iye achiinda kwavaiva, asi akashamisika kuti sei ndirisi kusvika. Ayinge akasimudza maoko ake mudenge kuti huyai munditote. Mumwe murume akabva ati.

*"Mira ipapo nguva yako yekuuya kuno haisati yakwana, kana yakwana uchauya dzokera unopedzisa basa randakakuudza mwanangu. Ndinoziva kuti urikurwadziwa asi shinga ndiyo nguva yacho"*

achipedza kutaura akabva atonyangarika vose naChabhanga.

Jemedza akatozoti vhai maziso ake angori padhibhura asi kunze kwainge kwachena chaanga asingazive ndechekuti ava nemazuva mana aripo akarezuka. Marwadzo aya akatanga kuuya zvekare pfumo riya rainge rakambomubaya akabva angoti zi-I akadero





## CHAPTER 18

---

### Kumuzinda kwamambo Dzimbarimwe

Mambo Dzimbarimwe zvavakapinda muimba yaiva nechitunha apo pavakati vava pamusoro pachu vanorohwa nehana kuona chiso chamai Chengeto mukadzi wavo wavaidisisa uye ari mwana wejinda ravo ravanowananzofamba nare. Hana yavo yakabika manhanga mumaziso mavo ndokubva vatanga kuona rima kwakuwira pamusoro pechitunha ndivo zii vakadero.

Kudonha kwavakaita vakatanga kuita semunhu avakurota, vakaona Toropito achinyemwerera akavatarisa asi pasina nguva Toropito akabva awisa chiso pasi kuratidza kusuwa uye akabva adonhedza madonhwe maviri emusodzi kwakuzotarisa paiva naDzimbarimwe ndokubva atanga kusekerera zvakare.

***"Usavhunduka hako Dzimbarimwe wagona kusarudza mukadzi wekuuraya sezvo ndiye aripamoyo wako izvo zvichaitawo kuti zvole zviri pamoyo wako zvaunenge wataura kuti zviitike zvizoitikawo, Mwana wako ndamupa bvumo rekubaisa Jemedza abva amubaya asi ....."***

vanobviswa kuzigope rainge ravabata nemunhu ayinge avhura musiwo uchibva waiyita ruzha rwakanyaya.

Vanosimudza musoro mambo ndokuona ari Temba uyo akapinda achiratidza kuti ane chaarikutsvaka ndokubva afamba achiinda kwaiva namambo ukokwaakati ava kusvika ndokubva anzwa kudanwa pamukova iro inzwi raakaziva kuti nderaamai vake ndokubva adzokera kumashare kwaayidanwa.

***"Matii amai ndanzwa semandishevedza "***

akadero Temba.

*"Huya uwone nyoka yapinda mumba mangu  
ichimanya ndashaiwa kuti yabva nepi"*

vakadero amai uye vainge vasina kuona  
kuti inyoka rudziyi, ndokubva  
vadungamidzana kuinda kuimba yaamai  
vake yokubikira uko kwavakasvika kuita  
mahwekwe nacho chiva chaitenderera  
mumba izvo zvakarovesa Mai Temba  
nehana.

Temba akabva avhomora bakatwa rake  
haana kumbopindwa nekutya akabva  
afamba akananga kwachaiva icho  
chakatanga kumanya neimba yose asi  
hakuna kure kwachakazoinda akabva  
achitema musoro narobakatwa ndokubva  
chamira panhu pamwe chete icho  
chakatanga kutambisa muswe asi akabva  
awugura zvakare. Mai vake vainge  
vangomira panhu pamwe chete vachifunga  
nezvenyoka iyi zvayaireva kana uchinge  
waiwona ichimanya sezvayainge ichiita asi  
havana kuda kuita nhaurwa nejaya ravo  
pamusoro pazvo vakabva vangogara  
padehwe ravo iro raiva remhembwe

Temba akati achinorasa nyoka iya akabva  
asangana naBenhure.

***"Mambo wangu ndanga ndichikutsvakai  
zvanaka ndakuwanai asi mune rombo***

***rakanaka chokwadi "***

akadero Benhure.

***"Une yawakapakata here Benhure chiinda unorasa nyoka iyi kunze kwemuzinda uzouya kudare kwandinenge ndiri tinzwe dama rako "***

akadero Temba ndokubva Benhure atora bakatwa rainge rakabaiswa nyoka ndokunoirasa kunze kwemuzinda ndokubva azodzoka kudare kwaiva naTemba.

***"Taura tinzwe moyo wareba kuda kunzwa zviri mudehenya rako "***

akadero Temba.

***"Ndapfuura nekumisungo yenyu yamakateya marimwe zuro ndaona pakabatwa mhara mbiri netsuro nhatu saka ndasiya dzingoripo pamisungo ndati ndiuye ndikuudzeyi "***

akadero Benhure.

***"Waregereizve kuchiuya nadzo nhayi Benhure mumba mamai vanhu hamuna kana nyama zvino ndogona kuwana dzadambura musungo dzikatiza "***

akadero Temba.

***"Musatya zvenyu mambo ndasiya ndangodzicheka musoro asi dziripo pamisungo "***

akadero Benhure izvo zvakafadza Temba.

***'Ndokuratidza kuti urimurume Benhure  
saka ngatichiinda tose unondibatsirawo  
kutakura pamwe nekuvhiya  
ndozoekupawo katsuro kamwe chete "***

akadero Temba panguva iyi mvura yainge yavakusakasira zvishoma ndokubva vabuda vakananga kumisungo.

Mambo vachiona Temba ava kubuda vakabva vanzwa kufurwa nemhepo uye vachibva vatura mafemo, vakazoti vachingobuda kwakubva vasimuka kubva pavaiva vakavata vasina kupfeka kuderero ndokumanya kunosunga musiwo wavo kwakudzoka paiva namaiChengeto misodzi yakambobuda asi chokuita painge pasisina uye zvavainge vanzwa Toropito achitaura zvakabva zvauya mumusoro mavo ndokutanga kunyemwerera sezvo ivo chavaingoda ndechokuti zvavakakumbira kuti zviuye pavari zviite ndokubva vaita bonde ravo vachipedza ndokubva vapfeka zvipfeko zvavo kwakufukidza chitunha nedehwe renyati ndokubva vabuda muimba iyi kwakunanga kuimba yavo yekuvata uko kwavakasvika kuzvikanda pachigaro chavo vachiratidza kunetseka nezvainge zvakaitika manheru.

Vakagara kuderero pfungwa dzakatanga kupishana kuti Dzitiro ndomuudza sei

shura rakadayi mbongoro kushambira  
munyanza imwe pfungwa yavo  
yakambofunga kuuraya umwe mukadzi  
iyeye ndiye waacharatidza Dzitiro uye Mai  
Chengeto ongonovaisa mumba mavo sezvo  
vainge vasina kuvauraya vachishandisa  
zvombo saka vakaona zvichizovabatsira  
kuti zvizongonzi vakafuma vakafa asi  
akazorangarira mashoko ayinge ataurwa  
naToropito ekuti wagona mukadzi  
wekuuraya izvo zvakaita vazvishingise  
kuzongoudza Dzitiro wacho vonzwa kuti  
anozvitambira sei asi hana yavo yairova.

Vakazobviswa mundangariro dzavo  
nekugugudzwa kwepasiwo apo pakabva  
papinda Dzitiro izvo zvakaita kuti hana  
yamambo irove zvakanyanya.

***"Mangwanani mambo wangu",***

akadero Dzitiro mushure mekunge agara  
pasi ndokubva mambo vadavira .

*"Zuva zvarotorova nhongonya mambo  
wangu muchingori mumba kwakanaka here  
nyama dzarwadza here ndanguri ndatarisa  
nzira kudare kuti muchauya asi zvaita  
zviroto kurinda guyo semba "*

akadero Dzitiro.

***"Kwete vatezvara ndakanonoka kuvata  
ndakafamba mutunhu murefu  
ndichiinda kwandainge ndaroteswa  
naToropito ndiko kwazoti ndichibva***

**ikoko ndokubva mvura yaturuka zvino  
ndazodzoka ndikambotsivama zvishoma  
ndokubva ndainda kunozadzisa mhiko  
yekurara nechitunha rwechipiri izvozvi  
ndasarirwa namangwana chete iwe  
wopindawo wobata basa",**

**vakadero mambo.**

**"Saka zviri kuita mambo nekuti mvura  
yanaya iyi pasi pabva parira madzetse  
nematafi kubani uko nenguva duku iyoyi  
yayangonaya uye kumavirira uko yakasima  
inogona kusvika zvakare izvozvi"**

**akadero Dzitiro.**

**"Toropito anemasimba chaiwo chasara  
ndechokuti ndikazozorawo urozvi  
hwechitunha ndichitanga kuona kune  
hupfumi hwakawanda kunyanya mombe  
tiinde tinodzitora sezvo ndicho  
chinangwa chandaida kupihwa simba  
rekuona zviri kumuzinda yemamwe  
madzimambo saka kwese kwatichaona  
kune mombe zhinji pfumo rangu  
rinofanha kuinda ikoko sezvo rakanzi  
harina munhu acharikurira inyuchi  
dzemukuze saka rikainda kunotoro  
zvipfuyo zvose ndoziva kuti muzinda uno  
unokasira kufuma"**

**vakadero mambo uye panguva iyi zvaMai  
Chengeto zvainge zvabuda mupfunzwa  
dzavo uye vainge vagarwa neumwe mweya  
wekuda kurozva madzimambo ose**



akavapoteredza kuti hupfumi hukasire  
kuita mumuzinda mavo.

*"Tikapedza mhiko dzedu tinofanirwa  
kutanga kunorozva mambo Zvinavashe  
ndivo vane hufumi hwakawanda kubva kare  
ndaingovaziva muzinda wavo uyine kudya  
kwakanaka"*

akadero Dzitiro.

***"Usazvinetsa zvako zvose izvozvo ndiro  
donzvo ratakaindira kwaToropito iroro  
ndichaona kuti tichatanga muzinda upi  
kupera kwemazuva mashanu  
ndinovimba ndinenge ndaratidzwa  
gwara"***

vakadero mambo.

*"Makazouraya mukadzi upi wacho  
pavakadzi (ina/vana) venyu"*

akadero Dzitiro.

Temba achiona Gamuchirai amuka zvose  
zvaayinge awona achiita zvinova zvainge  
zvamushamisa zvakabva zvabuda  
mupfungwa dzake sezvo paakangotarisa  
Chiso chaGamuchirai akabva  
angonyemwerera uko kwaiva kufara kuti  
ndakazviwanira chigagairwa changu sezvo  
Gamuchirai ayinge akanaka hake  
mwanasikana uyu zvino muviri waTemba  
wakabva watanga kuita sekuti

urikufambwa fambwa uko kwaiva  
kumerera sezvo mushonga uya wainge  
wakadyiswa Gamuchirai kuti azodiwa  
nemwanakimana wamambo waishanda  
kana vakanguri vasanganidzana maziso avo  
mboni nemboni zvaibva zvaita kuti  
mukomana anzwe kuda musikana  
zvakananyanya.

Akasimuka Temba ndokuinda paiva  
namukadzi wake,

***"Wamuka sei mukadzi wangu  
ndinotenda kuti wanga wakazvichengeta  
ndinoda kukutaridza rudo rwangu rwese  
kwaurei kuratidza kuti ndinokuda  
Gamuchirai"***

akadero Temba akabata maoko emukadzi  
wake uyo asina kudaira.

*"Hongu wanga usina kuzvitarisira  
zvakaiteka Gamuchirai asi yatodeuka  
haichadyorereki asi ndiregererewo kana  
usingandidi sununguka kundiudza hako"*

akadero Temba izvo zvakaite kuti  
Gamuchirai atarise Temba ndokubva  
vasanganidzana maziso.

***"Akuudza kuti handikudi ndiyani Temba"***

akadero Gamuchirai sezvo panguva iyi  
ayinge apfekwa nerudo rwekuda Temba  
rwaasina kunzwisisa kuti rwabvepi.

*"Hapana adero Gamuchirai asi ndirikuona nekutsamwa kwako"*

akadero Temba.

***"Kwete handina kutsamwa asi kuti ndiri kurwadziwa pakati pemakumbo angu handiti ndiwe wakandikuvadza"***

akadero Gamuchirai izvo zvakafadza Temba.

*"Ndiregererewo mukadzi wangu kukukuvadza kwandakaita asi ndoda kuti uzive kuti ndinokuda ndiwe Mambokadzi werino dunhu"*

akadero Temba,

***"Chero neniwo ndinokuda Temba ndiwe murume wangu"***

akadero Gamuchirai izvo zvakaaita kuti Temba akaruke ambundira mukadzi wake apo pavakatanga kutsvodana izvo zvakaaita kuti vadzimare vaita bonde.

*"Ndoda nyama nyoro Temba yakagochwa asi ndinoda yaunonovhima izvozvi"*

akadero Gamuchirai mushure mekunge vose vagara vapedza mutambo wavo izvo zvakaaita kuti Temba owoneke mukadzi wake achiti ava kunovhima ndokubva atanga kutsvaka bvumo rake asi akarishaiwa izvo zvakaaita kuti azonosvika nekuimba yaiva nababa vake achitsvaka bvumo rake asi akazonoriwana riri mudare

abva aziva kuti ayinge arisiya imomo nezuro nekukanganwa.

Kuinda kwakaita vana Temba kumisungo yavo vakasvika zvechokwadi mhuka dzakabatwa asi nguva yekuvhiya vakazoishaiwa mushure mekunge mvura yobva nemumavirira izvo zvakaita kuti vatakure mhuka dzakadero ndokumanya kudzoka kumuzinda asi vakabatwa nayo mvura vava kusvika. Vakazosvika vanyorova uye Benhure akabva apihwa katsuro kake ndokuparadzana umwe neumwe achipinda mumba yaamai vake. Gamuchirai achiona murume wake achipinda akaremerwa nenyama akanzwa kufara sezvo ndiye ayinge amutuma.

Temba akazovhiya nyama yake achigochera mukadzi wake uku mai Temba mupfungwa dzavo pane zvaingovanetsa kubva pavainge vaona chiva. Mvura yakatanga kuwedzera kunaya panze painge paita kuti tsvete nemvura mipande nemheni ndizvo zvenga zvainge zvinzikwa panze.



## CHAPTER 19

---

Runesu anogara pasi akazambira madziro, Pedzisai anobva asimukawo ndokuvhara musiwo uyo wainge wakatsedeuka ndokudzoka ogara paiva naRunesu.

***"Kwakanaka here kwawavhara musiwo "***  
anobvunza Runesu.

*"Kutsvene handisi kuda kuti mai kana baba vazive kuti ndirimuno vanongoona sasa rakavharwa saizvozvi, uye ndoda kukuudza mafambiro atakaita nhasi dayi misodzi*

*yako iridziva mumatama ako "*

*anotaura Pedzisai.*

***"Urikuti Chiiko iwe Pedzisai,  
chingandichemedza ini chii kunze  
kwekuti mai vangu nyakutumbura  
vakasiya nyemba "***

*akadero Runesu*

*"Ndakamira semukono nezuro mukadzi  
wako ayinge ayinda na Majakanye godobori  
uya ".*

***"Ha-a iwe unondiudza kuti chiiko iwe  
paifiwa nhembe yenherera o-oh  
ndinopika neimbwa yangu Zviregwi  
ndikapika nembudzi unozoti kukara  
kwaro nyama, paizvarwa asina bvudzi  
ndaimutumbura ini Majakanye  
ndikanotora chigagairwa changu "***

*anotaura achiratidza kusafara chiso ayinge  
akachisunga.*

*"Majakanye waimuita sei iwe rusvava  
rwusina kana mushonga wekurapa  
zvipande hazvo, Majakanye haasi  
wekutamba naye uya unoinda nyika dzimu  
rakacheke nyika, wototenda ini ndakaoma  
musoro ukasadero ndomuindisa ikoko ".*

*Anotaura.*

***"Patichainda kumadhibhura ndiwe  
uchatora nyama yakawanda asi chiropa  
togurirana, asi akati kana muchida kuti***

***nyanga idzoke mondipa Yemurai?"***

anotaura Runesu.

***"Hongu "***

*"Mashura chaiwo nyoka kusunga nhembe ndokutenda zvikuru ndaitozofira mugota ini".*

***"Saka nhasi hausi kunotsvaka nyanga here hona zuva rava kuvira usina kuoneka ini nhasi rinovira ndirimuno ndirikungonzwa kuneta "***

anotaura Pedzisai.

*"Tovidzisa tirimuno, nhasi ndopatinotaurawo dzevasikana iwe kubva hausati wandiratidza akaba moyo wako woda kuzondiudza rini "*

anotaura Runesu.

***"Ini ndichatsvaka kana ndawana nyanga yangu, kana ndisina ndinofo ndakadero zvangu ".***

*"Totenda dzaamwa "*

anotaura Runesu.

Vakomana vakaswera varimugota vachitaura nyaya vachiseka ndokuzobuda zuva ratopinda munamai varo voinda kunodya.

***"Runesu mangwana toda kumukirana nehweva kunotarisa madhibhura edu toda kuchimbidza kudzoka nekuti***



***mambo varikuda vanhu vose mangwana  
padare nguva dzemadziya mushana  
saka tofanirwa kunge tiripowo "***

anotaura Pedzisai.

***"Ho-o unomirira kusvika kwangu tobva  
tainda usandityira ndinomuka nguva  
yerudzoka mazizi ini "***

anotaura Runesu ndokubva vaparadzana.

Pedzisai anonanga kusasa kwamambo,  
anosviko wana pamusiwo paina  
Madzambagate na Majoko ivo vachibva  
vakotamisa zviso zvavo, Majoko  
ndokuzovhura musiwo Pedzisai achibva  
apinda.

Anosviko wana mambo varere vakatarisa  
mudanga vairatidza kuti pfungwa dzavo  
vaiva kure kwazvo nekuti havana kunzwa  
kupinda kwakaita nevanji wavo asi ivo  
vainge vakasvunura meso yaiwoneka  
achibhairwa nekuti tsvatsva yaibaka.

***"Manheru mhukahuru "***

Mambo vanoita kuvhunduka vachimuka  
ndokugara.

***"Ndiwe Pedzisai wandivhundutsa  
mwanangu wadii kupindawo uchiimba "***

***"Hongu ndini ndingaimbeiko zvangu  
ndati regai ndikuswedzei ndaswera  
ndakavata mugota mangu ".***

*"Wagona mwanangu asi Nyanga irikundidya moyo wangotadza hako kuti Yemurai ayite mukadzi waMajakanye paya "*  
vanotaura mambo.

***"Koimi matadza here kuti angouyisa nyanga yacho imi mozoita mazuva mashoma muchirarama ndosara ndiinayo pamwe nemuzinda "***

anotaura Pedzisai asingaseki.

*"Waizogona kuzotonga here mwanangu uye ini kufa izvezvi zvingabuda here mai vako vosara nani nyama dzangu dzakachasimba idzi "*

***"Mazvionaka kuti dindingwe rinonakirwa richakweva rimwe asi kana iro rokweviwa roti mavara angu azara ivhu, tonyengerera rinosehwa neiko kuendesa mwana paharahwa ine mazino matatu mumukanwa moda kuti avate achiridza ngoma. Nyanga ichauya asi ichanonoka zivai kuti hapana chakavanzika chisingabudi "***

*"Ndaposha mwanangu ndaiti kugona izvo ndiri kutamba nemadhaka pasina mvura ndosaka uripo mwanangu pandaposha unopaona, mangwana ndichaunganidza vanhu nguva yemadziya mushana ndovaudza kuti nyanga iripo asi yoda vatsvaki vanemeso "*

***"Zvakanaka baba ini ndichamukira kumadhibhura angu na Runesu asi ndichachimbida kudzoka hangu".***

*"Hoo usanonoka nekuti iwe ndiwe uchaturira vanhu kuti va....."*

Pamusiwo panonzikwa kugugudzwa mambo ndokubva vanyarara Pedzisai anosumuka ndokuvhura musiwu ndokuona ari Yemurai neimwe mhandara vainge vakabata rusero rwaiva nesadza ramambo.

***"Rangu mauyawo naro here Yemurai"***

anobvunza Pedzisai.

*"Kwete ririko kumba".*

***"Chiregai tichitotungamidzana nzara yandibaya".***

Vanobva vatobuda vose ndokunodya achibva azoinda kunovata.

***"Pedzisai-----Pedzisai go-go go-go ndini Runesu".***

Pedzisai anoita kuzvinzwira kuhope achibva ati pepu ndokusimuka achiinda seri kwemusiwo ndokutora pfumo rake ndiye nzeve kwangwa.

*"Gogogogo Pedzisai nguva hatina ndini Runesu mukatiinde".*

*"Ndatomuka ini sei wanonoka kuuya Runesu ndanguri ndamuka kare ini "*

anotaura Pedzisai achivhura musiwu.

***"Ndabatwa nemadzikirira hako uye ndine hope dzandarota ndashaiwa kuti dzinorevei ini".***

*"Watanga Runesu ihope rudzii idzodzo rega nditore nhava yangu nemiseve tiinde uchindiudza".*

Pedzisai anotaura achitendeuka ndokuturura nhava yeke yaayiva akakohekera pahoko yaiva yakaroverwa seri kwegonhi ndokutora bakatwa rake nemiseve ndokubva atobuda ndiye dhwa-a musiwu.

*"Hande kunze kwatochena uku totosvika zuva ratobuda tofanirwa kutokanda nhanho todzoka nekuchimbidza "*

anotaura Pedzisai.

Vakomana vaviri ava vanobuda nedivi rekumabvazuva, havo nekusiwo diki ndokubva vabuda. Varindi havana zvavakataura nekuda kwa Pedzisai nevanji

wamambo. Vanoteremuka vakananga nemubani havo dzadzadza vachitukutira miti.

Shiri dzainge dzonzwikwa kurira kwadzo dzichifarira zuva idzva.

**"Wakangamwa kani kutaura hope dzako dziya dzitumbure rwendo rwuite rwupfupi"**

anodzimura runyararo Pedzisai.

**"Rega nditange ndambotsauka ndozokuudza ndazvibatsira"**

anotaura Runesu.

**"Rega nditozvibatsirawo mukamwe".**

Vanopedza ndokubva vapinda munzira.

**"Madeko ndichangorovera matama pasi, ndakarota ndiri musango rakacheka nyika zuva ndichitofamba ndega ndichivhima ndakabva ndamutsa Tsvana ndokutanga kuidzingirira ndaipotsera museve asi ndichiipotsa. Ndirimukumanya kudero ndakazongoona Tsvana iya yapfurwa nemuseve ichibva yawira pasi. Munhu uya akabva ayibata ini ndokusvika**

**ndichimirawo. Ndakashatirwa kuti munhu haanga pfuri Tsvana yangu yandabva nayo kure ndichimanyisa, ndakayedza kutarisa chiso chake asi handina kuchiziva ndakabva ndatatamura museve achibva awubata, pandakada kuti ndimusvetukire ndimubaye nepfumo ndabva ndapeputswa negonzo randitsika pamuromo pangu".**

Anotaura Runesu achibva anyarara.

*"Kuti hadzisi dzechando here hope dzako Runesu"*

akadero Pedzisai.

***"Haa Pedzi ungati hako ndedzechando asi dzinechirevo idzi kungoti hausi godobori hako ungadai wazviona"***

anotaura Runesu. Nguva iyi zuva rainge ratobuda rumhepo rwuchifefetera kwazvo.

*"Mira Pedzisai ndirikuresva kuona here ini imhara here kana kuti ndeimwe mhuka tarisa padhibhura iro ririnechenyasi uko"*

anotaura akatendeka mberi kwavo.

***"Ngatiswere tinosvikozvionera panhuno fodya".***

*"Ndaikuudza kuti rangu haripotsi, ndiro*

*rangu chiro ako arikudivi rechamhembe  
ose "*

anotaura Runesu.

***"Twe mumhu akabatwa uyo tarisa uwone  
maoko ayo ngatimanye haadero afa  
here ndidzo tsori dzauya kusoro muzinda  
idzi "***

anotaura Pedzisai.

Vanomanya ndokusvika paya nhunzi  
dzinobva ati dzvamu kubva pagumbo  
remunhu uyu uye rainhuhwa dzimwe  
dzichibva padivi kedumbu apo paiva  
pakabaiwa nebvumo.

***"Ndiwe ani iwe uye wabvepi "***

anotaura Runesu neinzwi raiva pamusoro  
akatendeka pfumo kumeso kwa Jemedza.

Asi akamudavira ndipo pasina.

*"Twe munhu uyu arikurwadziwa uye mweya  
wake unenge wava kudakuonekana neino  
nyika ngatimusimudze tiinde naye  
kumuzinda "*

anotaura Pedzisai achinzwa tsitsi.

***"Hazvishamisi kuti ndiye akatora nyanga  
mazuva aya nhasi kwava kudzoka  
kutarisa muzinda kuti hauna kuparara  
here ngatimuuraye atitadzisa kubata  
mhara dzedu akarezuka. Munoti***

## ***dzaisvika sei paine munhu "***

anotaura Runesu. Pedzisai anobva apa Runesu ziso rinemubvunzo haana raakataura, anobudisa bakatwa rake ndokutambidza Runesu.

*"Dambura gashu iro ini ndakamubata kuti asawira pasi".*

Runesu anotambira gashu riya ndokubva Pedzisai abata Jemedza uyo ayinge asingapfakanyiki. Vachipedza kudamura vanobva vamuisa pabvute.

*"Tikamuuraya tinozoziva sei chifambirwa chake, uye kana iri tsori toziva sei kana tamuuraya. Nditambidze tsvimbo yake iyo tione unonge miseve yake iyo uyise mudati rake wonditambidzawo museve wake mumwe "*

anotaura Pedzisai. Runesu anotambidza Pedzisai tsvimbo pamwe chete nemuseve mumwe chete. Pedzisai anowona mufananidzo waiva patsvimbo iyi asi akatadza kuziva kuti unorevei museve uyu anounan'anidza asi haan kuuziva kuti ndewekumuzinda kupi nekuti anoziva museve yose yekunemimwe muzinda zvayakaita kubudikidza neyaiva mumuzinda wavo iyo yaakaratidzwa zvayakaita nababa vake.



***"Tora choro icho uwone kuti hamuna  
mvura here toda kumwisa munhu uyu  
chidimwa dimwa chinyongovere  
chinenge chaoma nekushaya mvura"***

anotaura Pedzisai. Runesu anotora  
ndokuwana muine mvura anotambidza  
Pedzisai ndokumwisa Jemedza imwe  
vachiisa nemumhino hama nedumbu  
ndizvo chete zvairatidza kuti munhu uyu  
mupenyu, gumbo rainge rakazvimba  
richibuda urwa hwakakora.

***"Panoda danda apa hatingasviki  
zvanaka munhu uyu anenge  
achidzimbirwa kana tikaita  
wekusimudza, ngativhune miti miviri  
yakati korei togadzira tomuisa ipapo  
makavi akazara aya"***

anotaura Pedzisai.

Vanovhuna matanda Runesu ndokusvuura  
makavi emupfuti kwakugadzira banda  
ravo ndokusimudza Jemedza kwakumusiya  
ipapo.

***"Mukomana uyu anoratidza kuti achiri  
mudiki chividi chake chekufamba oga  
ndachishaiwa ini achataura hake kana  
apora"***

anotaura Runesu.

***"Ngatichidzokera asi ziva kuti muripo"***

**wangu ndowuda Runesu hapana  
chatabata "**

anotaura achitoseka zvake Pedzisai.

*"Handiti iwe wati unoda chinenge chabatwa  
ne dhibhura here, wotitora munhu iyeyu".*

Vanotaura vakomana vaviri hapana  
chavakasiya. Vanosvika pasiwo diki  
ndokupinda varindi vakangotarisa asi  
hapana akati bufu.

Vachisvika pamuzinda vanowana munhu  
wese varume nevakadzi pwere vagere  
padare mambo ndivo badzi vaitaura vanhu  
vainge vakanyarara semvura yemuguvi.

Vanonanga padare ipapo Pedzisai ndiye  
ayiva akabata kumberi Runesu ndiye ayiva  
akabata kumashure.

Vanhu vase vanobva vakanda meso avo  
ikoko mambo ndokubva vanyarara  
vachibva vatarisawo ikoko.

Ngavi na Munhikwi vakabva vasimuka  
pavainge vagere ndokuchingura vakomana  
ava.

*"Indai naye mberi kuna mambo  
mumugadzike pasi mudare imomo"*

anotaura Pedzisai.

Ngavi na Munhikwi vanoita zvavainge

vaudzwa ndokunotsveta Banda riya mberi kwamambo kuti vaone asi muri mudare.

Kutsvetwa kwakaitwa Jemedza pasi mambo vanobva vaisa meso avo wanei munhu akaita kuzvimba gumbo uye akasvuuka nekuda kwekuchekwa nedhibhura. Vamwe vakangobata miromo nemhuno dzavo. Vakadzi vaiva kumberi vakaridza mhere kuri kurwadziwa nezvavaiwona, ndiko kwaiva kwakagara mai vaPedzisai na Yemurai mwanasikana wavo. Vachionawo Jemedza vakarwadziwa kusvika panyama nhete kuita senge mwana wavo Yemurai akangobudisawo misodzi akatarisa Jemedza uyo ayiva akatsunzunya.

Moyo yekubereka irikuvakadzi vose hazvinei kuti haasi mwana wake vanongorwadziwa.

Runesu ayinge achitarisa Yemurai neziso rerudo ndokubva vasonganidzana maziso Runesu ndokunyemwerera asi Yemurai haana zvaakaita.

Pedzisai anotora museve mumwe chete paneya Jemedza netsvimbo iya ndokutambidza mambo Zvinavashe. Vanotarisa museve uya asi havana kuuziva kuti ndewekumuzinda kupi. Vanotarisa mufananidzo waiva patsvimbo iyi ndokubva vangoshama muromo.

***"Mamuwana kupi mujaya uyu "***

vanobvunza mambo.

Pedzisai anobva ataura kuti tamuwana akabatwa nedhibhura regu asi hatina kukwanisa kutaura naye sezvo haasi kutaura.

*"Zvakanakai tichamirira kumuka kwake Chivhondoya basa rako iri murapei maronda ayo momukurungira zviyo zverukweza zviya zvataida kuita mumwerere kuti mvura inaye hatiregi munhu achifa womuchengeta kumba kwako ikoko, vanhu chipararirai henyu ndakuudzai kuti nyanga iriko asi kwairi hatisi kuziva "*

Mambo vachipedza kutaura Jemedza anobva akosora kaviri ari pabanda apa.

***"Amuka mbuya Musorina kurungai usvuvu huya amwiswe anenge nzara iyi"***

Anoita kusvetuka kubva paanga agere Pedzisai ndokunogwadama kumusoro kwa Jemedza.

Ngavi na Mhunhikwi vanobva vanzi vasimudze Jemedza ndokubva vaina naye kumba kwaMbuya musorina vanova mukadzi waChivhondoya harahwa yaiva yaunyana chiso pamwe nechembere yayo.

Usvuvu hwakakurungwa ndokubva hwamwiswa Jemedza huchidziyira Kure

kure ayimwiswa na mbuya Musorina.  
Chivhondoya ayitota mashizha  
eMuvengahonye akasangana nemudzi  
wemu Zekweni ndokuisa nemadota  
eMupangara apedza anowetera muneimwe  
mbiya ndokubura zvaanga achitwa  
kwakusviisa mumbiya ndokuigadza  
machoto anoturura chin'ai  
ndokuchitsotsonyera imo mo ndokukwata  
zvakadero ndokuzobura. Mhuya Musorina  
vakabva vabuda havo Chivhondoya  
ndokusara naJemedza chete anomubvisa  
nhembe ndokumuzora musonga uya  
achipedza kuzorwa anotanga kugomera  
ndokubva amupfekedza nhembe dzake.

Imba iyi yaiva padyo ne imba yamai  
vaPedzisai zvekuti wakagara  
pachikumbaridzo unototaura nyaya nevari  
mumba maChivhondoya.

Pedzisai ayizviona zvese izvi agere  
pachikumbaridzo chamai vake naRunesu  
vachidya chimukuyu chakagochwa.

Chivhondoya akabva abuda zvake  
ndokugara pamadziro.

Zuva parainge rogara makomo Jemedza  
akabva amuka ndokugara asi anoona ari  
mumba makavharwa ari ega. Chivhondoya  
ayinge ayinda kunogeza mbuya Musorina  
vainge vainda kunogashira mumwe  
mukadzi wa Madzambagate sezvo vaiva

nyamukuta. Pedzisai na Runesu vainge vaima kunogezwa sezvo vainge vava nemazuva maviri vasina kugeza. Jemedza anokosora katatu arimo izvo zvakanzikwa na Yemurai uyo ayinge agere pamadziro pabvute na Rutendo hanzvadzi ya Runesu. Anobva asimuka ndokumanyira muimba iya ndokuvhura musiwo ndokuwana Jemedza akagara akazembera madziro.

***"Aa-a wamuka mukomana vadzimu variko nunonzani"***

anotaura Yemurai.

Jemedza anoshamisika achiona musikana uyu anobva ayita kunge munhu anoda kusimuka kuti atize asi akatadza nekuda mwegumbo rake rairwadza.

*"Gara pasi usasimuka ini ndinonzi Yemurai usatya zvako wasvika pabvute rekuzororera Mambo vaneunyora".*

Anotaura Yemurai achigadzika Jemedza pasi.

Jemedza anotenderedza maziso ake mumba umu asina raadavira hameno zvaaitsvaka.

***"Ndiri kupi uye zvombo zvangu zviripi netsimbo yangu, usati wandipindura ndichererewo mvura yepachitubu"***

ndiwo mashoko akataura Jemedza,  
zvakanakirawo kuti Chivhondoya  
ayimwavo mvura yepachitudo badzi  
anobva achera ndokupa Jemedza  
ndokukutura mikombe miviri.

*"Zvombo zvangu zviripi ini handina zita "*

anotaura Jemedza.

***"Zvombo zvako uchapiwa namukama  
Pedzisai vaida kunogedza, hino zvauri  
kuti hauna zita uchazozvirovesa  
ukachemedzwa apa uchirwadziwa  
kudaro "***

anotaura Yemurai achinzira Jemedza tsitsi.

*"Kana vandichemedza hapana chakaipa  
ndiro richava zita rangu rekuti Jemedza  
iroro".*

***"Yemurai chiuya vaChivhondoya  
vavakuuya kasira "***

Rutendo anoshevedzera ari panze.

*"Ndakuinda munhu anga achikurapa  
avakuuya ndichazodzoka mangwana  
ndikawana nguva "*

anotaura achitosimuka paanga ari  
ndokubuda.

***"Saka iwe unogara kupi kwacho "***

anotaura Jemedza asi Yemurai haana  
kudavira ayinge atova panze.

## **KUPERA KWECHITSAUKO 19**

**book redu kutanga paChapter 21  
richange rava kutengeswa**

**Vari kuZimbabwe 250 rtgs**

**Vari South Africa 40 rand cell c airtime  
kana Easyload**

**For more information inda kuinbox  
panumber idzo**

**1. Author Phibion**

**0714160957**

**0774512473**

**2. Author John**

**+27845412105**

**+263779698011**

**unonoudzwa pekuisa mari yako uye  
unobva waiswa kusubgroup kuchange  
kwava kuuya book iri**





## CHAPTER 20

---

### Kumuzinda kwamambo Dzimbarimwe

*'Makazouraya mukadzi upi wacho  
pavakadzi (ina /vana ) venyu "*

akadero Dzitiro inova nguva yakarira  
mupande uyo wakazoteverwa nemvura iyo  
yakabva yanaya. Zvino kurira kwakaita  
mupande uyu Dzitiro ayinge akavarairwa  
izvo zvakamuvhundusa zvakanyanya uye  
semunhu ayinge akagara pachigaro akabva  
adonga nemanhede asi akaita rombo

rakanaka kuti akawira pamusoro pematehwe ayinge akaita gomo, zvakaita kuti asakuvara chainge chongorova ihana chete.

Mvura yakaramba ichinaya iyo yaiva nemipande pamwe chete nekupenya izvo zvayiita ruzha rwakaita kuti mumuzinda mose multe runyararo kana kuine vayiita nyaya Japana ayinge achasimudza muromo kusanganisira Dzitiro namambo yanga yangova mwii mwii nhaka yemakonzoro chero dayi vaida kutaura nezvayiita mipande kutinhira vaisanzwanana izvo zvakaita kuti nhaurwa yavo igumire munzira. Mvura yakazovara zuva richipindawo parakambopinda napo nezuro vaviri ava kwakuparadzana.

Mai Sekai kubva zvavainge varohwa zvakaipisisa namai Chengeto apo pavakazobuda kuinda kumba kwavo uko kwavakasvikovata, chifumi chamangwana vakamuka nyama dzavo dzichirwadza izvo zvakaita kuti vasavhura musiwo wavo uye ndokuswera vari mumba mavo semunhu ayisava nevana hapana akamumutsa uye nemamwe madzimai a mambo haana zvaakafungira sezvo musiwo wainge wakavharwa zvino Mai Sekai semunhu ayiva akazvitakura marwadzo aya akachiwedzera ndokubva vachitanga

kurwara nerimwe divi yainge yava nzara sezvo zvakatanga mukuvira kwezuva iro rayinaya mvura uye rimwe divi kwaiva kurohwa. Rechimangwana racho vakaswera zvakare varimumba vakamira mazuva maviri varimumba vasina kumbobuda panze vakaitawo rombo rakanaka kuti vainge vakasiya chimukuyu marimwe zuro sezvo kwaingoswera kuchitonhora hachina kunge chashisha. Zvino vakabva vangodyawo asi vakabva vadzokera kuvata. Vakati zuva roda kuvira ndokunzwa pamusiwo kugugudzwa.

***'Mai Sekai, Mai Sekai !!, Munemunhu here umu'***

vakadero Mai Temba sezvo vainge vanzwa kukoskra mumba umu vachipfuurawo kuinda kumba kwavo asi kubva zvavainge vatadza kuona Mai Sekai panze vakangofungira kuti pamwe vainda kwambuya nyamukuta uye vainge vatombobvunzwa naChengeto kuti Mai vangu varipi vakabva vamuudza kuti vaperekedza Mai Sekai kwambuya nyamukuta sezvo ndizvo zvainge zvangopinda mupfungwa dzavo pavakatadza kuona madzimai maviri aya izvowo zvakaita kuti Chengeto abvumewo kuti ndiko kwainda amai vake.

***"Mai Sekai ndiwe here uri mumba umu "***

vakadaidzira zvakare pavainge voda  
kudavira Mai Temba vakabva vaonda kuti  
musiwo hauna kusungwa ndokubva  
vapinda umo mavakaona zvakavavhundusa  
mumba makaita kuzara ropa mvura pamwe  
chete netsvina sezvo vaine vozvibatsirira  
imomo uye chimwe chakavhundusa Mai  
Tema vanoona dumbu ramai Sekai  
pasisina izvo zvakaite kuti vazive kuti ropa  
rainge razara mumba umu raiva reyi  
pamwe chete nemvura uye pavakazoti  
tsvee meso avo kumakumbo amai Sekai  
vakabva vaona shura chairo izvo zvakaite  
kutivabude mumba umu vachimanya  
.....

Mambo zuva raitevera vakamuka  
runganani ngwanani kunanga kuimba  
yavo yavainge vakaisa Mai Chengeto  
ndokuzvikopinda kuti vachipedzisa mhiko  
yavo zvino Mai Chengeto vaine votanga  
kunhuwa chero hazvo vaine vasati  
vonyatsonhuwa sezvo vaine vakaiswa  
pamusoro meivhu nyoro iro raiva  
remurwizi (jecha). Havana kuda  
kutevedzera mhino dzavo vakashingirira

kuita bonde ravo zvakadero dzamara vapedza vakabva vabuda kuinda kudare uko kwavakasvika vachinzwa kuti Dzitiro ambobuda kuinda kunovhima zvinova zvakavarovesa nehana kuti achadzoka here zuva ranhasi kuitira kuti atangewo mhiko yake.

Vakaswera muswero wese asi meso avo ayinge akangotarisa kumasiwo kuti vangaona Dzitiro kudzoka kwake asi hazvina kuita sekudero. Vakati zuva richipinda munaamai varo ndokubva vasimuka kuinda kuimba yavo uko kwavakasvikogara pfungwa dzavo dzainge dzava kure kure nekuda kwekuita kwainge kwaitwa naDzitiro. Vakambogara kwenguva refu vachiti angasvika asi hazvina kuita sekudero dzamara vavata asati asvika chero hake ayifanha kutangawo mhiko iyi rechimangwana rungwanani.

Kuvata kwakaita mambo vakabva vatanga kurota

Vakarota vari pamuzinda wavasina kuziva kuti muzinda uyu ndewani uye urikupi, vakanyenwerera vachiona mumuzinda umu muchiratidza kuti munekudya

nekuguta nekuda kwekuona kwavayiita kusimba kwainge kwakaita vanhu vaiva umu uye kunaka kwainge kwakaita rusvino rwemuzinda uyu kwakavatora moyo pasina nguva vanoona majaya ayitinha mombe kuinda kumafuro apo pavakaona mombe zhinji dzakarembedza mikaka pamwe chete nekukora kwadzo dzimwe ndidzo dzaiva dzitori nezvimhuru zvadzo izvo zvainge zvakaita mavhu nemarara kana dziri sembudzi nemakwayi dzainge dzakatoinzana nezvimwe zvimhuru. Zvino mambo Dzimbarimwe vakabva vatanga kufamba vachipinda mumuzinda umu umo mavakati vachingopinda mudare ndokubva vaona mambo wemo akabata chinhu mumaoko avo chavasina kuziva kuti chaiva chiyi zvino pavakati vasvike pedo vakaona mambo uya atorana nerimwe jinda ndokubva vabuda nekusiwo diki pavakati vatevere vakabva vapepuka.

Vakapepuka vasina kunzwisisa kuti muzinda wavanga vachirota ndewekupi uye ndewani asi chavakangoziva ndechokuti muzinda uyu waiva neupfumi hwakawanda asi zvole izvi zvazovhirigwa nekufunga kuti Dzitiro arikupi.

Pavakapepuka vakaona kuti kunze kwainge kwatoidza mambo vakamuka ndokuinda

kuimba yaiva namai Chengeto uko kwavakasvika kugara pachigaro chavo chaivamo vachifunga kuti voita sei sezvo Dzitiro asati adzoka iye achifanha kuzadzisa mhiko. Vakati vakagara kudero ndokuona zvakanaka kuti vachitopedzisa mazuva matatu ayinge asara awo ayiva aDzitiro ndokubva vasimuka kwakuinda paiva nechitunha ndokubva vabvisa dehwe rainge rakafukidza asi pavakangobvisa vakaona Dzitiro achipindawo mumba umu uyo ayinge abvura kare kugugudza asi akadavira painge pasina sezvo mambo pfungwa dzavo dzainge dzavakure zvino Dzitiro akafamba achiuya kwaiva namambo avowo vainge vangomira vakamutarisa achiuya uyo akasvika kuona zvaasina kunzwisisa kuti ayinyatsoona zvakanaka here kana kwete.

### **Kumuzinda kwamambo Pasihariguti**

Mambo Pasihariguti vakati vakagara vachiona zvavo muzinda wavo vakabva vasimuka pavaiva vakagara ndokutora bvumo ravo kwakutanga kufamba vakananga kumatanga izvo zvakaonekwa naGwinyai akabva ateverawo mambo wake.



Vakasvika kumatanga uko kwavainoona  
zvavo zvimhuru zvainge zvakazara  
munerimwe danga izvo zvayiyevedza  
vakazotanga kutenderera muzinda wavo  
asi vari mukati.

***"Gwinyai ndine zano randafunga "***

vakadero mambo,

*"Tumburei mambo wangu "*

akadero Gwinyai.

***"Mukuriro waita muzinda uno panyaya  
yezvipfuyo ndafunga kuti rusvingo  
rwedu tirwuvandudze kurwuvaka  
kuinda mudenga uye tirwushongedze "***

vakadero mambo izvo zvakafadza Gwinyai.

*"Idama iroro mambo wangu sezvo zviri  
mukati muno hazvifanhi kuonekwa  
nemunhu arikunze saka kutoudza vanhu  
vaite basa mvura isati yonaya zvakanaka  
payinozonayawo rusvingo rwunenge  
rwapera kuvandudzwa "*

akadero Gwinyai ndokubva vatodzokera  
kudare uko kwavakasvikodana vanhu  
ndokuvaudza zvebasa iri asi hapana  
akapokana nazvo sezvo Simba vaiva naro  
rekudya vachiguta uye waitodawo kuti  
muzinda wavo uyevedze mukuona.

Basa rakatangwa pamuzinda vanhu  
vachiurairwa mombe izvo zvaivawedzera

simba rekushanda mushure mamazuva  
gumi muzinda wese wainge  
wakomberedzwa nerwusvingo rwutsva  
urwo rwaiyevedza rwakavakwa  
nemambwe uye matanga emombe  
akawedzerwawo kuvakwa kutaramuka  
pamwe chete nekuinda mudenga  
kunerimwe divi machinda ayisima mimwe  
miti pamusoro perusvingo asi pazuva iri  
vainge vava nemazuva maviri vachisima  
izvo zvakazoonekwawo namambo  
ndokubva vafara zvakanyanya uye  
vakachiudza vamwe kuti vabetserane  
nemachinda aya sezvo paiva nebasa guru  
raidiswa kutanga raitwa kuti pazowana  
kusimika rakaita rekuisa ivhu nezvimwewo  
. Zuva iri pamuzinda pakaswera iri  
besanwa kututa imvu.

### **KUMUZINDA KWAMAMBO ZVINAVASHE**

Kubuda kwakaita Yemurai Jemedza akabva  
adzokera kurara padaunha paanga ambori  
pekutanga. Anonzwa mutsindo waiuya  
kuimba kwaanga ari ndokubva  
anyepedzera kuita kunge munhu  
akakotsira asi akasvunurira kure kure  
achiona zvaisaonekwa kuti arikuona.

Musiwo unobva wavhura Chivhondoya achibva apinda ndokutsveta nhava yake seri kwegoni.

*"Nanhasi here mujaya uyu haasati amuka, asi akanyanya kukuvara "*

anotaura a chiinda paiva naJemedza. Anofumha fumha kumeso kwaJemedza neruoko Jemedza ndokubwaira kaviri achibva atanga kusvunura achiita mbichana mbichana kusvika azovhura ose maziso.

***"Wararama mujaya usatya uye usavhunduka ini ndinonzi VaChivhondoya "***

anotaura achisumuka ndokuchera mukombe wemvura achibva abata musoro wa Jemedza akaita kuusimudzira ndokumumwisa mvura asi haana kupedza.

*"Unonzai mujaya "*

anobvunza Chivhondoya, asi Jemedza akaramba akapfumbira muromo.

***"Mujaya taura uye wavakunzwa sei".***

*"Marwadzo achimo munyama asikufa kwemurume kubuda ura ndimutsei ndigare "*

anotaura Jemedza. Chivhondoya anobva amutsa Jemedza ndokumuzendamisa pamadziro.

***"Unonzai mujaya "***

anobvunza zvekare Chivhondoya.

*"Zita rangu ndi.... "*

Nguvaiyi musiwu unobva wavhurwa izvo zvakaita kuti Jemedza anyarare.

***"Aa-ah amuka zvaita asi nguva dzafamba tichataura naye mangwana kwaida zvichipindawo munzeve dza Mambo, nhasi ndimi vaChivhondoya muchavata nemujaya uyu asi muchange makachengetedzwa ndavakuinda "***

anotaura Pedzisai uyo ayiratidza kuti akamira negumbo rimwe sejongwe, akabva atobuda ndokuinda.

*"Ndiyani wenyu mukomana uyu anoratidza kuti anemasimba kupinda enyu "*

anobvunza Jemedza akatarisa Chivhondoya.

***"Uyo anonzi Pedzisai mwana wamambo Zvinavashe vene vemuzinda uno uye ndiye abva newe kudhibhura kwawanga wakabatwa dai asiri iyeye ungadai uchiko zvimwe pamwe watova nyama yemakunguwo ".***

*"Ukaita chakanaka wazviitirawo vaisanyepa vakuru kuti kandiro kanopfumba kunobva kamwe".*

Anotaura Jemedza.

***"Saka iwe unonzai ndingakushevedza semombe here kuti iwe "***

***"Ndinonzi Jemedza "***

anotaura zita rake mushure mokunge ayeuka mashoko aChabhanga ekuti akatiza abaya mwana wamambo ziso rikabva, saka paakaudzwa kuti Pedzisai mwana wamambo akaziva kuti hauziwo muzinda wemuvengi wangu.

***"Unoda kuzochemedza aniko saka wabvepi".***

***"Ndinoda kumbovata zvakawanda ndotaura mangwana vaChivhondoya".***

Anotaura achitotsiyama.

***"Zvakanaka mujaya "***

Chivhondoya anobva atozemberwa madziro.

Kubuda kwakaita Pedzisai akabva ananga muimba yamaivake yekubikira ndokusvikogara pachituro chaivemo. Yemurai ndiye ayibika mai vake ndivo vaisuka mugoti.

***"Nanhasi hausati wabika Yemurai ndinenzara, dzidza kufambisa maoko ako nekuchimbida uchaguta nekurohwa na Runesu kana akutora nechinono***

***chako ichochi mhai potai muchigogodza musoro iwowo".***

*"Hi-I haiwavo yamboruma zvakaita seiko nhasi nhai Pedzisai, bva-a chipedzisa kubika kwacho nditore ndiro ndikuburire "*

anotaura Yemurai, Pedzisai anobva atora mugoti ndokutanga kumona shambakodzi.

***"Uchamera mazamo izvozvi kuda kukokota mugoti inda kudare uko totaurawo nyaya dzedu sei namai"***

anotaura Yemurai.

*"Kudare kweikowo kwaunoziva tora ndiro wakanyarara".*

Vaviri ava vaiwirirana zvekuti, matambiro avo ayifadza chero amai vavo. Rakapakurwa sadza ndokudyiwa Pedzisai achibva anovata.

***"Mhamha pandaona mukomana uya moyo wangu handizive zvawava kungoita kunyangwe naizvozvi".***

Anotaura Yemurai achisunga ndiro.

*"Moyo wako ungangotanga kufarira munhu wambotaura naye here, uya handifungi kuti anoraraini ".*

***"Ndataura naye amuka pamwe mukoma havasi kuzviziva ati anonzi Jemedza zvakawanda handina kutaura naye***

***nekuti Chivhondoya anga avakuuya "***

*'Hoo uchafarira N'anga inobata mai  
kwaabva wakuziva here uye chifambirwa "*

***'Handina asi mangwana anondiudza "***

Vanozovata zvavo kusvika kwaidza zuva iri  
mai Pedzisai havana kuinda kuimba huru  
kwamambo.

Kuchiyedza Pedzisai anofumonanga kumba  
kwa Runesu ndokuchizonanga kumba  
kwaChivhondoya anosviko gugudza  
ndokuita rekusunda gonhi richibva  
ravhurika. Anowana Jemedza akatogara  
pachituro chaiveno achidziya moto  
Chivhondoya anga asimo hameno kwaanga  
amukira.

***'Hevo mukomana "***

anotaura Pedzisai akamira pamusiwo.

***'Mamuka sei Changamire wangu "***

anotaura akatsikitsira chaanga aziva inzwi  
badzi.

***'Wanaka ukapora gumbo ririsei nhasi "***

*'Ndavakufamba chero kudzingirira Tsvana  
ndinoibata nemaoko ndisina kuipfura  
nemuseve "*

anotaura Jemedza.

Pedzisai na Runesu vachinzwa zveTsvana  
vakabva vatarisanandiyo nguva  
vakasimudzawo Jemedza musoro wake.

***'Zvakanaka saka izvezvi zvavapano  
hatisikuda kunetsana chandareva  
ndichochauchaita nekuti tirikumashure  
kwenguva".***

*'Murikutononokawo kureva kwacho nekuti  
ini ndirikumashure kwenguvawo "*

anotaura Jemedza ndiyo nguva yakapinda  
Chivhondoya akabata midzi.

***"Chiregai ndimumwise mushonga wekuti  
ronda rake iro riome tarisai kuzvimba  
kuya kwapera neusiku humwe mushonga  
wandakamuisa unesimba gumbo  
kudzoka panzimbo paro".***

*'Mupei ndinodzoka ndomutora izvezvi  
ndichambonounganidza vanhu padare."*

Pedzisai na Runesu vakabva vabuda.  
Pedzisai anonanga kuimba yamambo  
Runesu ndokunanga padare.

***'Mangwanani baba Mujaya uya  
wavenani kutaura avakukwanisa  
mushonga waapiwa unesimba saka  
ndaona zvakanaka achipinda mudare  
tinzwe kwaabva uye achivingei nekuti***



***hazvidi kuvata nezamo mumukanwa  
tinoparadzwa"***

anotaura Pedzisai.

*"Ho-o ose machena udza Madzambagate  
aridze hwamanda, uwe wochinomutora  
nemamwe machinda ini ndakunanga  
pandare".*

Hwamanda inoridzwa vanhu vose  
ndokuungana apana akasara mambo  
vakatozouya vanhu vose vavapo.

Jemedza akabva achinotorwa ndokuuyiwa  
naye achifamba ega asi ayifamba zvishoma  
zvishoma vanhu vose vainge vakamutarisa.  
Anosviko miswa mudare pasina  
akamubata, Mambo ndokubva vasimuka  
vomene.

***"Mujaya chokutanga handidi  
kupedzerwa nguva, Zita rako unonzani  
uye wabvepi watumwa nani".***

Vanobvunza vachibaya baya pasi nepfumo  
ravo.

*"Mibvunzo yenyu Mambo wangu yanaya  
semvura yehore chero kuisa mbeu pasi  
haungaise nekuti dzinoora"*

anodavira Jemedza.

***"Zita rako unonzani".***

Jemedza anobva asimudza musoro wake akatarisa kumadzimai ayiva pamberi ndokusonganidzana maziso na Yemurai uyo akabva amunyemwerera.

***'Ndinonzi Jemedza, hapana andituma uye kwandabva chaiko handikuzivi nekwandirikuinda handikuzivi zvekare munhu wandaigara naye akafa ndakatarisa nemeso angu aya, akandiudza kuti mai vangu pavaiva vakazvitakura pamuviri pangu vakavaona vachimanyirwa nechimupanzu ndokuwisirwa pasi zvakaita kuti kurwadziwa kuve pavari simba ndokupera, vakaudza murune iyeye kuti ahandise museve ndokucheka dumbu ravo achibva andibudisa mudumbu mai vachibva vafa ".***

Jemedza anombomira kutaura misodzi yake ichiyerera asi haana kuipukuta, akabva asumudzira zvakare achiti.

***"Saka wekundichengeta hapachina ndavakutsvakawo kwekupotera ndichimirira kupedzisa basa rangu ririmberi ndichizodawo rubatsiro ndinokuitirai chose chamunoda nekuti kumuzinda kune mhandu dzangu ndinotungamirirwa netsvimbo yangu"***

anotaura Jemedza ndokubva apukuta misodzi yake.

Mambo Zvinavashe vanoramba vakanyarara asi vaidzungudza musoro. Munhu wese akaratidza kurwadziwa nemashoko aJemedza.

***'Hupenyu hunoda kutsunga sejuru rikadamburwa musoro rinosara rakaruma nhokwe, zvawauya mumuzinda muno handikurambi asi mapinda nzara zvirinane kuti ugare hako musango mune kudya kwakanaka nekuti muno unozoti dayi ndakaziva'.***

Vanotaura Mambo.

*'Mambo wangu kana achida kugara muno mumuzinda anofanirwa kutsvaka nyanga kusvika ayiwana ndokuti tizomubatsira pahondo dzakewo'*

anotaura Dari Jinda guru.

***"Ari kuzvinzwa regai adavire "***

vanotsinhidzira zvainge zvarehwa neJinda ravo, Pedzisai ayinge akanyarara.

*"Ndinofa ndayedada asizve rume rimwe harikombi chiru, handingaitsvaki ndega,"*

anotaura Jemedza.

***'Mambo wangu imi munoziva kuti tose takaishaiwa saka munoda kuti uyu ayiwane kupi, ava N'anga here inofembera kana zvisingaite kuti agare muno mupei zvombo zvake netsvimbo apinde munzira nguva ichipo hatidi***

***kushungurudza munhu agara achichema  
inherera iyi asi zivai kuti Unherera  
humambo mangwana muchamuda uyu.  
Madzambagate indaunotora zvombo  
zvaJemedza nekuchimbida "***

anotaura Pedzisai.

Madzambagate anomanya ndokunotora  
zvombo zvaJemedza zvose netsimbo  
ndokubva adzoka ndokutambidza Jemedza.

Jemedza anotora dati rake ndokutora  
miseve yake anoona pasina mumwe chete,  
ndokutarisa Madzambagate.

***"Haina kukwana miseve yangu kwasara  
mumwe chete igwai rarasika  
panemamwe aro ngaudzoke nguva  
handina rinofanirwa kuvira ndavakure "***

anotaura Jemedza.

***"Uri muimba mangu pamutsago,  
indaunoutora "***

vanotaura mambo.

Madzambagate anonotora museve uya  
ndokuutambidza Jemedza ndokubva  
abereka dati rake tsvimbo iri mumaoko  
Jemedza anotendeuka ndokutarisa Pedzisai  
anofamba achiinda kwaaiva  
ndokumbundikirana kwechinguva misodzi  
yaJemedza inotanga kuyerera.

***"Wakaita basa nekundiya mura  
kwawakaita kubva padhibhura uchava  
mambo wemandiriri zvekugara tose  
zvaramba asi nerimwe gore  
ndichakutenda nebasa rawakaita "***

Jemedza anotaure ndokubva paivana  
Pedzisai anotendeuka ndokubvisa chuma  
chaiva muhuro make anofamba kuinda  
paiva na Yemurai ndokumira mberi kwake  
anatora chinguva akamutarisa ndokubva  
amuisa chuma chiyi muhuro chainge  
akapiwa namai vake. Haana raakataura  
zvase izvi zvaiva mumaziso eruzhinji  
kusanganisira naRunesu uyo ayinge  
angoshama muromo senyana.

Jemedza anobva atofamba achibva pavanhu  
akananga nekusiwo guru.

Asi asati abuda muchivanze akabva  
ashevedzwa kumashure kwake ndokubva  
acheuka anoona ari.....

**END OF CHAPTER 20**

**Book redu kubva pachapter 21 rava  
kutengeswa harichauyi kumagroups  
amuri rava kuuya kusubgroup zvino  
kuti upinde kugroup richange rava  
kuuya book bhadhara Mari yako  
inoiti**

**ZIM 250 RTGS**

**SA 40RAND AIRTIME Cell c kana  
EASYLOAD**

**For more information huya kuinbox  
panumber idzo**

**1.Author Phibion**

**0714160957 /**

**0774512473**

**2.Author John**

**+27845412105**

**+263779698011**

**Tosangana kusubgroup**